

文登縣志

卷九
上



文登縣志卷九上一

人物二

國朝

林起宗字德元順治丙戌進士初任永平府推官公廉自持一塵不染其地率皆禁旅新屯人稱難治起宗一繩以法驕悍輯靖民賴以安擢江南道監察御史條陳時務屢奉 溫旨 欽差巡按江南策蹇微行三越月足跡幾遍江南所訪貪墨豪強不可勝計會裁巡按缺陞湖廣布政司參議分守寶長道至衡州府以病致仕子淇貢監生考授州同

知家傳

鞠思謙字幼光歲貢生與思讓孿生而思謙爲兄落落有高致順治中

文登縣志

卷九上一

人物二

一

除東阿縣訓導三月即告歸以山林自娛將卒自爲敍曰余幼齡失怙恃一不幸中年喪匹耦二不幸末年失長子三不幸生平福履涼薄大略較然余資性愧不敏僅以明經出身蒞任學博甫三月東山之臥忽興隨告致而還家本寒素株守一經食先人之餘蔭潦倒半生惟喜清淨愛灑掃暇則流覽書史遇知交則銜杯道舊碌碌無奇爲天地間一廢人矣又自爲墓誌曰余嘗見一名公臨卒屬其子曰余歿後勿作墓誌但願子孫識其處足矣此達士之言余安敢非之然而更有說焉夫日月不無晦明陵谷不無變遷一坏之土能歷世世而常新乎斷碑荒冢零落於松楸蔓草間者不知凡幾况子孫之賢愚不等賢者固識其處愚者雖有處亦不識也名公亦無俟諄諄致囑矣嗚乎魂若有知白



楊衰草其故廬也鶴唳天空其知己也清風皓月之下行歌笑傲何事而不可哉過此以往亦不知其何之矣詩云地下長眠人不覺牧童空送笛聲歌悲夫

家傳

劉樾茂字松若濡恩子恩貢生考授通判性端方孝友醇謹有萬石之風與人言必以善事相助學書心摹手追寒暑無間生平所師法者惟右軍一人所臨十七帖渾脫沈靜意在筆先明季以來講字學者以劉

氏兄弟爲最

家傳

邑人賽玉紘劉松若先生墓表

公諱樾茂字松若文邑名閥也以寒門辱在世姻且衡宇相去不數武自先大人與公爲總角交迄於今子若孫同筆研而道殷勤者已三世矣予小子辟岬有年知公深者莫如予小子蓋公非今之人而古之人也公性最方不立崖岸不侵然諾意所可不失色於嬰穉輿隸意所否雖疆禦不少附和而孝友諄諄有古萬石君風則公之學問然矣公最喜陰隲事與人言每疊疊不倦又喜臨池自爲諸生以及授郡別駕心摹手追惟逸少一人予小子嘗屢履到舍見其坐斗室中上懸溫公家訓四壁墨跡淋漓几案之上

文登縣志

卷九上

人物二

一一

龍蛇競走顧而羨之又嘗見其沈吟默會手一卷不釋就視之乃四子書也予小子笑曰先生甫讀此乎公曰唯唯否否今之號爲文人者批風抹月憂玉鏗金詡詡然自以爲兔園冊子盡在於我而不知其爲蟬羽蛩聲也四子之書吾少而習焉今耄矣不能釋也予小子歎服其言其學焉而有得者與公父濡恩官鞏昌府同知崇禎三年卒於任時秦中流寇大起公撫父柩歸途遇寇從者皆奔避竄林谷間公守父柩不去賊亦義而釋之得歸葬焉公彌留之前過敝廬與語終日大都規勸之詞居多既而曰吾休矣今日之來乃永訣也予小子深訝之公既歸坐寢室不出未兩月而哲人萎矣嗚乎死生去來之際人所難言也易箆而逝千古有幾非學力深而見道明者孰能與於此哉然則公之子爲循吏爲名士女爲烈婦宗族慕焉鄉黨稱焉者豈偶然哉公之嘉言懿行家公狀之頗詳茲不俱述述予小子所見知者如此昔昌黎送楊少尹以爲鄉先生歿而可祭於社予小子於公亦云

劉樾藻字覲文濡恩子國學生候選縣丞不樂仕進篤於孝友

壬子志

劉樾蕢字實藩濡恩子崇禎乙亥拔貢順治間除河南通許縣知縣時值草昧之初所在嘯聚乃創修更堡實行保甲兵不煩而民相衛縣境無寇盜虞連年兵餉催檄如雨樾蕢寓撫字於催科鞭扑不用公事既完民力亦紓招撫逃亡措給牛種勸墾荒地八百二十頃通許最苦者

無如河夫一差舊額河夫二百一十二名元年二年突加兩倍里民失措乃通詳曲繪又面陳疾苦減夫二百餘名民免逃竄至於清獄訟恤貧困善政不可殫述康熙元年陞開州知州其子輝爲輯三年行政逐條分記曰治通政略

家傳並
壬子志

劉訢字興堯樾禱子順治乙未進士授兵部主事晉本部郎中歷雲南開化府知府府所屬無州縣無城郭荒茅叢棘之間雜集流戶十餘種烏言鯨面言語不通告以出租賦奉期約則若罔聞訢化導十餘年若父母之保赤子磨礪浸灌久而豁然時吳三桂王雲南擅作威福 朝廷號令不行於西南訢棄官歸及吳逆蠢動雲南爲賊窟仕其地者多被脅從吳逆平陷賊者多獲戾訢獨獲免人以是服其先幾之哲云嗣

文登縣志

卷九上一

人物二

三

子一良字復菴太學生潛心經義復精岐黃問疾者接踵深夜嚴寒有求必應有持謝者雖微物必力辭宗黨中有貧不能娶者竭力相助以延其嗣晚年好卜筮諸書苦思冥搜見一切占卜統貫於易因宗邵子之說會同羣言著有周易研悅闕疑二卷

家傳

劉輝字玉函樾蕢子順治乙未進士授行人庚子典試廣東所取多知名士陞禮部主事生平篤於嫺睦立義學以教族人代謀聘娶者二十餘人業師王元升年耄無依延入己家奉養歿後猶代完租賦仍屬其子踵而行之視鄉里如同室遇有爭訟者必委曲排解邑人以魯仲連目之卒祀鄉賢祠

鄉賢錄

邑人賽玉紘禮部主事劉公墓誌銘

公諱輝字玉函號西山自其曾大父諱必紹大父諱濡恩兩世郡丞而族始昌濡恩公產子十有一人皆

列在士大夫其行十一諱樾實知通許縣晉知開州者公之父也公天姿穎異而志尤篤少與余挑燈攻制舉業頃刻可成數藝爲文整練華瞻在班范之間自童子至爲諸生試必前茅四困棘闈益刻苦不少懈順治辛卯年二十八登賢書乙未成二甲進士已亥謁銓除行人司行人庚子典試粵東榜發皆知名士今翰林龔章所取第一人也未幾陞禮部祠祭司主事丁王太孺人艱服闋補授儀制司甫彌月丁父艱服闋候補三年未遇缺竟歿燕邸時康熙壬子季冬春秋四十有九踰年櫬歸今以乙卯季冬卜葬柘陽山下公胞兄弟四人而公居長次諱焜甲午恩拔次諱燿廩生次諱瑛庠生元配 勅封孺人余胞妹也子二人長貢監生一元娶禮部尚書沙公諱澄女次貢監生一中娶義烏知縣于公諱漣女女一人適遷安知縣叢公諱儀鳳三男庠生應乾孫子三人俱幼公爲人謹慎心慈而性能忍生平不妄交其或侮予者處之恬如也內仁九族立義學以教族中之俊秀其貧不能婚者率質物以給之處鄉閭以和甯舍已財濟人困心始樂之惟立朝無多日經濟不獲大顯於世人以爲豐於德而嗇於年咸痛惜之余謂公以少年登甲第而功名卓卓子孫濟濟如此否則雖壽百年視公何如哉銘曰高四尺者公之墓耶行以爲本文以爲華何命之不永而祿之不賒載貽而後克昌厥家

叢蔭坤字元子崇禎丙子舉人順治間除晉江縣知縣時晉江賦法大壞專比糧長置花戶不問蔭坤下車令開花戶姓名某產若干應納銀若干各領印單自填完欠民爭自完納宿弊一清時臺灣用兵晉江供應尤煩王師至蔭坤飲以酒申嚴約束勿擾百姓闔境帖然年餘以積

文登縣志

卷九上二

人物二

四

勞卒於官貧不能歸葬贖金送者數千人祀晉江名宦祠

家傳

濰縣張昭潛叢先生傳

先生姓叢氏諱蔭坤字元子山東文登縣人崇禎丙子舉於鄉順治間除福建晉江令時晉江賦法大壞前令至按期徵比不及額者笞之笞者有酬受笞者有代代受笞者倍酬民以酬笞故已坐困以故賦愈逋又故事專比糧長鄉民黠者既負逋而累糧長其愚無識者則望官府惴惴而糧長又往往隱蔽虛喝之拘甲移乙弊端滋起先生廉其弊甫下車卽積糧長於庭令各臚列所攝編戶姓名某產若干應納銀米若干總計如額則除糧長籍令民自輸各給印牌自填完欠完者無復株連欠者以省繁費亦易爲力至期弗比而輸者載塗民大便之於是毫釐皆正供積弊爲之頓清民爲之歌曰昔鞭扑今刑措抽薪止火叢父活我時臺灣用兵晉江爲瀕海巖邑供應尤煩王師至伍伯索犒先生取大觚而醕之勿擾我百姓牲酒雞豚既備既戒則歡呼醉飽往往申嚴約束而去闔境帖然其有負弩擲銑橫目而來索犒不已而又索妓先生正色曰晉江獨無此君甯不聞之耶蒞任年餘以積勞卒卒之日斂無完襦貧不能歸葬邑人憐之贖金而送者數千人又歌之曰我公歸我心悲今公歸矣無復來時

翰林院庶吉士晉江王命岳三院批允叢父母立石文

比者長鯨鼓鬣紛盪走陸天戈南指附注麋集瀕溟巖邑悉索敝賦用輸糗時氓咸號蹙如予晉江古稱輿區惟正厥額銀凡三萬九千三百兩有奇米凡二千五百七十三石有奇繫昔當事豈其弗惠爾兆民休催科弗前且麗於罰按期徵比不及額者有挾扶有代代挾扶者與持扶者有酬酬之數足完比竟以酬挾故愈益逋又故事專比糧長置花戶不問花戶黠者既負逋而累糧長其愚者望邑庭惴惴而慄糧長亦往往虛喝之飛甲移乙弊端滋起而籤拘追押之法行利率歸胥役閭閻之間蕭瑟繁費盡矣於是叢侯父吾邑甫下車廉前事所以失一切反之集糧長於庭令開造各都畝丁米數目以撒數符總數有出

入乎無之乃已令臚列花戶姓名某產若干歲應納銀若干較若列眉糧長不得以隱蔽相恫疑矣各領印單自填完欠完者弗恤欠者弗甯尋爭自完納焉收糧人役務核正身花戶皆得自封投櫃令戶房當堂核查登比簿其收銀也紋銀一當一餅銀一兩補色七分銅錢如市價折收一從民便新穀登場納穀納草俱得准市價爲徵收民益便之示比期必前數晨至期弗比也視鑑已十之七再示期仍弗比如初視鑑則既盈自侯下車弗較一里弗扶一戶官民相親捷於取攜故邑當凋瘵之後而民煦於春臺適父老數十輩請於僉憲葉公詳督撫按三院將以父母之政貞諸珉永爲式報曰可因乞予言誌於碑陰予言官也母甯瘳惡是力亦彰善是亟其敢辭不敏遂援筆爲之記侯諱陸坤字元子別號蓬衷山東文登縣人丙子科鄉進士按侯催徵良法實稟承於僉憲葉公滾單之制佐以坐單葉公治法法可垂於萬禩叢侯治人人可式於天下人非法不立法非人不行入法相需詎不信哉

晉江吏部尙書莊欽鄰叢父母德政頌

暫將百里屈名賢晉水湯湯滿陌阡月霽訟庭人靡競冰清官舍魚長懸盤根泰岱堪梁棟解網潢池絕浪煙野老扶藜觀德化徵輪不擾太平年

晉江太僕寺少卿陳洪謐詩

天府夙傳姓字香攜來妙手試干將乳泉鶴舞琴敲雪筍水魚懸案拂霜欲使殘黎長起色不仍弊政暫醫瘡士林更喜菁莪化桃李爭開藥滿囊

晉江布政使黃中通詩

崑崙山前瑞色氳閩陬喜得沐清芬戴星不獨推單令醇化應兼擅卓君冰鏡遙將麟鳳剖慈雲坐見坻京殷歡騰萬姓知何限應有徽聲徹紫旻

王命岳叢父母輓辭

何做邑之不造兮慈母撤而去帷繫兵馬之雲集兮追呼急而然眉公留心於保障兮誠不忍雜以繭絲

文登縣志

卷九上

人物二

五

民懷德而輸將兮亦爭先而恥蹈乎後時惟田畝之入有限兮不足供三軍之所資協濟旣愆於江浙兮給發復悵於藩司營伍聚而索餉兮登邑堂而恣睢公曰易耳而無譁兮取大觚而酌之雞旣碩而豚肥兮羌旣飽而解頤費杯盤之狼藉兮或告緩乎須斯終三空而四盡兮乃揭借以蔽虧曾造巨商而緩急兮商曰何冥行而至茲公隱忍而不較兮獨鬱悒而齋咨刻已肉而醫官瘡兮瘡未愈而肉剝過客問公而取孃宿兮公正色曰無諸咄唾面而怒詈兮聽自乾而夷猶黠民避役而憑社兮富者逸而貧瘦繩以法而不得兮歎邑宰之官卑余知公之憤懣兮躬負土而繫思約我公以面商兮訂十九而爲期奄十七之長夜兮終不旦而騎箕予聞息於山間兮不忍信而懷疑曰果爾而無訛兮與工役相對而噓歎衣不足以蔽體兮木不具而斂屍生無一日之歡兮死無一金之遺使我公之未歿兮未必厭衆口之黃雌果蓋棺而定論兮允循良之表儀嗚乎公已矣乎歿則爲神復奚悲惟羣黎之失所兮空對墮淚之峴碑寄語當路之聖賢兮應念下吏之難爲亂曰賦役書成餘地迫而無米督炊巧婦格而呼之於上不可獲而問之於下交徧謫而短後健兒噴目索而長舌破奸匪狐赤而巖巖邑署不可宅而願言大衆布寬澤而化日舒長毋逼窄而輓詞將終百憂瀉而

晉江黃徽胤轉叢邑侯喪疏

邑侯叢父母修幹玉立瞻矚疑徹暘休春煦卽之意意消與之言言倒筐度肝膽可一攬取也故其達之爲政寬慈簡易省刑清訟卽有以事至庭者諭所以勝負剖而遣之金矢一概勿問晉重值軍興一切錢穀如垢髮紛絲侯以精心綜理之催比不用敲扑輸將恐後見徵舊逋犁然一清邑人頌之以爲從來催科之善未有如侯者余嘗謂侯仁人也侯之政仁政也仁者宜壽不謂其遽棄我士民也訃聞之時囊無一金寸縷倉卒殯殮周身弗給見者垂涕郡父老相率投櫃延僧舉喪嗚乎侯有德於地方如此宜乎感人之深也召南之詩曰蔽芾甘棠勿剪勿伐志遺思也九罭之詩曰無以我公歸兮無使我心悲兮冀來復也侯往矣不可復矣我輩沐侯覆露若使麥舟之誼無聞坐使靈輻久頓仙魂不歸存亡易念其謂之

何茲立鳩助一册告諸同志隨願填交匪
云報也聊盡區區之誠以敘古道云爾

叢大爲字祥子明尚書蘭元孫穎慧絕人讀書過目輒成誦年十三入
邑庠舉崇禎壬午 國朝順治乙未成進士知江南句容縣簡易慈祥
清操如洗罷官旋里仍好學不輟貫穿經義博通子史稱東海宗匠者
四十年尤工臨池落紙輒爲人攜去金沙蔣超稱其靜默如深山老衲
詩才清脫草書得一二王遺意有攜雪堂詩草

舊登州志

邑人呂潤蕃叢堯山先生傳

先生諱大爲字祥子號堯山文登人明少保丰山公元孫也幼穎異有神童之目以順治乙未進士除江
南句容縣知縣清操骨鯁蒞任未久以讒褫去去後寓居句容之崇明寺與野叟老衲及邑中文士相款
洽意泊如也而句容百姓泣訴當道置簿設櫃助之金里民供薪米相望於路有七旬老叟匍匐五十里
負米獻者石城名士周銘賦浩浩歌贈之有蒼生倘命窮吾道甘蹉跎之句迨公論昭雪先生遂無仕進
意嘗往來金陵華陽間泛秦淮登木末亭雨花臺諸勝蹟賦詩見志蕭然鹿墟之外旋里後仍好學不倦
貫穿經義子史與賽先生勺海畢先生亮四以詩古文詞爲東海宗匠而先生工草書詩文爲書名所掩
去今二百年邑人爭寶其翰墨詩文鮮有存者僅餘攜雪堂詩草一卷攜雪堂者先生罷官後以攜雪老

文登縣志

卷九上

人物二

六

人自號蓋取孟郊一卷冰雪文避俗常自攜意詩格迥麗近柳州其草書由智永千文入上企晉賢於大
令契之尤深玉骨冰姿迢遙紙上逸若仙靜若禪其跌宕取勢處若舞女低腰仙人嘯樹而丰韻瀟灑又
若瑤草琪花迎風綽約以僻處東陲故不顯於世惟寓居崇明寺時求書者盈門金沙蔣虎臣尤篤愛之
先生之學能見其大故發爲詞翰迥異流俗其論學書曰悔心發而天風反善言發而熒惑退天人非二
致也簫韶奏而鳳凰儀機心生而鷗鳥去物我非有間也曾子倚山而吟山鳥下翔師曠鼓琴百獸率舞
未有誠而不應者又曰一日子而亥一歲春而冬一生少而老操存此心如過獨木橋如御逸馬如俯懸
崖如見大賓而對上帝使主心常存客氣聽命則病根自除方爲第一流人若徒制其外而不從事於內
譬操萬斛之舟於江海中遇狂風巨浪舍舵而惟篙櫓是仗焉吾見其危矣又曰嘗憑高俯視人世雲樹
市塵蒼茫萬井何異部婁蛭穴翳翳蠹網欲於此中迷戀纏綿亦大可哀殊不知向上有濶天大路步步
登高引人入勝無聖凡無古今大丈夫須是大開眼界千仞翱翔莫倚門傍戶埋沒一生先生著作散失
今所見者僅此百餘言然亦可見其安身立命獨契精微之旨故脫離塵網名韁遊心於天地萬物外也
邑人于鵬翥攜雪堂詩草序

堯山不僅以詩名而深於詩自三百篇後楚騷漢魏六代全唐靡不研涉其論詩貴自然鄙雕鏤尙眞厚
恥浮薄崇大雅去僻怪於古獨好十九首陶彭澤於唐獨好少陵青蓮右丞左司諸家舊讀書東園有東
園草屢歲公車有塵中草辛卯放棹吳越有南遊草乙未出燕都有泥中草丙申謁銓泊華陽署中有昨
非草藏於篋不以付梓而但梓其被讒以來數章堯山曰吾有所志也一志悔一志存悔者非悔守官之
靜而悔不量之入存者非存吾詩爲撫掌之資而存句人有愛棠之誠名以攜雪避俗之意深矣讀者於
此觀世變焉

石城周銘浩浩歌贈堯山先生

浩浩歌天地萬物如君何胸中邱壑藏江海不用拂枕歸山阿君不見百里曾能羈一鳳甯能傲吏捲秋

蘿浩浩歌天地萬物如君何丈夫得志當封侯空山何處聽吟哦君不見陶令門前五株柳作賦歸來豈有他浩浩歌天地萬物如君何蒼生倘命窮吾道甘蹉跎贏得青山作几案饒有玄湖渙墨波詩成字字生秋雨仰天長嘯思何多

邑人宋啓元寄堯堯山詩

堯山句容遭謫居民泣訴上臺置簿設櫃助金此古今所罕觀者公論昭雪淹留句容尋勝地訪勝友書扇吟壁坦如也遠懷漫賦

彈城產瑰璋天下士與知有目羅飛鵬枳棘分江湄河橋兩岸斷歧路野雲垂山城姑射宰瘞鹿傳口碑
玄冥旌亮節故教貝錦滋暮鴉啼寒樹山猿嘯晚颺井里心太古公庭代泣悲慈母囊風雨公篋助金貲
市虎垂將白投杼無可疑遲回稽歲月二仲醉三卮逍遙訪禹穴看竹樂不疲憩宿選別業江煙生靜帷
有客求鶴書盈箱積絹絲登龍爭駭汗接踵丐詩辭青史傳奇烈才名因禍馳爲憐西園竹遙望日遲遲
佳節花開日晴宵月上時何得遽歸來酌酒慶新詩 又堯山留句容屢以詩字見遺江南求書者盈門
事變中具見高淡因家音久稀感而有賦峯壑通吟興書鵝走霧烟披襟嘯朗月把酒問青天千里填簾
隔十年風雨憐疎窗
梅影到髣髴伊人前

叢儀鳳字閬仙幼失怙恃苦志好學累試冠軍由順治戊子鄉薦知澄海縣蒞任兩月廉聲大著裁缺尋補遷安縣禁羨徵別宿弊年餘掛冠士民依依不忍舍壽七十卒鄉里德焉

壬子志

文登縣志

卷九上二

人物二

七

叢毓瑚早歲失怙撫弱弟成立家貧力田課子終身不至官府族姓蕃衍約束有法里黨有爭者輒排解之壽屆期頤以耆德舉知縣王一夔表其宅曰旌淑子元燦康熙壬辰進士任高淳縣知縣毓瑚封如其官

王志

于應第號台聯東齊子歲貢生積學篤行士林有聲崇禎庚辰大饑邑人死亡過半應第煮粥道傍凡數閱月遠近賴以存活捐義塋以收白骨立義倉以備凶荒建義學以教子弟招集流亡給以牛種自是鄉人多歸本業以孫漣特贈光祿大夫祀鄉賢祠

壬子志

邑人叢大爲台聯子公墓表

吾邑隸郡東偏風土樸陋人物寥落而 皇清開國以來科第蟬聯首推于氏爲最盛云考其發祥本源食報不衰蓋自先世碩德隱行累積豐融數傳而至冠帶公樂善好施鄉邦儀型迨 敕贈文林郎諱應第號台聯承厥堂構而光大之觀國用賓未友攄蘊抱顯當世而階前之玉樹交輝砌邊之竹孫滋翠棣

鄂擅職於文壇喬梓麗彩於仙仗高門勝事震古燦今良爲海天希覩者矣贈公生而純篤讀書敦行事親以孝聞友愛叔弟無異同胞其至性然也于氏族大丁繁約束爲難贈公著家訓申教誡由宗及黨莫不奉爲典則尤喜賜給貧乏歲稔倡率賑粥全活無算義學義倉迄今不廢文正義田之後稱嗣美焉至於家庭雖穆動循禮法以名教持身卽以身範飭子長君鵬翬以拔貢令仙遊而邀 覃恩矣仲君鵬翰以乙未榜令峽江矣叔君鵬翀以壬辰榜改教靈山矣季君鵬翥以孝廉膺揀選矣孫漣以戊子乙未榜官銓曹矣而乙酉之薦鄉書則叔與季兄弟聯翩也乙未之捷南宮則仲偕其嗣父子同榜也而卯辰聯捷之漢則季君長子也若淑若濬若涵若淇淳若灑澆法及曾孫繼祖輩采芹食餼彬彬繩武不可限量天將以佑善而錫慶乎何謀貽之克臧也年躋大耋生享壽考之樂 恩邀寵錫歿賁 綸綍之光以身範飭子仍以子貴榮身可不謂彰明較著者哉嗚乎世人之爲善不卒也或見夫砥礪名行者罹謗尤怙侈不檢者席膺盛輒疑天道冥漠應感多舛以今觀贈公之世德昌後則易之視履考祥不其驗耶表之於石爲鄉國風焉

于鵬翬字負青應第子拔貢生幼嗜詩書英名藉甚事親孝處昆弟克

篤友愛除福建仙遊知縣時閩海不靖緩徵裕餉兼得其濟修 文廟

清蠹胥法遺情恕民自不冤思遺愛者咸垂涕焉

壬子志

于鵬翰順治中知江西臨江府峽江縣縣當閩粵之衝軍馬絡繹鵬翰

文登縣志

卷九上二

人物二

八

捐貲募夫民乃不擾力請蠲荒徭而市所乘馬給民牛種二年民歸業

者萬計

一統志江西名宦傳

王志于鵬翰應第子順治乙未進士任峽江縣知縣時值鼎革兵燹之後峽江水陸之衝疲不堪命鵬翰捐貲募夫舟楫糗糧應時而備民不知擾積逋竄荒莫償者力請蠲除祀峽江名宦祠著有又詩草以子漣特封光祿大夫祀鄉賢祠 峽江志名宦傳于鵬翰字六息號山白順治十一年進士十三年知縣事秉性仁廉治事精詳時值兵革之際軍馬絡繹鵬翰捐貲募夫舟楫糗糧應時而備民不知擾山寇嘯聚城野時警鵬翰多方剿撫寇悉平通邑積逋竄荒莫償鵬翰申請得免維時汀餉檄嚴鵬翰不忍以攤派累民設法分徵輸將恐後嘗賣所乘馬給民牛種勸耕作至興學校以端士習立保甲以衛民居悉本至誠應如桴鼓二年之間諸弊盡剔百廢俱舉民風日厚士氣日振惜以憂去邑人士思慕不忘請祀名宦論曰聞侯東海世家父子兄弟濟美聯芳理學淵源公實作之師云蒞峽雖未及三載而清風仁政美不勝書開創之初何幸得此循良之宰惜夫天奪之速未竟其用名宦俎豆洵不誣矣贊曰才全德備學醇治誌古愛之遺興朝之瑞水悠山巋長歌誰嗣

于鵬翀字聖庵應第子天性篤厚喜讀書言笑無妄發順治乙酉與弟

鵬翥同登鄉薦成壬辰進士父母年高不忍遠仕改授靈山學博

壬子志

于漣字清漪鵬翰子順治乙未與父同登進士授雲南楚雄府推官府

係新闢地率多疑獄讞鞫之下必勤必慎郡無冤民撫臬奇其才留之
省會獄訟之難明者悉委審理焉時吳三桂爲平西大藩跋扈萬里之
外撫軍高忤其意特疏糾參欲置極刑漣從容言於吳曰巡撫封疆大
臣忤王意而罹法如公論何高卒得全丁外艱歸服闋補陝西鳳翔府
推官缺裁回籍秦人勒石記德改授四川崇甯知縣缺裁未任旋補浙
江義烏縣知縣縣俗悍健訟地僻多盜乃興學校重孝弟勸農桑息爭
訟嚴保甲稽出入數月間政簡刑清訟盜兩息邑人號爲神君康熙甲
寅閩藩耿逆倡亂蔓延浙西金衢間無甯土羣盜數十萬攻烏烏無城
且無兵百姓紛紛逃散時浙閩總督李之芳駐兵仙霞嶺漣率親丁數
騎赴營請兵恢復得馬步兵三千親冒矢石勦撫兼用不數日收復故

文登縣志

卷九上

人物二

九

境鄰邑頑梗未靖 親王方議勦除漣請以身保單騎冒險深入峻嶺
宣諭朝廷至意烏合之衆皆倒戈歸命功爲旗官所冒抑而不顯蒞烏
三年百姓爲建生祠三所乙卯 賜蟒欵取補戶部雲南司主事轉吏
部文選司以前軍功蒙優獎加十一級晉階一品 特贈四代正一品
封典陞本部員外郎轉郎中致仕歸漣性慷爽質樸不飾邊幅不矜己
長不形人短宦遊二十三年未嘗受暮夜之金枉一人之命其自信如
此卒年五十四子師善准貢生志學諸生俱早卒念祖歲貢生紹祖康
熙乙酉舉人

家傳

邑人叢大爲特授光祿大夫桐江于君墓表

余年友于光祿之歸窳也既采摭其行事之大者勒幽宮矣令嗣復令余爲之表而因有所感焉夫讀書
之家志期顯達厥維科第然科第之盛必由積累而顯達之極或傷元氣蓋席豐履厚驕盈易生依勢作
威致有斲損始未嘗不赫奔後稍衰替也則讀書家亦何貴乎科第哉而善積慶餘者正以科第愈盛而

好行其德斯足尚耳以余觀光祿之門其與近今之顯達者殆不可同年而語矣光祿諱漣字清漪號桐江幼穎慧弱冠掇甲第人豔羨之乃自通籍服官不以寵利爲榮而以循職盡忠愛民報國爲念高自期待直當於古人中求之其爲理也滇南陝右兩司讞訊聽斷明決多所平反未嘗任獨見徇私情致枉一人之命其爲令也軫恤惠懷痲疾苦悍夫戾俗胥若於化催科署道州之考德教嗣蜀郡之風矣其執法不阿也釋冤獄絕汗令之餽懲扣餉嚴貪帥之誅至以侃侃正論解撫軍高公之危則剛勁足警權奸也其遏抑寇盜也值耿逆倡亂閩浙無寧宇萑苻之族視烏爲几上肉耳而請師固圉勦撫兼用經濟之略見諸折衝矣其入而綜理銓衡也疏壅滯善任使秉鑑精明羣服至公所稱靖共正直者非耶其內外分校闈士也滇之倪秦之李所得皆一時名彥知人之哲與蒞銓曹無異誠得以人事君之義者與若夫內行之純篤於孝弟交友之善原於忠信仁人之言利於鄉黨而德器淵宏偶值橫逆置不與校尤挹千頃之雅量焉嗚乎先世之積德累仁不可殫述長發其祥克昌厥後自興朝定鼎以來科第蟬聯甲於海內而上溯宗祏俱晉一品王父乃考並祀鄉賢天之報施善人此其大彰明較著者也乃光祿之揚名顯親錫類不置亦云至矣其由積累而科第由科第而顯達世咸知之其得志乘權公忠矢志利濟爲心科第而好行其德不同於近今之顯達者世不得而知之也然則于氏之蘊蓄光輝洵未易量也故亟表之以風世云

于漣風雨詩

風雨夜來深槐花覆茅屋花落亦有時何必苦相逐人生能幾何悲歡如轉軸前邱陵後川谷鳥高翔魚潛伏黃梁未醒飯已熟庸庸多厚福長此媚幽獨

又秋日道中詩

左輔遙天塞雁過回看秋色近如何豈因白髮高懷減偏爲黃花客思多風雨薊門羞老大夢魂衡宇滯關河干戈聞道消吳楚不必登臨始放歌

文登縣志

卷九上

人物二

十一

又感遇詩

大地何茫茫蒼天何浩浩風雨來無端摧殘令人老回首憶少年詩書恣探討追隨步南宮浮名幸及早滇南鳥道賒虎豹畫磨牙山嵐滿瘴癘吞吐任蝮蛇君命惟所使詎遑問室家盈盈懷中女奄奄牀上妻蚩蚩雙弱息牽袂掩面啼涕泗淚如雨咫尺分東西高堂有老父隔在天一涯揮手渡河干相對語淒其瘴癘雜風煙虎豹望曩野經新戰伐所餘惟土司故鄉日以遠遊子欲何之孰知是死別猶是計歸期強笑進卮酒莫爲兒女悲清白奉家教不貪卽爲孝闕宮莪菁菁王政先無告寬大長子孫得失何足較再拜就長途荒徼暮雲孤山外盡猿獼妖女夜當墟行行復行行父老遙相呼新使君與舊使君殊高田好種黍低田好種芋種黍好釀酒種芋樂妻孥犴狴徑草青書聲達通衢樹杪寒雪飛樹根寒雪積獨鶴唳嚴冬淒淒訃音至藥餌弗親嘗總緯弗親治心恨寄阿誰仰看天欲墜當事欲奪情委曲謝羣議憐予重殷勤母乃爲貪位一步一斷腸恨不奮雙翅素車近海隅橫道臥雙孤牽兒下素車兒言母已無爾母固多病胡竟棄須臾入門陳哀詞薄官子道虧父死不得見何以我生爲老母述遺言泉下無所思孝子貴揚名兒歸慎語伊再拜尊父訓哀哀雙孤兒非不傷爾母難以分齊衰盈盈懷中女相泣還相疑

感遇二

拳裳渡渭河四牡指卷阿昔日帝王里感慨一何多公餘自種植桃李影婆娑裁官被新命改除崇甯令地瘠人且稀上書復兼并繡湖古越疆鬪很任強梁昨午懶穫稻今歲爭採桑六載兩報最帝寵錫衣裳兩兒何荼苦相繼忽殞亡骨肉半彫零天地爲慘傷烽烟更四起鯨鯢徧鳴張寇至我兵來田廬作戰場老夫撫子走老婦攜女忙玉石恐俱焚師行未可量傳語老夫婦爾輩母倉皇騎馬入營門營門將士喧此地盡成賊子女安可論從容語大帥除惡除本根脅從非得已朝廷有新恩死生惟大帥可以慰驚魂大帥曰徐徐逋盜復何如桓桓十萬甲不如一紙書披榛讀詔書登山棄肩輿聞之皆感泣投戈自歎獻蔡人卽吾人哀鴻奠厥居丹鳳日邊來江上繞征車金臺聚好友把酒賀生餘中夜起狂靈天台

古道紆亭亭松與竹冷冷冰與雪樹亦有荆棘鳥亦有百舌百舌漫相欺冷容爲君知西宮夜宴罷或有奉恩時

西堂雜組賀于吏部四世榮封一品序

原夫周室文孫肇生邗叔漢京世族爰始于公西平嗣起有高門駟馬之祥黑稍代興兼領軍尙書之貴歌平梁之什謹號元勳贈買山之錢頤稱國老歷禩累書其事今時復見其人乃有山左名家海東甲第城臨不夜天開通德之門石刻之衆人說高陽之里於是桐江先生出焉官居司績方佐三銓功紀太常已階一品且以九儀之命推及四代之封玉軸鸞書頒來天上金章魚袋錫在土中舉朝豔其非常通國驚爲希有溯厥元本良非偶然蓋自先曾處士蓋縷開基大父明經青箱創業加以建倉立學誼感枌榆排難解紛風興桑梓式廓蓬蒿之緒遂成閥閱之家始也一門之內軾轍連登旣而一榜之中談遷並舉崔牀聚笏方此無多張巷鳴珂於焉再見惟是六息府君抱三都之才棲百里之地雖桐鄉遺愛久尸祝於西江然渤海賢名終沈淪於東國光遠而他有耀澤深而後無涯我儀圖之公其有矣維公起家司理奏績祥刑初臨南詔聲聞鳴鳳之山繼治西岐頌載寶雞之石重煩牛割一變烏傷時則蛾賊磬牙狐妖嘯聚金華洞府忽成伏莽之場錦繡川湖盡作負嵎之窟貔虎爭驅於戲下舳艫轉運於行間公以白面書生黑頭縣令磨盾草檄叱咤而定機謀策馬乘墉涕泣而陳禍福先聲所指暴客投戈大義相加兇徒解甲折衝樽俎三軍之刁斗無驚復業田廬萬戶之縷縷有喜功斯大矣賞莫懋焉 天子乃開石室銘景鐘序其一等之勛予以三公之秩而且援文侯之命追孝前人取君牙之篇無忝祖考彤弓秬鬯上視公侯綸翟衡筭並施婦女可謂人臣奉職善則歸親 聖主旌功恩能逮下者矣及公三年報政特駕鋒車六計辨官高懸金鏡梁冠山佩首崇五部之班赤管隴廩迥出諸曹之右豈非贊賓門之穆穆超題柱之堂堂者乎夫朱輪華轂宰邑之至榮紫誥黃封服官之恆寵安有朝請之銜遽遷光祿夕郎之拜更從大夫遂使壺關三老比唐室之儀同魯國諸生等漢朝之僕射雖曰南宮進士卽如東閣公孤是知生有

文登縣志

卷九上一

人物二

十一

自來其量十世死而不朽以光九京猗與休哉允也盛矣今公衣錦歸鄉焚黃告廟牲醴黍稷皆升 帝闕之馨香鐘鼓旂常並沐 天家之膏澤人言積善之慶在昔有餘我謂邁種之祥於茲長發敬仰之昌五世媿乃承姜太邱之德三傳卿甯慚長翁如蔡廓宜有興宗孫似王融自然及祖僕忝通家之契有同寮案之交欣覩奇逢樂成佳話此時休假爭觀萬石之風他日卽眞更上三台之頌

于式敷字德一諸生光祿大夫漣家孫光祿藏書萬卷式敷披覽無遺至忠孝大節則慷慨擊賞間以韻語揄揚其事如弔珠厓哀李太尉弔衡州哀趙樞相從千載下尙友古人具有讀書論世之識詩學宗瀆西玩誦不釋手其所作質厚溫醇亦近瀆西家居城市無妄交暇則策蹇驢率小奚奴往來文山道上見之者不知爲貴介子畢鬻序其詩目以古君子偉丈夫蓋狂狷者流也著有學步草子咬歲貢生贈修職郎咬子基厚乾隆乙酉拔貢任樂安縣教諭家傳

邑人畢鬻學步草序

亡友于子德一生而穎慧直方嚴厲稜稜不合時宜其磊落鬱勃悲歌慷慨之氣一寓於詩而以麴生澆

之然世人罕識于子輒目之爲酒人其識者又或以爲畸人嗚乎是何足以知于子哉于子爲光祿公冢孫家清白猶足以資輝赫乃杜門默坐不妄交遊出則乘蹇驢率平頭小力往來文山道上莫辨其爲貴介子視其一二執袴輩席勢作威誇耀鄉里蔑如也性嗜書史樓頭數萬卷靡不周覽至於忠孝大節魁奇賢豪間尤三致意且津津不去口學詩酷愛灑西玩誦無虛日然不輕脫稿每作必發驚人語余與共視席數年味其詩秋冬之氣居多每懼其遇之或乖而祚之不永又轉一念曰于子孝友質實足於學識世必有知于子者不應以坎壈終亡何遭家多難兩叔父相繼云殂傷慟逾禮輒嬰痼疾因是愈放意詩酒以自廢居平謂余曰吾與世齟齬而門祚又辱政兒苟列衣冠將棄諸生以老耳余猶謂其佗僚無聊之語詎料其寢疾累月而竟至不起耶今其詩俱在言言血性字字天真讀其居母喪哭叔父諸什嘔心吐膽有不泣數行下者其人可知蓋令伯之陳情退之之祭姪于子兼之矣其他嘯詠懷人流連光景之作抑又何論嗚乎于子生平厭嬉戲與人坦率又好讀書知大義故爲詩發乎情止乎禮得小雅怨悱之遺意焉余方頌之以古君子偉丈夫而世乃目之爲畸人誣矣况又以爲酒人乎哉

邑人寰珠輓于德一同社詩

德一貴公子不事輕肥誇閭里德一文學家不從帖括鬪鉛華牀頭一束書案上一壺酒酒在左書在右醉欲眠時客知否剛來高臥百尺樓下視俗兒皆芻狗有時詞場誇著距談天炙輞真無偶遊戲塵寰四十年醉鄉一去呼不還我經華屋淚如洗短小精悍想遺顏吁嗟乎人生百年如轉瞬止應有子萬事足此語寄君君無恨看取諸郎美如玉

于性篤字興凡諸生事親以孝聞年饑捐粟煮粥全活多人鄉閭德之贈通議大夫戶部左侍郎

壬子志

文登縣志

卷九上

人物二

十二

于可託字阿輔性篤子順治乙未進士授撫州府推官始至印延訪州之賢大夫篤學好修之士視民所最病者除之撫州感其德爲勒清風碑以誌遺愛行取工科給事中周歷六科多所建白每奏事世祖目送之歎爲真諫議所言恤民力裕國計懲貪酷嚴甄別與夫逃人之株連訟獄之繫逮縱兵械民及剝民肥己者章數十上屢蒙允行二百年來天下受益者無方忠國愛民之績詳載國史列傳康熙十一年晉順天府府丞遷太僕寺卿宗人府府丞左副都御史擢戶部右侍郎轉左侍郎二十六年卒祀鄉賢祠著有龍河奏稿

家傳

大學士梁清標龍河于公墓表

歲在丁卯余退食時有客自東海來詢之則我友少司農公捐館舍矣聞而大慟泫然泣下遠具東帛作誄以奠越已巳春公之子襄大事千里致書乞余文以表其墓蓋公與余爲同官稱莫逆交者數餘年矣故知公最悉公諱可託字阿輔號龍河贈中大夫戶部左侍郎興凡先生子也齒居亞甫離襁褓時有善

風鑑者一見大奇之曰吾聞人多矣此真令器宜善撫之弱冠補弟子員食餼順治戊子舉於鄉乙未第進士授江右臨川司理不受餽不徇私甫下車有託崇礫殺一案歷諸問官輒猖狂詈多不敢究公獨正色嚴訊鬼蜮立見無冤民無滯案遠近稱快謂公不忝廷尉公後云會臺使者檄董漕事陋規盡革漕課立辦任未比年廉能聲藉甚 內召北上父老遮道泣送立碑頌德至今不衰徵拜給諫公居諫垣號敢言常言諫官與宰相等言責重也其言恤民力則豫徵宜禁飛詭宜嚴徭役河工宜減其言裕國計漕事病以雜費多於正額也錢糧病以官吏利於朦混也起解病以役代官以民代役也其言懲貪酷則革職者任宜速解其言嚴甄別則督撫按之互糾宜重其言逃人之干連則酌議矜全之法行其言訟獄之繫選則無辜戚屬之命甦縱兵極民者則言剝民肥己者則言天下於是食公之德而且多公之言也每奏事 世祖章皇帝目送之歎曰直諫議也已亥充同考官矢公矢慎真材輩出歷官至吏科都諫 上命以卿寺補授尋以父喪歸服闋令以四品秩權工科給事中未幾晉奉天府丞職專校士垂教條選名墨集古大家爲多士式百年天荒自公首闢矣任半載餘晉太僕卿宗人府丞都察院左副都御史封章屢上皆關軍國大計一歲三遷 經筵兩侍越明年晉戶部右侍郎督理錢法釐剔積弊寶源浩乎不竭 賜宴賜蟒 天子時慰勞之又明年晉戶部左侍郎時吳逆蠢動軍需孔急而輓運不絕遂致蕩平公力居多焉公性耿介恥蚤緣以自陳得旨恬然引去天下僉以未竟所學惜之致仕歸年已六十太淑人猶在堂日承膝下歡倍至罹變擗踊哭泣猶孺子慕也家居屏聲歌黜浮靡日攤書史課二子成名門以內肅如雍如公之教也又好周里黨戚友之急儲糧以賑饑造舟以濟涉施藥以療病刊感應篇以勸善其東臥之高致有如此康熙丁卯二月十一日天忽若鳴鼓者三遠邇驚嗟曰傷乎司農公已矣而公果以是夕卒卒年六十七也家世系譜詳墓誌中不復贅嗚乎公歷任兩朝近三十年其事業炳炳不可殫述而忠孝正直之風海內翕然仰之兒童走卒皆知姓名雖古大儒名臣何以加茲爰按狀而撫其大者揭於墓之原

文登縣志

卷九上

人物二

十三

日講官起居注右春坊右中允兼翰林院編修秀水門人徐嘉炎龍河于公墓誌銘

康熙二十六年二月十有一日吾師前中大夫戶部左侍郎文登于公以疾薨於里第其門人徐嘉炎方忝 講筵日侍 天子起居職司記注兼充三館校讎職不獲馳千里奔奠於几筵聞訃之日爲位於公之舊邸哭失聲越明年大葬有日公之子以書來趣爲公誌墓嘉炎其敢以不文辭按狀公諱可託字阿輔號龍河世居文登之大水泊祖諱維哲父諱性篤皆邑庠生積德累行稱於鄉閭並贈中大夫戶部左侍郎祖母贈太淑人母封太淑人公幼而穎異食餼於庠戊子薦鄉書尋中順治十二年進士筮仕撫州府推官推官職司法律公至矢之城隍神及關壯繆曰聽獄者惟在公與明公則我所自明則惟神啓之任事一年案無留牘獄無冤民臺使者檄董漕事咄嗟立辨諸弊盡去巡撫張公亟稱之尋以 特恩入爲給事中就道無貨路人太息稱西江第一廉吏也在諫垣周歷六科凡民生國計知無不言如請禁豫徵請嚴飛詭請減驛傳河工夫役漕糧雜費多於正額錢糧起解每以役代官以民代役官吏朦混收支侵漁多有皆言之鑿鑿得請施行其言肅官方也則請貪酷者速令解任大臣不法則小臣不廉請申督撫按互糾之制又以民命至重而斷獄多文致者往往傳會片詞株連無辜之妻已嫁之女別族之兄弟叔姪請自今後法司嚴爲畫一勿以雖但字面定案 詔下所司如議行是時鎮將率伍多爲劫者公嚴劾將領重申約束盜以衰止督捕責逃人親屬鄰比繫獄瘐死者衆公請酌議矜全自是多得寬貸卽此數大民生全活無算皆公之爲也其施行約略可見者如此公真不愧諫議云歷官至吏科都給事中康熙二年 上命以京卿需次補授尋以父喪歸服闋未上 天子以卿員淹滯凡言路內擢者倉卒未得官反類投閑非崇獎賢能至意遂命公以四品秩權工科給事中未幾乃晉奉天府丞陪京爲國家根本地公職專較士鼓舞振興人材輩出尋進太僕卿宗人府丞都察院左副都御史兩侍 經筵復屢上封事如諫官時擢戶部右侍郎與同官魏敏果公友善魏公有十同說言與公立心制行同也右侍郎掌寶源錢法公詳審積弊釐剔當可錢無甚貴甚賤之患民間利賴之魏公既遷總憲公晉左侍郎吳逆

煽亂軍興旁午公籌畫饋饟夜以繼日賊黨遂平世共稱良司農矣歲戊午 天子思得文學之士以備顧問命廷臣各舉所知公睹嘉炎詩文遂舉以應詔已未得中 御試高等濫膺異數乃嘉炎甫受官而公已去矣公生平恥干謁權要當官而行無不盡職其得罷之故人不知所自來而公襍被就道無幾微慍色既謝政歸年已六十值母太淑人之變猶擗踊爲孺子泣飯舍棺椁誠信無悔其孝友篤摯天性然也居家爲鄉閭計至切文邑濱海地瘠每遇凶荒流亡載道公殖產無幾自官稅暨衣食外每歲稍餘皆儲以備饑連來旱螟率子弟鄉人齋戒以禱旋禱旋應歲不至甚饑邑故有木渚河渡口湧入海濤人多病涉公倡爲舟以濟之自是無溺死者其他興橋施藥費以千百計積累無倦鄉人益稱道無絕居恆課二子讀書不令少間視諸猶子猶己子公嘗誡子弟曰吾所教爾者不僅文章夫士先德行而後文藝若立身一敗萬事五裂雖讀書何益子弟皆拱手聽命故鄉人推家教者必先于氏齊魯文學頡頏吳越公著述甚富所爲文亟爲今大司馬素存張公所稱張公固今之宗工也公以德行見推於魏公以文學見重於張公聲應氣求蓋不介而孚矣家居九載而薨易簣之日天若鳴鼓者三鄉之人共聞其聲公固非常人也哉公生於故明天啓辛酉十二月十三日歿於 皇清康熙丁卯二月十一日得年六十有七娶王淑人側室以張氏子二人長其珩丙寅選拔貢士次其珣邑庠生並能文章有才名皆張氏出女一人適歲進士李公曰蘭次男曇生孫肇錫其珩出其珣等以己巳年四月三日葬公於龍山之新阡茲者誌公之墓務爲傳信無溢稱旁引既所以報知已亦竊自附於昔之無愧辭者若公之懿行固難更僕數至所稱少就塾師狐妖不敢犯及西江決獄奸人託崇魅誦誦問官到公獨俯首不敢道一字夫邪不勝正人道之常此無足爲公異者計公當不以是自許故略而不詳銘曰東海鍾靈西崑發祥于公陰德百世其昌篤生我公温温暨暨筮仕祥刑終司邦計精金有聲大圭不琢元氣太和虞渾周噩爲國元老爲鄉祭酒舌翁南箕望高北斗悠悠我思飭巾待期緯星夜落櫪馬朝嘶海市山精催歸決滌月不離天雲還歸壤書徵史冊行質鬼神勒銘藥石無敵永存

文登縣志

卷九上

人物二

十四

撫州府司理于公清風碑亭記

夫法者聖人之所以領天下也天下致材效節於其法者日得敝焉而遠其所利嗟夫夫豈法之過哉今之數數狀其民者曰賦法曰役法曰刑法而戎兵之制不與役法役人以等役馬以等役舟以等民敝而法無宥賦法賦穀土以等賦庶土者弗等穀土之供爲編銀爲運粟庶土之供爲鑿鐵玉石材木羽毛之目者不可以爲數若夫蠲租之詔恤荒之令文其所狀而已庶土之供歲則有常有司視其物土而徵之則有本色折色之目民敝而法無宥吁賦分而役繁刑其不靜矣虞書象以典刑畀之法士禮至於教威至於兵而厥賦非其所治也今之法乃令州縣歲書賦役之數上之府司理司理爲之責其逋乏之罪而戒其飛輓之時於是實始兼其賦與役之法而理之無違今之法而不失乎先王之法之實明恕而行弗弛其事今之爲天子之吏行法者其孰能之惟順治十有三年以文登于公爲撫州司理公始至無矜容無譁令上下咸和延問州之賢大夫篤學好修之士視民所最病者除之丁酉夏五月 遣使江右採買大內供張之具長吏下其令撫州一以委之許家之市時則治晚子將上言於公曰三里之市吳楚閩粵堅好之資弗出乎其地者不能爲良則非其宜也雜民之所聚彙歸雁集以求其欲不使其僮者奪之使其僮者償之則弗逮其數也且金谿則以其一邑適市撫則以其一郡適市江之右則以其一國適市非古也夫乃慕利而弗變者爲之也今之 上供爲折色者各自其縣爲本色者而獨於三里之市乎於是公亟以其言白之署府龔公龔公召主吏覆故牒則如子將之言乃復下其令於縣各以其故上供又偕諸長吏令之不朽泐之石市之人今而後喜可知也植其石於九達之市公則讓之龔公且曰吾豈其又以德爲名乎嗟夫予乃今知民心之可用也民之敝於法非法之敝蓋無法之敝也上私於刑則民慢於刑上不一其賦與役之法則民悉於無藝之征惟公不依於法而撫之人皆知遠其所惡而親其所利書曰德乃降黎民懷之民之懷公民之質也若夫爲之不成而不居公之德非名也子將乃言曰願有記焉以訓後之行法之吏愛吾民者公諱可託號龍河乙未進士山東登州文登人時 內召北上因並記

焉銘曰印印汝納金水攸同疏汝導汝猗嗟于公我有嘉穀于公藝之其莠田田第之易之公無數我公之數我誰其嗣爾不矜不惰玄石皆皆伊頌匪乖石可食也公可懷也順治十四年治下通家晚生許子將謹撰

柏鄉魏裔介于龍河都諫奏稿序

諫官之職至重也世謂與宰相並知言哉然諫官之所以審度時勢而謀猷單數者不在乎事事皆言而貴有數大事之抒其慮中肯綮而濟乎世務也孔子曰諫有五吾從諷蘇子瞻云歷觀古人之効忠皆因當世而用智不務過直期於必行良以此也本朝 聖治聿新百廢俱興稽古定制尤重諫官 世祖章皇帝建元以來立功業躋華黜天下想望風采者固不乏人龍河于都諫以敏練鴻碩之材際豐亨豫大之會凡所陳奏數十餘疏舉大體而不論小事務實效而不爲虛名以故朝入奏而夕報可人皆服龍河之才思敏慧余獨服龍河之誠懇足以動 主而格天也蓋余嘗與龍河奉 命相視 山陵載馳載驅之間不失小心翼翼之度若夫詞令從容氣色敷愉養積於中而辟盜於外不可強也 上嘉其忠悃茂著特膺拔擢之典晉之卿寺之列豈非知人之明真見大車以載包荒中行可以爲 天子大臣勝其任而無歎與今其疏稿具在刻而布之一以見 國家明目達聰有納言虛受之美一以見龍河樸忠篤棊有尊 主庇民之益都俞之風於此規其梗概倘爲諫議者盡若龍河則諫院之題名可以不愧而諍臣之論亦無自而作也余故樂爲之序

又襄水吳國龍序

汲黯弘大體好直諫而有慧之稱賈誼能屬文通治體而有流涕痛哭之言夫慧也氣節也流涕痛哭也忠愛也知其爲氣節也則忘其慧知其爲忠愛也則善其流涕痛哭而議之者曰氣節可慧不可忠愛可流涕痛哭不可嗚乎噫嘻難言之矣龍河于公官都諫余癸卯從之遊心竊儀之其爲人磊落光大無回思無曲節而存心立論皆於其大者重者如所謂以搏擊爲名高以毛舉爲深察無有也天下大且重者

文登縣志

卷九上一

人物二

十五

一在民生力莫苦於豫徵弊莫苦於飛詭徭役莫苦於夫馬河工則公能言之一在 國計雜費多於正項則漕事病官吏利於朦混則錢糧病以役代官以民代役則起解病公又能言之一在官方守令不善民何以安則議貪酷而尤議革職者宜解任大不法小何以廉則亟重督撫按之互糾而尤重 朝廷之甄別公又能言之然難言者更莫難於律令公以四海生靈畢之於雖但之二字株連繫逮及於無辜之妻已嫁之女別產之兄弟叔姪公之言爲 上爲德爲下爲民天地鬼神式寶鑒之矣難言者又莫難於養兵公以提標兵丁爲盜特爲參處俾天下之爲將者知爲民也母而兵亦知以生民非掾民者矣難言者又莫難於督捕公以逃人干連露處斃獄甚多酌議矜全之法從矜全起見必使無一人于連無一人斃獄而後即安也公之意可謂苦矣凡此者用人所不能用之心開人所不敢開之口公侃侃而言之而朝廷宮府翕然悅受豈非公之氣節足以回 天而不必有其慧公之忠愛足以格上下而不必有其流涕痛哭此誠能兼古人之長而去所短矣公之天性學力豈偶然哉雖然公之氣節忠愛固難而知公者尤難公自乙未成進士起家於豫章司李不十年間身遊青鎖章滿公車而公輔之望以成豈非 九重之上有所知已道合言行而然哉公今內陞發諫草一函付之梓人以志 朝廷用其言之意此不必爲公賀而深爲朝野賀也成直臣之名不如顯直臣之身成直臣之名者名在直臣已耳顯直臣之身者用其言方顯其身顯其身則利在社稷福在蒼生故深爲朝野賀又深爲公賀也

于可託懲貪黜蠹疏

工科給事中臣于可託謹 題爲懲貪黜蠹杜流不如塞源仰請 天語申飭於前 天威信罰於後以鋤積弊以圖治安事臣草莽一介過蒙寵渥外吏未及一載旋即拔置諫垣且臨軒策試鄭重再三捐糜頂踵猶懼仰報無由敢不披竭愚忠以佐 高深之萬一乎謹就臣平昔所感憤於中久欲建白而未敢者臚列數款爲 皇上陳之 一督撫按互相糾劾之例宜責實效也督撫按爲節鉞重臣制人之短長而不爲人所制間有秉節奉公頗知自愛者正已身以正寮屬不難也其有縱恣傲睨爲所欲爲驅寮屬

以填豁壑亦不難也惟是互相糾劾使作威作福尙有白簡足以斥奸雄之膽法云至善然而奉行不實猶具文矣誰肯絕瞻顧而破情面臣愚謂實圖遵行在 勅令各直省巡方復 命之日即將該督撫賢不肖據實入 告督撫之於巡方亦然永著爲例如此則督撫按之賢否年年在 皇上睿鑒之中循名責實黜陟可以漸加且內而科道不時採訪隨事糾參則其賢不肖雖欲彼此瞻徇勢必有所不能孰甘以自己之身家代他人之功罪斯互糾無所容其推卸而節鉞皆知懷惕矣 一署掌之委用宜有定例也從來貪婪之弊至署掌而滋甚蓋以職係署掌不過京兆五日非有父母斯民之責非有功名鼎玉之愛或爲兩司照磨州縣佐貳教官經歷等官當其鑽營求署早已費用不貲一到地方務先求所得以償所費且欲其贏餘焉烏得不百孔搜括貽害地方耶伏祈 皇上敕令督撫按若遇縣治乏員先就鄰近縣分擇其才猷優卓者令之署掌如鄰縣乏才則於府佐中慎選一人以攝之蓋以府佐縣正皆由辛勤而得居此位關係頗重且其聲望又足以資彈壓非甚不肖不必敢墮壞名節委 功令於弁髦也庶委任得法而國體民生兩有攸賴矣 一縣總里書之懲處宜嚴也因田定賦自古爲然豪猾不得耕無糧之田愚弱不得納無田之稅近日縣總里書掌派銀糧操縱在手輕重惟己每遇加派正項乘間飛灑點者賄買宜重而反輕之弱者無能宜輕而反重之年積一年究之多寡不均有無全非今 盛朝功令奔煌官府衙役俱有處分此輩獨未聞嚴法拔除弊滋奸莫此爲甚伏祈 皇上申飭天下縣官先察此輩之積蠹並 飭按臣巡歷所至提取戶房縣總里書一同考核責令縣官務將縣總等錢糧正簿及所存之私底簿當堂投繳兩相磨對情弊了然飛詭五兩以上者徒懲十兩者流徙十兩以上者立絞著爲令甲務在必行則懲處嚴而奸猾無所施其智巧挪移矣 一夫馬利歸官害貽民之苦累宜甦也夫馬一款答應過往兵馬及 皇華使臣向以民間喂養重累貽害近奉 旨官買官養所以省濫索節民力也然法則善而奉行者未必盡善有等貪墨縣官將驛站之銀剝充私囊一馬不養每遇過往夫馬仍派民間而其奸民蠹役之有馬者借端倍索價值嗟此窮民反加重贖伏祈 皇上申飭督撫按轉飭縣有

文登縣志

卷九上

人物二

十六

司敢有重派民間夫馬者卽露章特參或經臣衙門風聞糾劾治以重罪則重派省而百姓亦得少息殘喘矣 以上數款懲貪而務塞貪之源除蠹而務去蠹之大皆從吏治民生起見如果臣言可採伏祈 敕部議覆施行

又預徵苦民疏

工科給事中臣于可託謹 題爲預徵苦民太甚懇祈 嚴禁以抒民力以裕 國用事自我 皇上鼎新大業禔福中外海隅效豷之忱愚賤竭筐篚之貢靡弗樂事輸誠蒸蒸向化以故 國家歲有常貢催徵歲有常數常供之外無多求歲徵之外無豫索上不病 國下不累民何道之隆也乃臣聞一等貪刻有司今歲之徵求未罷來歲之追呼旋迫一歲而並徵二歲焉名曰預徵其苦民太甚之弊臣請得究極言之彼小民終歲勤動所獲粟不數石 公家之輸將輸此也入口之待哺哺此也走市上而糶租糧竟日錢不成千除完公之外餬口無幾且有餬口不足負債轉貸者小民止此筋力竭蹶奔供已屬急公而來歲之追呼並迫不虞髓膏立盡乎使此預徵之稅卽預解大部當此軍興旁午之際猶可以濟急需數年來郡縣有司一年止解一年尙有一年正供不足者更有一年拖欠數年者嗟此窮民間遇災旱皇上如天好生尙議賑議蠲無非視民如子嘉惠元元至意而貪刻有司竟敲扑頻仍殘虐以逞何也揆其心不過多比一年錢糧則多得若干火耗止知肥己罔恤民艱不特此也百姓之身家有數一歲再徵勢必膏血空盡而皮毛胥落也非逃亡載道則輾轉溝壑究至戶口減而 國課全虧矣懇祈 嚴敕各直省督撫按速行轉飭敢有仍蹈前弊罄竭民力者卽指名飛參以憑重處則雞犬寧而元氣可保喘息定而輸將恐後太平郅隆之休於斯可立致矣如果臣言不謬伏祈 勅部議覆施行

又甄別督撫疏

戶科右給事中臣于可託謹 題爲督撫責任重大甄別誼難寬恕懇 敕遵例奏請以共圖維新之化事竊惟盛朝咨警上與下有交萃之責堂廉喜起內與外有並勵之實蓋以誼屬臣子職在靖共卽使

詔戒不及猶當勉以圖報稱况乎 綸綽煌煌率作不怠百爾臣工弗思竭蹶以仰承 睿慮豈理也哉今 皇上旰食宵衣圖治不遑以貪風未改伏莽不靖引爲己辜此堯舜競業之懷天下治平之本也且內閣大臣各陳乃職侍郎以下仰奉甄別慮無不戰兢慄慄精白承休而臣竊有愚見不敢不陳於皇上之前者夫督撫大臣乃爲 國家綏輯兆民鞏固疆土如古十二州牧之屬也寮屬之貪廉地方之安危民生之利弊於焉攸係故督撫得其人則治不得其人則不治假令在內諸臣已經澄敘而爲督撫者自以考核不及或泄泄從事積習相因 朝廷之封疆何所賴以底平臣請 天語申飭俾各據實奏聞其各省吏治果否肅清百姓果否安堵錢糧果否足額圍圍果否空虛兵馬果否飽騰水旱癘疫果否賑救數者行之有效則益圖策勵以膺寵褒行之不效亦難逃我 皇上洞鑒或當若何甄別恭聽 皇上裁定則功過無可掩之形節鉞無倖居之位行見大臣法而小臣廉莫不洗滌肺腸以共襄邳隆之盛治矣

又申飭提鎮將領嚴行約束疏

戶科右給事中臣于可託謹 題爲設兵所以衛民靖寇不宜爲寇請乞 明綸申飭提鎮將領嚴行約束以圖封守之實效事竊惟 國家赫聲濯靈平荏苒之盜奏勦定之功詎不惟兵是賴然而兵以靖亂則民利有兵以滋亂則民實苦兵道在提鎮之申嚴約束將領之熟講紀律而已今天下武臣其爲驅除寇盜秋毫無犯者固自不乏間如恣睢殘虐縱兵驕肆甚至鈐束無法兵卽爲盜者豈無其人臣辦事垣中見江西撫臣張朝璘題爲大盜劫殺一疏內據南康知府薛所習查看得藩司王第魁被劫地方離城三十餘里正值水涸之際去岸遙遠不意羣盜自省襲來大半爲提標兵丁傍舡停泊是以防弁難於稽察等語臣讀之殊不能爲提督鎮臣解也殺人劫官何等重大而乃出於提標之兵丁提鎮一官統轄通省而乃標兵公行殺掠况江右非無事之區逆渠李玉廷嘯聚南贛賊首陳九思金曉等率衆萬餘出沒饒九之間不聞提督發一謀建一策滅此朝食乃烏合之黨未息而梟獍之兵橫行江民何利有此戎

文登縣志

卷九上一

人物二

十七

首封疆何賴有此重臣哉置此不問臣恐將領從此不知檢士卒從此日益橫也今者貪風未改伏莽不靖明屬文臣怠廢職事武將玩愒警備之所致 皇上猶引爲己辜躬自劾勵而爲臣子者反沿其積習不思痛自省改亦烏容此戡亂無功養奸有據之師武臣耶懇請 敕部嚴議標兵殺掠當作何處分並請 申飭天下之爲提標爲將領者富如何練習如何約束以應 皇上奠安地方銳求邳隆之至意庶封疆固而兵將之實效以收矣如果臣言不謬伏乞 敕部察議施行

又杜賚緣以清仕路疏

戶科右給事中臣于可託謹 題爲請嚴濫委之處分杜賚緣以清仕路懲奸宄以重軍需事臣惟爵祿者 朝廷之名器雖一命不可以輕假故書云建官惟賢位事惟能由此言之爵位至重惟賢能者可以當之苟任用匪人上之貽羞名器次之流毒蒼生無一可者臣曩見銓部條例除甲乙榜外凡貢監出身職膺民社者於出序過堂時察其老耄病廢准令遙授不許銓選誠重之也卽外而委署雖云京兆五日當其假權受事百姓之安危軍需之完欠悉惟斯人是賴亦安可勿問其賢與不肖苟且委用以民社錢穀之重任爲嘗試乎臣見廣西按臣李秀委官剝民一疏奉 旨張耀彰著革了任該撫提問追擬具奏欽此臣因細閱按臣疏內稱奸徒盜賣精糧欺心藐法罪在不貸且於本地徵米復折多價忍剝民髓臣恐耀彰無籍聞風逃遁等語臣乃於藩司胡文燁駐劄南寧道臣魏紹芳不能無議焉蓋從來委署例由本道呈詳本司本司轉詳撫按然後撫按據詳批允耀彰既係無籍則其爲僉邪之小人市井之無賴可知紹芳身駐南甯文燁職司左轄詎不知之甚精察之甚悉乃竟公然詳請遽令署事揆厥所由不過受耀彰之賄賂鑽營遂忘耀彰之肆害貽患耳不然何黨援濫引於其先且漫無舉發於其後向非按臣單騎查詢登之白簡其決裂狼狽之狀更不知作何底止夫荒徼何地荒徼之民何民假令所在皆如此濫委剝民則膏竭髓枯其誰與轉餉輸粟爲兵馬資飽騰之地乎彼區區無籍卽重加斧鉞不足深惜臣請將濫委之監司 嚴敕議處並 敕撫按秉公嚴查果其受賄徇私法應加等以爲貪賄濫委之戒臣見

吏部覆經略輔臣洪承疇題爲署官夥棍盜餉一疏議應罰俸一年夫以經略大臣爲滇省新闢需人孔急猶以濫用引咎罰責曾不少寬况監司濫用又不覺發居然倖免三尺之外有是理乎如果臣言不謬伏乞 乾斷 敕部察議施行

又慎律祥刑以躋昇平疏

戶科右給事中臣于可託謹 題爲刑獄關民生之命欽恤召天地之和亟請 敕部慎律祥刑以躋昇平之盛事臣於五月二十五日恭讀 上諭內有自今政務關係國計民生利害所亟當興革者爾部院等各據實條奏科道各官尤當盡言無隱欽此仰見我 皇上敬天勤民皇皇圖治如此其切臣若不俯竭愚誠直據所見以冀裨時政之萬一不但有負職業於臣衷實有未安也臣思生民利害無過刑獄之大而爲生民興利除害亦無過持刑斷獄之官我 皇上敬慎民命凡重囚大案必駁核再三務求法當其罪使官斯職者能矢公矢慎以 皇上之心爲心又何患囹圄之不空虛太平之不早致哉乃臣於治獄之吏不能無議者外而臬司司理或以苞苴爲出入或以情面爲重輕而舞文之吏上下其間致使奸民肆其鑽營無辜受其詐害如臣同官孫際昌疏參江西臬司樓希吳一事職司刑名反借刑名爲羅織此其彰明較著者諸如此類實繁有徒更有甚者內而西曹操獄訟之重任掌天下之刑名有罪者不可故縱無罪者不宜輕死所當明罰敕法加意平反以副 皇上好生至意乃歷見奏獄往往不論證佐之參差不問口供之有無不貼律令概置重典且以爲寧入勿出甯重勿輕若其人果不當死則寬恩自出朝廷而刑部雖失之過嚴可告無罪我 皇上愛惜百姓原欲其持平何嘗許其已甚安可以過嚴爲免罪之地誠如臣同官嚴沆所言只以雖但二字草率了局釀成痼習牢不可破近見兩月以來較之向年漸爲清楚而細查部覆勘語此習尙未脫然夫以四海生靈之命而舉之雖但草率之中此其怨氣之充積爲何如也又讀子輿氏之論王政曰罪人不孥明乎株連繫逮之爲害尤鉅除情罪重大奉有 特旨全家流徙外其餘重辟等罪或應及身或應並及妻子自當照律提解無如外省不敢分豁以圖卸過部

文登縣志

卷九上一

人物二

十八

內又不肯辨別以爲執法每案牽連數十人百餘人不等搶地呼天斃死獄底甚至過繼之子出閨之女再從之叔姪分居之兄弟律例之所不載率皆網羅髮鉗而莫逃夫以事外無辜之民而坐之服流宅居之內此其怨氣之充積又何如也臣愚謂刑者天下之大命死者不可復生絕者不可復屬哭聲一路我皇上聞之必有惻然動念者矣懇請 亟敕內外承問各衙門杜賄屬之私詳供證之口清株連之累明律令之條勿泥成案勿蹈積習實仰體 皇上敬天勤民之心以愛養生齒感召天和將見囹圄可空昇平可致絲萬世無疆之祚矣臣感 皇上虛懷求治據實陳言不覺激切罔避嫌怨伏祈 鑒宥施行 邑人呂琨于司農崇祀鄉賢詩

廷尉家聲舊司農世德長斯民存直道秩祀景風光自昔培深澤於今溯發祥天人應泰運科第擢名場學富希賢業才優華國章典型輝海嶠尸祝滿桐鄉三月袞衣頌期年雉影翔漢南悲藉寇峴首淚沾羊諫草留青鎖賡歌繞柏梁訂謨垂久遠雅度自汪洋平準抒碩畫經筵竭贊襄巍班超九棘懿蹟邁三楊身退含元殿歌承近恕堂棋枰偶對客談笑一銜觴恥效貢公喜樂稱項子良善來恆續綰寵至覺尋常磊落安吾素清明質彼蒼坐忘俗豔淡尙友古人詳任卹輿情洽詒謀書味香雙珠誇伯仲大器羨圭璋詎獨文詞貴驚看行義芳比年瀕水旱觸目苦饑荒漠漠墟煙續欣樂意颺率時昭考訓共被晚秋陽精理邃顏孟揮毫步瞿唐緬懷前哲迥應卜後賢昌大水新門閣赤山老梓桑經師堪百世仁里慰多方禋禮千秋永歡呼萬姓將邦家傳柱石俎豆列宮牆對越儀恭恪陟庭介躋躋守祧何肅肅祀典彌煌煌薦藻工歌夏陳絳器屬商夜來看北斗仰止歎無疆

黃朝鉞字九錫威海衛人承宗子幼隨父慶都任崇禎十一年城破父母伯兄俱死朝鉞同弟朝鐙朝欽爲旗兵掠之而東朝欽年甫八歲爲

老嫗所留朝鉞朝鎧流離瀋陽朝鉞隸正黃旗籍易姓名王世功 國朝從龍入關順治八年入太學文章精通滿漢 廷試皆中首選 特授翰林院編修內秘書院侍讀學士除授之日飛騎東來爲祖母遺以養廉爲季弟諭以詩書康熙六年告假修墓轉通政司右通正提師楚南授都統十三年征雲南奏捷世襲佐領一廕生六品筆帖式一朝鉞天性孝友鄉黨親族尤被其澤減賦廣額邑人至今頌之朝鎧後隸鑲紅旗籍世襲牛录易姓金氏家於奉天朝欽字亮工遇難同祖母謝氏旋里 國朝考授貢監候選縣丞家傳

戚崇進字仲升威海衛人順治戊子拔貢任邵陽縣知縣立徵輸畫一之法罷往日陋規全書外不妄增毫末攝同州篆一如治邵再補雄縣

文登縣志

卷九上一

人物二

十九

雄屬保定瘠邑又當孔道驛供甚煩隸卒恆暗簽殷實以供役崇進曰國家驛騎盡歸官養原以軫恤吾民擾民非立法意有私索者以三尺治之自是無敢以折乾借馬爲詞者雄東南窪田近河下流得隄乃可耕而隄址與任邱連界兩縣相諉歷數十年不成崇進與任邱知縣劉果分任之隄成饒穫者數千家雄人勒石頌德擢工部虞衡司主事

敕督夏鎮河閘監蕪湖兩部稅務兼理琉璃黑窯兩廠廠政一清管京畿內外玉泉河道適 鑾輿至問河道源委及修濬年月應對稱 旨遷屯田司員外郎陞刑部雲南司郎中謹視爰書據律斷獄凡可矜疑者務求開釋惟求其生不得者乃坐之在司四年無冤獄出守淮安府淮安爲江南大郡衝要難治又會康親王平南還丁旅數十萬衆取道

淮安民甚恐崇進發庫金令民販鬻又載羊酒於數十里外迎勞諸將
陳地方疾苦王曰此賢守也即日揚帆去會霖雨水溢河工告急往來
河干設法堵築役竟而民不知水平查湮沒衝壓者山陽等十一州縣
皆被災繪圖請卹淮人銜德懷惠歡聲載道以積勞卒於官時康熙二
十年三月日也祀鄉賢祠

生員叢
煜杲採

阮述芳字岸夫威海衛人順治戊子副貢除揚州府河防通判穎悟過
人爲邑風雅總持遨遊吳越與黃仙裳魏環溪諸騷人倡和晚年告歸
陶情詩詞孳孳爲善著有南遊籟生生果同善錄治河條議等書行世

詩載鄧漢儀詩觀

舊威
海志

文登縣志卷九上二

人物二

張松字木公太學生候選縣丞少負奇才長遊京師爲漢陽熊伯龍所推許一時文譽大噪旋里後置家塾捐費延師族黨之窮約者咸就業焉嗣子宿煥諸生孫裕寬乾隆丙辰 恩科舉人家傳

許任奇字華先諸生父其奏諸生母馬氏父母早亡無力歸窀任奇偶讀家禮始悔葬親之晚即時卜兆東山築室墓側蔬食飲水永絕鹽菜負土成墳夜夜號泣三載如一聞者墮淚學使勞之辨旌其門曰孝行可嘉墓碑廬墓處在甘泉都九里下冷家村東南靖海廩生常元素過之題詩曰空山寂寂鳩鳴幽小碣苔深字尙留無數秋山動秋思孤雲落

文登縣志

卷九上二

人物二

一

處起潮頭

王起泰性樸誠訓蒙養親能得歡心親歿哀毀幾斃鰥兄無倚奉事不衰生平以禮自持無戲詞惰容施藥勸善不要聲譽早歿無嗣里人哀之祀忠義祠王志

王啓瑞字麟章威海衛廩生祖三鯉明時以明經任安東令父者翼以明經任涑水令啓瑞慷慨好義年十三有某官買同族爲僕啓瑞遺書切責某官咋舌曰此子不可犯也折券謝過順治間軍當民差苦累莫訴啓瑞赴憲申辨不憚勞苦經年始雪軍困以甦土豪某武斷一方道路側目啓瑞挫其鋒斂不敢肆復以恩結之君子謂彥方劇孟合爲一轍焉子毓生字懋功諸生性篤孝友謙冲忠厚與物無競御僕隸尤多

恩義敦宗睦鄰訓家有方子士任官福建巡撫啓瑞父子並贈通奉大夫福建布政使舊威海志士任字咸一 國史有傳子兆鵬字程九雍正乙卯優貢

宋啓元字子開首貢龍光仲子龍光性剛方博物能文屢試不第啓元刻意力學年十一遊泮崇禎壬午登賢書叔母兄嫂弟婦從弟婦皆寡居啓元竭力盡心生則與田產死則給含殮代諸孤輸稅十有餘年任利津學博三載告歸性喜吟詠得唐人遺意王子志著有涉園詩懷涉園雜著共四卷

宋之樹字鶴千啓元孫康熙乙未進士任山西猗氏縣知縣積學有素雖名登仕版不廢誦讀有注釋二鄉亭詞徵引詳明足資風雅家傳

文登縣志

卷九上二

人物二

二

呂瑋字璜甫贈監察御史鄉賢元和子順治丁酉舉人授江西餘干縣知縣單騎之任家累皆不從禮士愛民凡有關風化者皆次第舉行不三年以廉直爲上官所齟齬鬱鬱不得志遂以疾歸圖書數卷外絕無他物至孤山不及家九十里而卒祀餘干名宦祠本縣鄉賢祠家傳

餘干呂公去思碑記

不夜呂公學宗洙泗才雄韓歐以巍科棟選來令餘邑未三年而致政合邑若赤子之去慈母而不忍於是謀所以紀遺愛者則在勒詞片石而以語於不佞藻藻候選里居數載教澤敢曰不知而文采不宣則非能言侯者故與其爲吾言不如言合邑之言而已矣其言曰吾儕何知但知我侯之清介自持禮士愛民爲前此所間有爲後此所不可無是言也非沐浴於深仁厚澤者未有知其誠然也餘邑自秦置縣以來賢侯屢出若杜若竇若邵政教之善則一時風俗人才理學事功如趙忠定柴南溪饒雙峯吾祖弋溪公及蘇雲崖張古城章冠山李及泉諸先生從祖文敬公玄毓公輩遂表江右而特著 國朝定鼎甫三十年而八閩變起餘干適當其衝凋敝之甚雖善政善教未易卒復其舊癸亥春我侯呂公本慈良之性起瘡痍之民暮餽懷乎四知催科寓以撫字蔬薪概從時值鄉落毫無取辦與諸士約期會課細閱詳評不以寒暑而輟嗣是建學宮修邑乘凡有關風化者次第舉行又新縣堂以出政令輯城垣以固疆圉創營署以便兵民清街道以利行旅事可一勞永逸者則毅然身任而不辭且也折重囚每爲求生旌善良不輕許可蓋其爲人內明而外恕故望之藹乎其可親而所可者卒不徇人以爲不可所不可者必不偏

聽以爲可假侯治及瓜期其善政之得民當倍於杜邵諸公而善教之入人行使理學事功蔚然挺茂上繼乎先世之隆乃侯性廉靜值多事之會不樂曲意以任厥職遂解組請休行李蕭然圖書數卷外絕無他物嗟乎維越之水侯洵足况矣夫侯方以廉能見重於當事以仁惠見戴於下土治行爲江右第一內召超擢有可指日侯者顧乃勇退罔戀眞彭澤後僅見而已雖然侯之深意豈誠厭勞求逸乎其歸也蓋尤思倡明聖道裁成後學宏教澤於無窮云爾乃合邑則以我侯爲前此所不多觀爲後此所不可無者始而匍匐借寇繼而班生之舟欲仙共立石以紀明德藻能以言盡侯乎惟是述合邑之言之意以壽諸石俾後之誦斯文者恍然親沐其休光云侯諱璋字藩青山東文登人

康熙二十四年年家治晚生胡思藻撰文

呂琨字星石瑋弟康熙壬戌進士授雲南南甯縣知縣時當兵燹水旱之後彫敝特甚琨衣粗食淡舊例所有陋規盡革民害除而頌聲作擢監察御史凡有裨 朝政者知無不言有星石奏議一卷許汝霖序曰星石令滇南五載爲賢有司第一擢侍御史不激不隨從容慷慨凡人所不敢言不能言者熟計而善言之 天子諒其忱朝報夕可而中外之喁喁然想丰采者無不目爲祥麟威鳳嗚乎星石非眞御史哉歷通

文登縣志

卷九上二

人物二

三

政司右通政使有山東草滇遊草燕邸草甬江徐文駒曰星石詩大率清眞宛轉洗盡鉛華有孤澹之思沈摯之情有擔當世道撐拄天地之骨有先憂後樂胞民與物之心以故海闊天空山飛海立不雕琢而自工不安排而自健其爲當時所重如此卒祀鄉賢祠

家傳

興化李栢星石奏議序

予與秦中王十洲爲癸丑同籍交最深自十洲令文登以循卓入都爲予言文登星石呂公爲人深沉果毅殆有德以濟其才與識者細詢之亦予己酉同籍壬戌成進士者也以隔省未謀面因十洲始得相識而交好亦如十洲於今垂二十年矣夫士君子當未可以言之時輒慷慨議人家國事及身肩厥任每遂巡畏縮而不敢言又或言之未必可行即行矣而非國計民生所係則亦何藉乎有言此皆由德不足以先之而才與識又莫能相副以故非仗馬寒蟬卽模稜苟且往往然也星石昔宰滇之南甯於地方事宜興革井然間有阻於時勢未悉舉行者莫不經營籌畫於中以竣之異日故一登言路卽以丁糧入告敷陳鑿鑿蓋就其見聞所及實有可坐而言起而行者不欲以紙上之浮文姑以塞吾責焉耳古者御史掌六察首稱察官人善惡而公之劾奸慝肅官箴者有焉次稱察戶口逃亡賦役不均而公之編審丈田造福於民者有焉至杜倖進以收眞才查冒籍以清試典廣 皇恩以疏正途卽所謂查茂才異等者也廣賑粥之期陳救荒之弊卽所謂察農桑不勤倉廩虛耗者也若所謂察妖猾盜賊黠吏豪宗兼并縱暴而公疏中爲積貯察濛混矣爲驕兵察強橫矣爲覆審察拘牽矣諸所立言皆不恤忌諱而又不稍踰越乎

六察之外人服其才與識予謂必有德以先之孔子曰有德者必有言非與且御史雖職司糾彈而朝夕所共理者法司之事居多公掌河南道爲御史領袖悉心核議每當秋審獄期與同朝諸君子矢虛公以察冤抑所藉以存活者無算非有德以濟其才與識者豈易臻此今公已內陞言事畢矣彙疏稿付梓丐序於余余讀而嘆曰我皇上臺省一箴所諄諄訓戒者公皆身體力行潛符而默契焉唐故事御史以鷲羽飾車謂鷲能見魚於泉下以象御史能察隱微覽公之疏足以當之矣

新城王士正呂星石詩稿序

吾鄉星石呂君次其詩問序於予曰某不知詩問爲之以適意耳惟先生取而裁之將藏諸家乘俾後之人知我志庶幾無忘諗予與星石交頗久且嘗共事西臺知其爲人初不知其工於詩也及讀之見其原本性情溫厚悱惻忠愛根心而恬曠自足一如星石之爲人夫詩以人傳人有志而辭各指其所之其存與發未有不相肖者故曰仁義之人其言藹如也予嘗有唐賢三昧之選於本原之際尤致意焉今星石固曰吾適意耳予謂適意卽詩之所爲原本者是書曰詩言志志也者意之決而有爲者也志帥而氣充則意協而法立可以超有象而入無垠陶之恬澹杜之忠愛李之曠達韋之瀟灑皆是物也夫有古人之人而後有古人之詩世有如星石之爲人者自知星石之詩矣否則言唐言宋皆郭郭耳予與星石交既久而星石出其詩乃最後此猶所謂善藏若虛者則其專力於原本以自詣於必傳之地有由然矣豈若世俗爲之詩者哉

呂琨南甯署中感詠并序

余登州人也家傳清白務期資父事君幼習詩書頗識保民如子今者筮仕茲土彈丸之區役衝賦重且兵燹疊罹水旱頻仍供應煩而凋敝殆甚加以前此八九年之捏報虧空萬狀叢脞千端交代未楚甫兩月而參罰隨之欲急公而難爲下欲恤民而難爲上懦則人玩烈則人怨動多掣肘目擊心傷計惟於自身刻苦衣粗食淡廢寢忘年凡舊例所有供給縣衙陋規盡革而究無補於民間之

文登縣志

卷九上二

人物二

四

萬一也感而成詠因以災石焉

萬里來官澁弗禁瀟湘江上淚潄潄一團茅草誰爲斬百結蜃樓何處尋無藥可醫瘡起肉有丹難點石成金我懷荼苦終奚補空抱先民不忍心

又南甯署中感詠

甲戌三月閱邸抄行取得邀 兪旨行將去矣瞻念茲邑感而爲詩以志別焉

四載馳驅萬里身低徊往事歎勞薪憂民有淚都成血媚世無能莫效顰簇簇亂絲方就緒稜稜枯木可知春此行縷縷心難了望賢侯事業新

又曲陽諸公暨紳士者庶遮途致餞詩以答之

祖帳何曾辱下陳陽關一曲暗傷神寮朋詩卷吞聲讀父老壺漿滴淚親幾本蕙蘭留別署連朝風雨洗征塵愧非慈母民猶子雜沓輪蹄辨未真

又行取北上途次卽事詩

萬里承恩敢後期征塵冉冉病支離問餐野店黃梁夢屬和新篇白雪詩藥裹頻翻須老友星軺暫歇弄嬰兒宦遊五載囊何有兩袖清風答

主知

呂廷鑄字相臣餘干縣瑋孫康熙戊寅拔貢雍正初由教習選授浙江石門縣知縣修舉廢墜事之不便於民者務去之安良除暴不畏權勢人稱爲白面包公云

家傳

邑人宋允和石門縣知縣呂公傳

文登呂氏自順治丁酉舉人餘千知縣諱璋康熙壬戌進士通政司右通政諱琨兄弟以文學起家代有顯人遂爲著族至石門公則餘千公孫也公諱廷鑄字相臣儀貌嚴重性坦豁無城府好面折人過人咸推爲亮直康熙戊寅以選拔貢成均旋補鑲藍旗官學教習雍正三年選授湖南宜章縣令同選劉某得浙之石門及引見公體貌豐偉音詞宏亮上顧大學士曰呂廷鑄著調石門而以宜章易劉時憲皇帝御極之初勤求吏治覈名實剔姦弊膺民社者非才力過人不稱職石門故劇邑案牘如山有十餘年不結者賦亦稱是前令數十人皆以罪去公之任修舉廢墜日旰不遑食夜則秉燭理簿書手署口決侍者疲不能支猶據几秉筆精神不倦不半載而案消賦清政有起色諸不便於民者皆務除去而尤慎於庶獄不畏勢炎狗請託必平心易氣以求其當督標千總韓某制府之妾兄也制府時兼轄政韓巡鹽至石門倚勢作威福權甚赫無敢校者其兵以烏銃殺平民誣爲鹽梟韓恃符左袒公爭之愈力或勸公曰城狐社鼠不可忽曷少容借之公曰爲民父母視其冤而不理如天良何事如齟齬不過罷官歸吾不能以民命易一官也卽庭訊公嚴毅坐堂皇衙胥執杖林立堂下諸刑器畢備命千總進千總飾戎裝桀驁入其從卒爲設坐於堂之東偏千總揖而坐公正色曰汝率兵戕我民罪員也不令汝跪顏面多矣此法堂有汝坐處耶叱去其坐令立而聽訊千總色沮氣餒拱而立唯唯聽命而其殺人之兵亦股慄服罪既具詳下杭嘉湖三府會審公堅執前詞三府知不可奪遂定讞聞者莫不咋舌遂稱爲白面包公有以四字揭於通衢者他日謁見制府制府笑曰白面包公來耶由是顧待特殊浙俗令有善政百姓則進斗斗以錫爲之方廣徑尺餘插花其中具香案鼓吹一人戴而跪進之官受之懸於堂上以誌愛公宰石門凡六載堂上斗滿循聲大著而東莊一案士林尤服其平允東莊者呂留良故居所謂天蓋樓也雍正六年曾靜逆書事發詞連留良留良故已久詔籍其家天威震怒禍且不測當事者以逆案重情懷懼不知所爲公方臥病杭州司馬柏某銜制府命至榻前促之行公力疾起曰事有定理何張皇爲也卽偕

文登縣志

卷九上二

人物二

五

與俱往至則諭東莊呂氏曰爾勿驚擾國法雖嚴無格外害人之律吾自能區處爾等乃令婦女幼小別居一室而使役夫守其門無敢擾者其器物一一親籍之纖細不以委人書役皆立戶外無敢至庭前一步事畢肅然留良故士族子孫文而弱粹遭奇禍戰栗無人色公從容訊理審年庚條供詞察監繫事詳盡不以威勢恐呵之邑人曰非得此好官呂氏殆矣其他賑災救火諸善政不可枚舉公以亮直名聞於時謁上官言事據理敷陳時或抗違上官亦不之罪制府嘗有所興置需鉅款而無所出下諸令長籌之衆莫知爲計一日羣集將進謁請公先謀公曰易耳少頃自知之及入制府詢於衆衆遂巡無以對制府色不怡目公曰於汝云何公曰某能辦此制府喜曰我固謂呂令才諸君不及也問其指公曰如此鉅款不降於天不產於地不支自官帑有司又不能以家財佐計仍向衆百姓取給耳大人第無畏賸民有何難籌制府大笑遂寢制府李敏達公也公以勞致疾疾漸不堪繁劇力陳病狀告歸家居六載乾隆改元以疾愈赴都候選卒於京師子六人皆俊才有文譽乾隆丁卯優貢潤蕃其尤著者宋允和曰公歿百餘年鄉校已無道及之者邑乘亦不載其官蹟則文獻無徵不必世遠年湮後矣光緒丙戌秋九月獲讀公子潤蕃所著行狀詮次之以爲公傳甫脫稿朔風振籜戶外颯颯有聲如披漢史晤強項令也

呂潤蕃字孝衍一字友徐廷鑄子乾隆丁卯優貢生官樂陵縣訓導工

詩古文詞其王南溟墓誌先君子行略敘事得史記法詩格清迥得唐

人三昧昆季六人皆雋才有文譽潤蕃著有毓燕堂詩文稿弟潤苾字

孝脩廩生著有慕堂遺草潤邁字孝超諸生有學農堂詩稿潤芬字晉

夫諸生有少海遺稿並採入山左續詩鈔

廩生劉秉鏐探

毓燕堂文集自序

東海之中有弱水焉其力不能浮羽舟楫所不通也而史稱蓬萊方丈瀛洲三山諸仙人及不死之藥皆在去人不遠然患且至則船風引而去望之如雲夫既望見之矣非不知其處也而終莫能至豈情不軌其至耶抑水之阻而風之引爲之耶余少病怔忡長益劇瀕死者數矣自制藝外間效爲古人之文率以是不能竟其學後遂棄去今豁齒頰頰爲二豎子苦無虛日因檢舊所爲者得寥寥數十篇其不足存固也然昔嘗致力於是非望之而不見不知其處者也其卒不至果孰爲阻之而孰引之耶嗟乎人生富貴勳名皆有物以司其間其成也或翼之其廢也或撓之固不可以人力爲也文章學術何獨不然而世之得天而強有力者其論或不如是訂次之下爲悲慨者久之因書之以諭世之同是病者而有以驗余言時乾隆四十一年楚巖山人孝衍氏自識時年五十有五

又毓燕堂詩自序

庚辰歲秋予嘗哀集舊所爲詩序而存之距今十有五年矣茲復益以近作而刪其舊之半命姝崇錄爲二卷棄之筥篋計若干首蓋予之爲詩自童弱而未得古作者之旨率皆不足存三十以來又困於疾其間稍得休息歲不能十之二三而人事遭際橫出相干幾無甯晷又自病後遊跡旣圓兼乏良朋之追歡登臨贈答之辭絕少故所存止於此然性質簡寂懶與世聞澄曠淡逸之思發於艱危落寞之餘者未嘗不自得也今老矣病日益風燭中人不能定日暮兒子嚙幼小稚屬以紙筆即長亦恐爲陶家男兒未必能讀父書嘗歎同年魏九苞爲其世父觀光先生梓制藝求之近今不易得予非必以此望諸猶子第以崩崖斷壑間松根石骨物色或憑世容有知我者不然孫曾輩有能識數字道及先人者不至數典而忘其祖終不然或糊破壁覆醬甑或斷爛摧燒天地一浮漚古賢達之姓字湮滅不聞於後如冥漠君者奚

文登縣志

卷九上二

人物二

六

管恆沙豈况於予又豈况於予之詩亦任之而已

福山王善寶少海遺稿序

士之負奇好異超然塵壚之外而不顧流俗之毀譽此其中蓋有不可一世者矣吾友晉夫呂氏自幼好吟詠伯仲倡和相師友也而以其餘力爲舉子業既列諸生旋復以病自脫棄之不顧此生已絕進取之階而諸兄不以爲非蓋亦有相視而笑莫逆於心者予於乙未丙申冬兩至其村居杯酒談詩因而款洽且結以婚姻晉夫自淮上歸貽予詩數紙見其磊落英多有不爲古人所牢籠者予收而藏之行篋不敢遺後予客燕趙聞晉夫已作關外之遊不通音耗二十餘年予方欲質其所業而未得一晤爲恨迨予歸而晉夫已下世矣哲嗣收輯其遺詩手抄一冊見貽並淮上詩亦不登然則塞上之作其遺失者可勝慨哉一生負奇好異不思表見於當世並不思流傳於後世此其胸懷爲何如耶時予就養兒英官署命其刊而存之不使其一段精光埋沒於荒烟蔓草所以答知己者如此而已適見山左續詩鈔登晉夫詩九首多所改易並律句中兩見榭葉字可謂疏略矣亟正之以存其真面目也

又呂潤蕃序

余弟晉夫幼喜爲詩及長益篤然不輕與人言詩亦未嘗以其詩示人獨私竊與余相質以快其所得而祛其所未安欣欣然相樂也丙午秋將北遊乃哀集其所爲詩謂予曰兄老矣弟亦踰艾今將出松亭遊數千里外歸期未可卜也顧念生平他無足置意獨昔嘗寄情於是不忍棄之兄爲我道其大凡留以畀余俟他年歸而訂焉余聞之愴然者累日嗟乎予兄弟少讀書規進取凡世人之所爲皆習爲之以無所就今悉棄去獨於詩古文詞未能盡卻也晉夫之詩其精神功詣之所深嗜而獨得誠有不容泯沒者夫人一藝之成苟期於工且久要皆極其心與力之所至未可以易爲者予昔與孝修孝超晉夫共治詩時晉夫年最少常言詩以優遊平中爲貴然不剖古人之心而入之後人不我許也不剖一己之心而出之世人不我顧也故其爲詩思獨摯而冥搜遐取一字之討或至數易憂憂乎惟陳言之務去用意之過磊

何信屈幾不能自適然卒歸於自然如蒼林邃徑峭壁幽溪未嘗不在通都大邑之郊固非驅車至鬼國者篇什俱在知言者可覆按也丁酉後既析居家計日削不恆理舊業然每變服入市取鹽酪米薪或蓑笠徒跣履田畝與傭工牧豎相勞苦歸即仰臥跣足手一編呻吟不休有造述輒瞑目潛息若暈去狀或走失行步飲食誤七箸性復喜飲酒期必醉醉則目弩鬚張氣勃勃不能下益傲然自負縱論古今人詩文得失辨議獨出聽者瞠目視莫能相難也予何以序晉夫哉亦即其志之期於工且久所謂深嗜而獨得者爲質言之而已噫憶昔讀書時予兄弟自相師友秃毫枯硯寒暑共之有片語隻字之獲無不切以相商者外人弗能窺也今孝修之亡且二十年孝超亡亦二年矣對牀之約獨予與晉夫兩人在耳今晉夫以垂暮之年蒼顏華鬢過 帝闕出雄關適朔漠之野囊空如洗而氣不挫顧予益老且病夕陽風燭年壽不可預期晉夫善爲之倘他日歸有所得解裝釋蹻之餘不知更得相質如曩時否也

呂肇齡字岐封歲貢生潤蕃從弟父廷鎮諸生有學行學者稱靜園先生肇齡幼穎異讀書日千數百言及長博覽羣書肆力詩歌南遊吳中所見益闊詩益工後官萊州府學訓導張問陶時官知府以詩相契雅愛重之問陶解官贈肇齡詩有鴻篇易鑄丹難轉他日郵筒與細論之語著有觀古堂古文詩刪啓堂隨筆各一卷子沛惇字澄懷嘉慶庚申

文登縣志

卷九上二

人物二

七

舉人任館陶教諭博學多聞著有聊齋志異輯註福山王延慶序曰余官萊州日夕從岐封先生之後奉杖屨領緒論澄懷能世其家學最稱

博洽人矣

廩生劉秉鏐採

平原董元度觀古堂詩刪序

乾隆丁卯夏秋之間與吾友靜園先生共硯灤源舉業之暇旁及風雅每爲心折豈意聲沈響寂雲散風流廿餘年偶一念及輒欲酸鼻側聞故人有子名振東溟惜雲山阻絕未獲一覩譏造是用悵悵耳丁酉秋謁予東郡冷署中恂恂執禮出所爲詩若干篇乞爲點定予披閱之雙眼頓開回環雜誦而不能自止此豈惟才分之優蓋亦得之庭訓者素與其古體原本騷選流露性真異於時流之取殘汁賸臍互相遷絮者而七律一格尤爲擅長其春容之度和平之音已駸駸入作者之室和聲以鳴 國家之盛將有望焉予老矣一官匏繫孤窮無聊倘異日者東遊海上登蓬萊閣歷天水郡行與子操琴載酒一倡而三歎之詎不快哉

又呂潤蕃序

觀古堂詩者予從弟岐封之所著也岐封幼穎敏讀書日千數百言及長益務爲博覽而肆力於詩歌有所造操管立就皆瞻麗可喜羣從中莫能如之家故無腴產以授經給食養自吾叔靜園先生歿後兄弟三人各有所營業母老而岐封獨任養不以律兩弟今二十餘年無幾微見於色辭此眞人所難者始岐封在巽序時試輒冠軍名故藉甚然與人交內泊然而不立崖岸以故郡邑之賢而文者皆向之繼應人聘之吳遊數千里外所見益濶所得日益進而詩亦日益工顧念母逾老冬夏晨昏之節不可以久諉諸

婦遂辭歸今數年矣則其志之所存者可知也今其子沛惇以丁酉選拔官司諭有微祿又地故鄉邑非吳比令岐封就其子館陶養雖薄而首稽之奉舍館之歡其視從事筆硯間餬口於四方樂當不可以道里計且以子之俸奉母三世雍豫雖遠猶一堂也而岐封舍不顧獨依依於母輒轉圖畫愁思慨歎即羣居燕閒片詞偶語之所及未嘗不在於是噫其可感也已今歲秋試岐封將赴濟南欲因其詩授沛惇屬予爲刪而序之余惟岐封之詩人已知之又弁以曲江太史之言予何益焉顧予所不能默者岐封之惓惓於養母此詩之本也然岐封志在養而未嘗數見於詩者何也圖之深固有不能言者在也至性之地歡愉與窮苦兩不任之豈務夫自見也者而沾沾於篇什以審其工與好哉予旣爲定其尤者若干首因質言之以論夫世之知吾岐封者

呂又新字學山禹城訓導思永子諸生有嚙語亭詩集沈香餘序曰學山愿恪士也初攻舉業困棘闈者數四出古北口走關外戴滿頭雪與邊風塞月相撐持宜其詩之近於騷而涉於怨乃余讀其詩魚魚雅雅哀樂悉得其平蓋詩如其人矣

家傳

呂肇齡嚙語亭詩集序

詩者性情之物也有真意自有真賞然世之地望高者每得有力人爲之延譽則名噪一時往往傳誦之不已而一二孤介之士深心獨造有所譏述竟且鬱抑焉而泯泯無稱此流俗之評品無與於性情者也吾弟學山秉承家學淵源有本舉業之暇留意吟咏纏綿宕往之致充盈於筆楮信可嘉也昔吾叔秉鐸

文登縣志

卷九上二

人物二

八

源陽弟拈毫吮墨日往來於華山灤水間烟葉朝裁風絲晚織每多驚人之句晚歲棄帖括出雄關荒寒朔漠之區遨遊山水凡寸心之不自釋者鬱於中而作於外或爲短章或爲長什無弗琅琅可誦此豈黏頭綴尾以誇多鬪靡自失其性情者所可同年語哉余以學博乞休杜門養疴弟持其所爲嚙語亭詩丐爲點定余揀其可存者若干首謂當自堅所守勿惑於流俗評品後必有總持風雅者擊節而流傳之因序其簡端如此

畢麗台字伯景多馨子康熙壬子恩選貢由教習除雲南楚雄縣知縣一錢不染興學造士招撫流亡督撫褒獎有心術人品俱好之語行取刑部主事廉明仁恕多所平反轉本部員外郎監修律例酌定成書屢蒙 敕賜綾字詩扇蟒緞表裏又 召太和殿賜茶賜食優寵迭加以

脾病致仕

家傳

畢琛如字藍甫增廣生幼孤事孀祖母叢氏母董氏備極色養嘗負米五千里外星夜奔馳未兩月卽返後祖母及母歿喪葬皆取法家禮逢

忌辰及祭掃哀慟失聲無異孺子貽贈奉政大夫山西澤州府同知祀

忠義祠王

邑人賽璋畢公暨元配叢氏墓誌銘

公諱琛如字藍甫九歲而孤辛勤勵志為邑增廣生事大母叢氏母董氏以至孝聞晚年閉門課子遇人之阨不憚多方以解之享年六十有七配孺人叢氏明工部尚書蘭公元孫庠生大良公次女糟糠駮塚克相夫子家道頗昌事姑謹御下寬徽德懿跡不可枚舉享年七十有九葬金陵山之陰銘曰惟公殖德賢婦媿焉祿也匪瞻慶也則延蘭桂森森瓜瓞絲絲佳城毓秀億萬斯年

畢鍾姬字亮四琛如子歲貢生正直端方淹通經史著憲齋詩文集詩

經音叶左傳得雋唐詩得雋諸書贈奉政大夫澤州府同知歐志

邑人賽珠憲齋先生傳

先生姓畢氏諱鍾姬字亮四別號憲齋蓋其生平慕王陵汲黯皆以憲顯名漢世故自署其齋曰憲而人遂稱憲齋先生云為諸生時受業於家伯父勺海公刻意向學精曉五經其文以左國史漢唐宋諸大家為主屢上賢書不第康熙戊寅貢於鄉邑人士之延師席者奔走其門先是家伯父與叢公堯山旗鼓文壇頗相當更執牛耳邑人規撫之不敢違其後兩公歿文體日靡一變而油滑再變而尖酸而幽僻而支離割裂先生奮然起據皋比而麾之風生嶽峙如絳侯勃入北軍大呼士皆左袒迄今操觚家釐然復歸

文登縣志

卷九上二

人物二

九

於正者垂三十年先生歿後長子爵登康熙甲午鄉榜季子爵以拔貢生踔厲詞場博學強識稱東海文獻克世其家學云

自注雍正甲辰冬明府王公召余分纂邑乘余為先生作傳擬繼堯山勺海兩公後而先生季子爵實主邑乘事以嫌辭不可乃錄一通附畢氏載之家乘而余亦謹存其稿後之君子起而任修明之責者其以余言為不謬乎

畢爵字郇雨鍾姬子康熙甲午舉人截取知縣刑部觀政選有期以弟
爵卒於家計至棄官歸友人在部者代為投牒就教職選單縣教諭在
任六月即告歸訓子姪成名教授生徒亦多成就性和易坦率胸無城
府人樂就之卒年八十九家傳

邑人劉儲鯤菜花園居感懷寄畢郇雨詩

數行衰柳抱龍橋殘照西風魂欲銷吾道非與嘲兕虎頭皮老矣混漁樵千年事業知何似一第辛勤不
自聊記得酒壚高唱
處竹枝聲裏雨瀟瀟

畢爵字子彤爵弟早歲游庠博聞強識北平黃叔琳督學山左與兄爵

稱文登二舉取入白雪書院肄業雍正癸卯拔貢甲辰中副車性嚴方正直義所當爲毅然自任扶弱拯困里人德之晚年績學益富爲東方文獻雍正乙巳志其手訂也著有十世草堂今古文蠡勺詩刪載酒題襟諸集學者稱十一峯先生贈奉政大夫澤州府同知家

門人劉儲鯤澹菴畢公墓誌銘

東國文獻十二峯先生卒遠近學者咸齋咨涕洟謂天不憖遺我公使我有耳無聞有目無見也鯤廁門牆辱知遇最深聞訃驚惶欲執筆述公者屢矣俯仰悲悼不就一字旣數閱月嗣君薰泣而請銘鯤不敢以不文辭爰按狀詮次如左公畢姓諱壽字伊蔚號澹菴行十二故又字十二峯云自公始祖漢初避亂占籍文登東南斥山至八世祖諱猗始遷居邑東關七世祖諱達六世祖諱元祐萬州學正高祖諱其性曾祖諱多寵俱邑庠生大父諱琛如增廣生孝行載邑乘祀忠孝祠考鯤齋先生諱鍾姬剛方灑落文如其人康熙戊寅歲進士妣趙孺人誕公舅季二人伯氏九嶷諱壽康熙甲午科舉人公其仲也公生有夙慧讀書一目數行甫三歲能背誦大學唐詩九歲讀葩經音叶不差稍長爲文奮筆落紙篋篋然如蠶食葉諸先達皆器重之辛巳年二十補邑弟子員再丁艱服闋科試領批借伯氏食餼辛卯入白雪書院論交二東名士所聞益進甲午伯氏登賢書當是時諸同門友相繼穎脫獨公顛躓名場窮愁著書益堅不懈淡如也癸卯郡國舉孝廉方正之士當事者擬薦公公固辭遂以是歲冬拔入上雍時年已四十有二甲辰二月應癸卯正科鄉試中副車乙巳赴成均考到丙午講學瀛洲書院傲蘇湖教授齋規士風丕變

文登縣志

卷九上二

人物二

十

己酉將赴北闕不果於是嗣君燾一發命中公獨僥得復失然公亦自是無意進取矣總公一生自幼府縣試試輒冠軍然困於童試者十年比歲科試亦試輒冠軍然困於諸生者又二十餘年前後五膺薦薦踏省門十一次終不一第齋志而歿嗚呼其可悲已公事親色養無違執喪哀甚如不欲生時節薦新忌辰上食風木餘哀輒泫然流涕者久之兄弟友愛自爲知己兩家兒女更衣并食家人中饋勉有無男卯而學女笄而字於吾邑中最稱有家法廣祭田若干畝春秋上冢禮畢聯綴族人餽餘合食醉飽歌嘯歲以爲常族中或有忿爭不輒鳴諸官咸來取質平焉尤善處人骨肉間能見事未然而預消弭之公終不自言人亦竟不知也前後受人託孤數家皆風雨雀鼠廬傾巢覆之時公隻手撐拄奮鬣灑血曰有我存終不使寡婦孤兒受人魚肉公與人言呐呐如不出口比事至雷厲風飛人服其馘類如此吾邑爲先賢申子故里厥裔微甚人鮮知者爲言於邑侯虞晉王公擇其秀者讀書奉祀復城其墓而刻詩以表之道以光顯先是憲齋公遺命以族譜縣志爲屬公續成其志間嘗語鯤曰族譜吾宗誼所關敢不核實若牽引附會是不可以對祖宗縣志乃一縣傳信之書敢不慎重若瞻狗避忌謂世道人心何公自幼辟呬庭訓博古多聞能徵一邑數百年事及人家支派源委親串錯互言之鑿鑿有吏材於邊塞屯戍海道河運錢鹽賦法皆有成策經緯條貫屈蟠胸中而不一試用識者惜之撰載酒題襟二集誌交遊也公既方柄員鑿與世鉅錕然賴斯道不孤枹鼓相應相與蒐獵精華模範今古怡然自得悠然而忘老也公制藝醇穆淵奧不急趨時尙譬如持蘇鼎示人觀者疑售參半故終身不售詩律晚節益細每於愁苦之時抒婉約之音可以規其養也著有十世草堂今古文集蠡測詩集共若干卷嘗命鯤編次之生平不有玩好至於擣蒲妓樂淫詞小說尤屏如仇讐不爲勝遊踏險攀危不因向晦科頭跣足其教人自爲事事有規矩狀所不能悉者誌亦不及詳也公生於康熙壬戌年某月日卒於雍正辛亥年某月日配岳孺人庠生諱綱公女賢有法度後公十九年卒生男二長宿燾己酉科舉人丁巳明通榜任博平縣教諭己未科進士任山西萬泉縣知縣娶于氏庠生諱式敷公女繼娶邵氏次宿庚丙辰 恩科經魁驗看知縣甲戌明

通榜任德平縣教諭娶張氏貢生諱鳳詔公女女二長淑德適邑甲午科舉人河南新蔡縣知縣周公諱士迪男庠生毓琦次淑元適邑癸卯 恩科進士福建巡撫王公諱士任男太學生兆鵬卜於雍正某年月日葬公於邑東南黃岡之新阡公歿時伯氏截取赴銓分習秋曹訃至馳歸衆挽留不可曰吾弟已矣何以官爲公既歿有人遇公於路者鼓吹騶從狀如官府詢所之曰將往泰安嗚呼生而爲英歿而爲靈理固有之無足深異然余既悲公之有志不遂又歎東方學者無所依據不獨爲畢氏家門之不幸也爰揮淚系之銘曰何衰乎鳳何泣乎麟何道之隆而遇之連堂斧舉如古之天民埋銘隧道敬告來人

濰縣張昭潛舉十二峯先生傳

先生諱霽字伊蔚號澹菴行十二故又字十二峯文登人父慧齋先生以明經教授鄉里生二子長諱霽康熙甲午科舉人先生其仲也生有夙慧三歲能背誦大學唐詩十歲出應童子試爲文操筆立就二十歲入邑庠康熙辛卯入白雪書院與山東名士以古學相切磨所聞益博白雪書院北平黃公叔琳督學山左時所建在濟南趵突泉東面山環水前爲堂爲諸生肄業處後有樓曰白雪蓋取景仰名賢李滄溟意非滄溟之白雪樓也黃公擇東士之有文學者厚給館穀使考道課藝於斯先生與伯氏入焉當是時諸同門友以俊才相繼脫穎奮翼青雲伯氏亦以此時登賢書而先生困躓名場屢不得志於有司窮愁著書於邊塞屯戍海道河運錢鹽賦法經之緯之條貫之思以有用之學見於世於時文不屑意偶有作簡古渾穆迥非庸流所及雍正癸卯以選拔貢成均年已四十有二甲辰應鄉試青浦錢忍菴分校試闈獲其卷大奇之亟呈主司薦冠葩經卒以額足殿後中副車丙午主講登州書院倣蘇湖教授法士風丕變已西嗣君宿燾一發命中先生自是無進取意自登州歸結廬城東文山下以終所著有蠡測集若干卷胸中抑塞磊落之氣一於詩發之故其詩悲壯沈鬱如怨如訴類士君子不得於時者之所爲泰山趙仁圃相國敘之曰稗海之外香海之內有神物焉轟雷掣電雲垂水立吾鳥從而測之哉其見推重如此宿燾刻其集行於世 張昭潛曰同治庚午丁文誠公撫山左創立金泉精舍於趵突泉東去白雪書院

文登縣志

卷九上二

人物二

十一

故址僅數武拔十郡二州文行之士聚而教育之余濫廁十餘年時遊所謂白雪書院者豐碑臥地破瓦敗椽欲墜惟白雪樓巋然獨存緬前哲之遺蹤未嘗不慨然太息亦可知百餘年後金泉猶白雪也而先生經術文章能留於世不與荒烟蔓草同腐嗚乎其不可及也已

大學士趙國麟蠡勺詩刪序

黃河之水來自星宿勢若建瓴衝突洶湧不崇朝而入於北海之中北海之去星宿不可以道里計也若使循河流之故蹟逆而上之欲求所謂星宿者雖皓首不可得也水之生物若蜉蝣蛙蟻亦自以爲樂矣而鯨鯢者方簸弄巨鳥噴水潮來吸水潮去大矣而猶未神也若蛟龍其不可知矣乎然皆不離乎稗海之中稗海之外有香海者莫得而窺也惟詩亦然杜少陵之論詩曰蘭茗碧海韓昌黎之論詩曰排募橫空皆此物也若夫不探其源而相率爲浮游之辭其與逆河流而求星宿者何以異余讀不夜畢澹菴先生所爲詩如遇之矣先生不以自足顏其集曰蠡勺所謂有而不居也嗚乎稗海之外香海之內有神物焉轟雷掣電雲垂水立吾鳥從而測之哉

賽玉紘字冠夫康熙丁未進士性孝友事親能先意承志凡諸父兄弟

無不代謀溫飽完其室家族中有逋賦多方措置代輸教子成進士自

甘恬退不樂仕進布衣蔬食渾厚和平爲鄉鄰排難解紛人皆樂受贈

奉政大夫山西提學道僉事祀鄉賢祠

續登州志

王志玉紘讀書務實學潛心墳典爲文原本經史視帖括家一切輒語滑態夷然不屑立文山社課諸生多知名之士著慵齋文集丙午以策論登賢書丁未成進士年逾五旬遂不樂仕進云

樂安李煥章慵齋集序曰宛陵施公愚山來督學首拔先生攜其文歸南中南中人未異之當其時功令初易務實學以經濟求天下士天下士溺於帖括四子一經之外不能他有所見聞天人三策累問累弗答先生沐浴周漢驅策唐宋洋洋灑灑悉中窾會士不諳經史果不足用於先生見之矣長公青崖以進士令山右之廣昌先生自喜得肆意諸架上不復事簿書遂過紫荆倒馬諸關就養青崖之官署逾二年以病歿

邑人叢大爲慵齋集序

青崖歸自廣昌閉戶讀禮手其尊公遺稿愴然有帖瞻之思謀梓之以傳而問序於余憶余與勺海交文章之知過於親戚其所撰著間嘗窺見一斑茲受而竟讀而不禁喟然於文章盛衰之際也自周漢而後綺於魏晉濫於陳隋洵薄俶詭於唐之五季非韓歐諸君子振起其間古文一綫幾何不漸滅盡也嗣則有青田浦江陽明圭峯荆川震川鹿門諸先生更相維持力追雅則泊其衰也始於飯釘撥拾剽賊古昔極於驕憤昌披偈背規矩夫塗車芻靈象物也鼻口耳目象人也有化工焉有神理焉非其象之謂也擬議刻畫靡然標一先生之言而未免象物象人之譏無怪乎文章之衰也艾東鄉起而斷斷爭之一時靡然嚮風庶幾微言復興於世而吾勺海肆力古學發皇蕩滌其源汨汨然其光熊熊然煥然與唐宋同風論者謂其學之至也然豈獨學之至哉蓋有其學而出之無其才而運之無其法有其法而變化之未能神皆不可語作者慵齋之文實能得於古人之所謂神者而出入馳驟如組如舞如江河流回環往復如粲雲烟如夏金石規摹於古而時離合之以自成家嘻此豈獨其學之至哉喬梓以未戌相繼聯第青崖篋仕花封矣而勺海猶不肯輕於一試其經濟雖未大見於時而不朽之業可以藏名山而傳其人者迺在茲編文章起衰之功砥夫世之躋膺仕侈鐘鼎以鳴得意者何如也而况有青崖以發摭其未

文登縣志

卷九上二

人物二

十一

盡之蘊立言與立

功蓋後先輝映矣

賽璋字德公玉紘子康熙庚戌進士父子接武捷南宮謙抑愈甚鄉黨益推重之璋初授廣昌知縣再任臨汾雪冤理枉指不勝屈晉禮部主事督大通橋運務積弊悉除糧艘直達京師無復紅朽缺額之慮轉戶部正郎通惠河道於霖雨後經營修築商民交受其利視學山西絕苞苴拔寒峻晉之士子作歌頌之授奉政大夫卒祀鄉賢祠

續登州志

易州志

廣昌名宦傳賽璋在任二載汰陋規禁俚俗以丁憂去

賽瑤字鳳厓歲貢生自爲諸生時好學慕古爲文不作輒語脆態詩喜自然得王孟遺意與畢鍾姬友善以氣節相許年五旬膺歲薦任利津

縣訓導著有層園集

柳軒集

邑人賽珠層園集序

吾鄉先正以詩古文詞名於世爲後學楷模者二家攜雪堂叢公及余從父勺海公是也兩公歿而文壇崩頽人自爲書家自爲說如河流蕩沸而涇渭莫分也如媼母毛嫵荆璞燕石雜然並陳於前而妍媸眞贋罔辨也厥後鸞齋先生起而振之芟榛蕪抵浮靡奮其廓清摧陷之力而先正宗風賴以未墜者二十餘年余小子生也晚既不獲親從父庭訓又未嘗從諸君子遊而其間正變得失源流授受之故則吾兄鳳厓爲余道之最詳兄自爲諸生時好學慕古廓落有大志受業勺海公其爲文詞旨英發不作佻巧輒脆之態詩詞喜自然得王孟遺意視世俗齟齬無可其意者與鸞齋友最善以氣節相許少時共治舉子業凡九上策卒不第至己巳膺歲薦而年已五旬矣既老不得志無所用於世嘗撫髀歎曰大丈夫不能歷金門上紫闥圖功名於竹帛柰何終老田畝碌碌無所短長與草木同腐乎乃北渡河上井陘踰太行周覽馬陵雁門諸要塞南浮江淮入會稽探禹穴其胸懷浩落之致往往寄之於巖崖絕巘穹林豐草間而洩之以詩其意氣可謂壯哉數年歸而鸞齋先生歿因念世無知己者益復放達不羈每與田夫野老樵子牧豎酣飲狂呼甚至顛倒迷惑而莫之厭雖曰寓意於物而要其所感憤者深矣歲辛卯其詩若文爲晉遊越遊二草合箕月齋舊稿及樂餘軒雜著訂數部分十餘卷而命余爲序余既念兄之不合於時不遇於世爲可惜而至於先正彫謝狂瀾湧洞又不能無感於攜雪堂而下鸞齋而上也嗚乎斯文升降之故可勝歎哉可勝歎哉因以其說質之兄而書之卷首以爲序

賽珠字合浦瑤弟康熙癸己舉人從父慵齋擅詩古文詞珠繼之獨不喜時文然間操筆輒工口吃不能劇談坐稠人中常不發一言而學邃

文登縣志

卷九上二

人物二

十三

於史或以質問則辯如懸河所著詩文集外有柳軒叢話史話各一卷

箋註西涯樂府一卷

海陽李果柳軒小傳見山左詩鈔

維縣張昭潛賽柳軒先生傳

先生諱珠字合浦號柳軒先世自明永樂間以武功占籍靖海衛嘉靖間有任三河知縣諱從儉者徙居文登縣城至勺海先生以名進士倡道東方爲文壇宗匠先生其從子也博學能文中康熙癸己恩科舉人教授鄉里終其身不求人知人亦無知之者口吃不能縱談坐稠人中常不發一言而學業蘊蓄充溢胸中有問者則因端竟委如黃河下龍門滔滔然不竭也其學邃於史上下數千年得失之故以義理權衡之著柳軒史話一卷山左史學自東阿于文定公之後於先生再見之又以爲學者之患病在不博博矣而不能約則尤病事雜言龐與空疏鹵莽者相去無幾故於古今典禮習尙物理人情文章技藝凡可以資考鏡者援據精確著爲論說皆有益世道人心之言曰柳軒叢話其古文有家法不以馳騫勦說貌似爲能平易近人言言藹如所爲勸思讓傳慈母李氏行略敘事得史法其愷惻動人處皆自血性流出詩學功尤篤其論詩自三百篇後源流正變洞見本根不喜分唐宋門戶以主性情爲宗嘗曰自有明以來談詩者皆崇三唐而紕宋元不知詩本性情古今同揆至其格律聲韻不能不隨時爲升降自三百篇後一變而爲楚騷再變而爲樂府爲漢魏六朝爲唐爲宋元寢寢乎有流而不返之勢而其所以道性情則一先生自爲詩千餘首雄健有奇氣體格出入三唐亦時有近宋元處與所論相符也詩稿曰崑陽草谿谷漫筆海上吟學步存稿共四卷盧雅雨選入山左詩鈔贊銘賦頌序記之文今存二十三篇箋註西涯樂府一卷已佚

賽珠慈母李氏行略

先君子元配劉孺人生伯兄瑤繼室亦劉孺人無出皆爲吾嫡母而慈母李生叔兄琳生母冷生仲兄珣及余小子珠皆先君子側室也生母棄世時仲兄生六歲余繼四歲先君子與繼孺人憐其幼也顧謂慈母曰二子不幸失母爾能以字爾子者字之是亦爾子也母曰唯唯兒初與母不相習晝夜啼不止母攜棗栗及一切嬉戲之具撫慰再四而後即安自是情愛日篤且晚不離左右或夜有操作牽裾而伺其旁母或佯怒驅之去不顧也少頃且鼾睡膝下迄今二十年頗能記憶也時繼孺人嘗別居山墅督耕織務持大體而已至於井臼服食餽餉及出納錢帛粟芻多寡之數惟母是任母亦綜核慎密未嘗一失孺人意後五年而先君子即世又七年而繼孺人即世十餘年兩勸大事家業中落而母之心血亦滴滴盡矣然母益自奮內勤紡紉外課兒輩讀書不少懈又明年仲嫂于氏卒其所生女纔六歲男枝上則猶在襁褓也母撫膺大慟云汝父子兩世皆以孩提失母而此兒爲尤慘天乎天乎謂之何哉時水旱頻仍家貧不能備乳氏母日煮米汁及糖飴之屬哺之日夜抱持艱辛萬狀一如余兄弟故事從叔父觀六公暨余長兄皆以耆年爲一門望每值歲朝必稽首於母前曰此賽氏功臣也母雖謙讓再三卒拜如儀庚辰兒讀書小河村清明歸翌日晨與母抱枝上顧余而泣曰今夜夢不祥吾其不久於人世乎念汝嫂氏早歿而汝尙未授室是覺覺者將安所庇耶已矣吾死不瞑目矣兒驚愕失措雖婉詞以慰母而此心已怛怛動也自是書舍嘗不安席率三五日一歸或晨往暮歸歸而幸母之無恙也則怵舞狂歌嬉戲如兒時狀即母亦不解其何謂夏四月郡試之檄至而母病作兒憂悸不知所出頗不欲往母固迫之且力疾治裝至期母強起立庭中目送之兒肝腸斷絕涕泗沾襟母亦潛潛淚盈皆猶強持之不欲傷兒心也灑淚西行凡二十餘日事竣歸踉蹌入里門訊母近狀則慄慄牀榻間不可復起矣比聞兒來驚呼曰余母子猶得面訣耶死且不恨遂相持痛哭失聲諸婢子及鄰媪問疾者皆感喟歔歔泣數行下也嗚乎扁淳不遇藥餌無功至六月二十六日而母竟末之救已嗚乎痛哉余兄弟賦命衰薄生無以養死無以葬每一念及哀裂心脾悠悠蒼天曷其有極哉母嘉言懿行兒將備載家乘而茲特詳余母子顛末事撰爲行略聊

文登縣志

卷九上二

人物二

十四

當勒銘而且以見母之果以字其子者字余兄弟也其於先君子可謂不負所託矣或曰禮慈母比於所生服齊衰喪三年何吾子之不行耶曰方余失母時繼嫡母固儼然在也嫡母在則統於所尊尊無二上也然則以慈母稱之奈何曰喪制限於嫡者公也義之所不敢出也稱謂必以實者私也情之所不容已也

賽枝大字雲耕璋子太學生雍正六年以賢才舉七年署雲南烏蒙縣事地係新闢苗疆枝大抵任修浚城池工未畢而逆苗祿萬福等率衆攻城總兵劉起元聞風先遁枝大率兵巷戰衆寡不敵遂遇害時雍正八年八月三十日也事 聞贈雲南按察使司僉事 賜祭葬卹銀如例嘉慶十一年 特旨錫予恩騎尉世襲罔替

志

海陽鞠瀛賽僉事家傳 文載者獻類徵

特贈雲南按察使司僉事諱枝大字雲耕號可園文登縣人雍正戊申冬雲貴總督鄂文端公疏奏滇省需人 當展詔臣工各舉所知於是公同里戶部主事劉君重選素悉公端方廉惠即以公上 聞引見後奉 旨赴滇其時烏蒙府有均田之役公於己酉十一月奉鄂公檄往爲經理公念苗疆新附宜予軫恤雖以三壤定賦而遞降其則又量留餘畝使得自私苗甚德之庚戌秋事竣以八月下旬至府擬即返會城以復鄂公而烏蒙逆祿萬福等造言煽亂禍遂起祿萬福者舊土知府萬鍾族弟也先是府隸四

川萬鍾數擾雲南邊鄂公擒鞠伏法使萬福父鼎坤襲改隸雲南 朝廷既設東川府流官次及烏蒙授鼎坤守備趣赴 闕鼎坤快快行密授萬福計使號招諸醜類乘不備絡繹潛赴已而賊大集則豕突狼奔洶涌而入總兵劉起元失撫禦策遂至城下公遇賊於途其長隨山西澤州張蘭秀義人也從公巷戰殺賊二十餘人而公亦被大創爲所執賊有識公者熟視曰賽公也感公均田公平速走避某若可免若與不識公者遇危矣公曰吾豈偷生者吾當就死官廨其送我守備衙門中而賊自入城大肆掠鹵尤搏力搜括各衙署戕其家屬至月晦公遂遇害十月大軍復烏蒙礮萬福及鼎坤於市改烏蒙曰昭通府當賊語公避去時從其言則生否則死勢不中立也乃毅然賢死於生甯斃於不我識者之手而決不汝汝自污非確有見於分義之嚴其能如是之特立乎哉 上聞公死難深爲憫惻既 贈官階又遣官讀文以祭 賜全葬賚予其家嗚乎人誰不死死而如公者誰與公與予爲中表兄弟其祖母鞠文登宗家女也余初聞公死既慟傷之且惜公慈惠性成年纔四十九令得盡出其仁厚之蘊則元澤所被當與古循吏並稱然公一捐軀而天下傳之史臣直書之簡冊照耀奕世後之人考公事蹟猶想見忠壯之風懷懷如在即使公果竟其施其聲光不若是烈也則凡與公爲戚黨及素與厚善者亦皆可以無憾矣公之王父諱玉紘康熙己未進士父諱璋壬戌進士歷任山西提學道 贈玉紘公如其官公早失二親友愛兄弟無秒忽閒隙樂振施出於天性如路經山西某鎮逆旅主人染訟事將粥子爲資公問價幾何曰十二金公卽如數與之其子得不粥陝西貢生秦姓者其子誤遭人命陷獄中捐三百金贖之以出某年公由甘肅入都至某坊稠人中忽有大呼趨就者曰君非賽某也今乃得見於此公愕然其人曰到寒舍卽知之至則其人率妻子羅拜於庭曰不憶數年前平涼道上旅寓中有臥病窮乏之筆帖式乎時方爲主人所逐適君相值卽理論主人付以資令飯我又延醫醫我且留居旬日待我愈與之以北上之需而君始行也某今爲某官矣每語家人輒感激泣下今幸見君於此於是公默自循省乃恍惚憶及前事脫非再值其人則竟忘之矣蓋公於利濟事既往則不留於胸又不僅施不望報而已平生又敦友誼年二十

文登縣志

卷九上二

人物一

十五

餘時嘗以太學生就試京闈有進士某君其房師爲公父門下士與公往還一日公將東歸某君曰吾無子素聞山東女子多淳樸能爲購婢妾乎公曰諾及歸爲訪某氏女頗端淑以善價購之於是備衣飾隘具備車騎身送都門而某君以內妬不果納或謂此女殊屬意於君盍留作側室公曰旣購爲吾友妾矣而自留之是負友也會有文登人入都販易其子年少善居積遂以此女妻之其篤於友好多此類公旣死難其友人相與議曰公和緩退讓於朋輩媼媼有恩視之長者也不謂其義烈如是余曰是乃所以爲公也夫君與友皆以義合者平居不忍負友豈當危難而忍負其君哉公之被執也又有長隨某親見賊引公以避公堅不從賊縛某置空室中後得不死數爲人道公此事余同縣李龍川先生於賊平後嘗修路昭通其長公兆懷自雲南歸爲余言之公子學濂屬作家傳余老病不能文於公則不可辭而李君之言足據遂槩次其事而復論之曰宋慶歷時儂智高反嶺南攻陷十有二州仁宗以縣官素不設備守吏無以捍賊故凡失守者惟奪兩官而於知端州丁君寶臣以其殺賊六七十人則僅奪一官而復召用以此論之脫公卽受職新邑能殺賊而後走匿以 聖主明照萬里亦將原其情與勢而赦之而况未膺民社則公尤可以無死而公必死夫人之畏死將求緩須臾而不得矣有能計失守之誅以爲死於法甯死於賊如此者吾猶且賢之而如公所處則又非並無生望而惟出於死之一途者子輿氏曰舍生取義公可以當之矣

賽枝大 國史附見劉洪度傳初烏蒙土府祿萬鍾結鎮雄土府隴慶侯爲亂萬鍾之叔鼎坤來歸冀襲萬鍾職及官軍削平兩土府授鼎坤守備鼎坤失望其子萬福謀叛雍正八年八月圍烏蒙通判劉鎮寶知縣賽枝大教授李焜等率衆守城會總兵劉起元握重兵不戰司獄陳天錫憤鎮將怯懦知城必陷手刃其妻自刎於官署越兩日圍益急起元欲奔東川率衆潰圍出被殺於荔枝河城陷鎮寶枝大巷戰殺賊數十被執不屈死焜自刎於學宮同時盡節者烏蒙府知事劉懋美魯甸巡檢葉祚徽鎮寶枝大俱贈按察司僉事

賽氏家乘枝大義僕張蘭秀山西澤州人勇壯非常誅賊尤多既出陣仰天泣曰吾生矣奈吾主困何復持切馬草刀殺入重圍尋主不獲爲賊所害

邑人畢霽聞賽可園殉難烏蒙詩

廿載題襟翰墨場文山風雨快聯牀名家門仞瞻天尺公子丰標佩萑香五夜挑燈飛脈望三春把酒醉花王那堪萬里魚鴻杳驚對 綸音哭國殤

才從蒙段試龔黃何物么麼敢跳梁自是夜郎忘漢大可憐張許死睢陽忠燐不逐蠻雲散烈骨爭傳馬革香 聖主即今褒國士千秋祠廟肅南荒

天風颯颯激心肝滿目靈旗白日寒罵賊已拚成碧血孤兒何處訪桐棺黃雲紫霧羣鴉散洱海蒼山醉酒難和淚裁詩標勁節好傳青史萬年看

又邑人劉儲鯤詩

蠢爾烏蒙負 聖恩昨江一夕海波翻誰從冰雪堅臣節獨有心肝奉至尊肉食難銷謀國恨燎原空哭望鄉魂蠻烟瘴雨千山外何處重尋碧血痕

于其瑤字瑤圃可託子康熙丙寅拔貢候補中行評博性慈善己巳甲戌薦饑施粥濟賑全活無算文詞雅麗得六朝之遺有樹筆堂遺稿制藝近隆萬小品長洲何焯序之曰吾友瑤圃少爲舉子之文卽體源西江清峭閑逸其致味超然迥出塵壒外也比益熟復左氏內外傳而研

文登縣志

卷九上二

人物二

十六

味慶歷盛時之法進於簡遠有小題數十篇頡頏前人殆無愧色手開榛蕪端屬此才若有漫倚豪橫者從而少之是猶買菜之見不知茗戰所尙惟在一槍一旗而于子之鄉所產文石磊磊晶瑩五色者顧當詘於廣斥之士也豈復可信哉

家傳

邑增生宋允和于瑤圃先生傳

先生諱其瑤字瑤圃戶部侍郎龍河公子康熙丙寅拔貢生候補中行評博工文藝雖短札不苟下一字而風致爛雅脩然塵壒外類魏晉人物性高潔遇俗士則惶然避之掃室焚香終日靜坐故其文淡而遠古而逸爲長洲何義門所賞鑑每有作必質之義門村夫子力索不與也嘗與友人書曰僕性不耐塵囂見俗子則反袂走以此雅不爲屠沽輩所喜何者骨體不媚不堪酬答若坦懷與語動輒見怪至於談世務較稗販乃自不能通曉迂僻乃爾豈可與世人周旋故鍵關卻掃日與書卷爲緣倘遇素心勝友又復傾倒芸窗一榻青燈半檠啜茗道平生竟日忘疲若使僕移此就彼便欲成疾人各有好吾甯作我耳怒者常情且亦何關吾事哉先生負清操不苟阿世俗似落落寡合而胸懷惻怛慈祥視萬物若一體意藹如也康熙己巳甲戌文登歲薦饑家有積穀若干石盡出以食餓者不足則貸官粟以賑之又不足則親歷村落給錢周乏其飢斃於道路者瘞之而爲文祭之使無爲厲又勸同志者創立義倉以善後年三十餘卒所著樹筆堂雜文一卷歷城王秋史序之曰詩筆爾雅識解卓犖其上朱明府書恤歲凶護鄉里指陳皆鑿鑿有經濟所謂搢紳先生不能言者年少秀才言之矣乃不假以年未竟其用等山東之妙英

類洛陽之才子余於舍人不能無感於天之生才何意也子熙學東海筆談曰予閱瑤圃與朱明府書丁丑春施粥約祭疫亡者文知瑤圃富而好禮非季倫守財者比錄之以勸將來

于其昭與朱明府書

天災流行饑饉洊臻粟等珠貴殍若邱積聞之痛心見者拔淚伏惟老父臺勤如傷之念賑貧卹乏惟日不足生死肉骨舍召跨杜某以此感激故不復自量畢慮竭蹶責粥以與饑者蹄泔雖微亦願少裨萬一時節如馳行復兩月扶老挈幼就食益夥計向所糴之粟僅餘半月屈指今日以至麥秋約可五旬纔得食新是役一停五旬內此數千人退無所歸進無所依欲苟延旦夕難矣竊自思維文邑陋區罕有儲粟周視亥市可得幾何以升合所聚而供數千人之食將焉給之且恐與窮民爭糴物價益昂故不揣冒昧假倉穀百石而諄懇至再未垂順許豈以假借之門一啓後之循例而請者不與則彼有辭與之則罄困所有必屬子虛夫春假秋償某豈肯相負必欲塞他人之口請權寄五十金於庫然後啓倉庾而給之粟其他哀哀陳乞者與之固公之惠也不與亦無辭也是老父臺爲國爲民兩得之矣若曰撫軍有存七糶三之疏待其檄至而後給之此數千人業填溝壑矣尙何濟哉某賦性輕迂不樂干預而茲竊願爲馮婦之請者誠不忍數千人之死而漠不一揀也惟老父臺少察焉某不任懇禱待命之至

又丁丑春施粥約

糶事無秋流殍載塗雖比歲不登未有若今日之甚者也啼吟滿前痛心在目荒莊數區既非膏腴舊歲所蓄復於己已甲戌兩歲承先君遺訓傾困賑助迄今蔑有存者因畢力拮据於客冬歷詢村墟給錢周乏聞有不肖得錢入手便事擄捕雖二親鮮飽數口絕炊會不少顧徒快一擲良可痛恨今春日擊溝瘠視去冬尤甚欲仍以錢濟之恐若曹復蹈故轍爰倡爲施粥之舉諸昆友亦皆欣然從焉獨涓滴未能博濟慮遠近聞者鱗萃霧集既不足果其枵腹而俾買買來此是速之斃耳今請與約其自吾所居十里以

文登縣志

卷九上二

人物二

十七

丙者日以粥晨鐘畢集午鐘止自二月十五日始

又祭疫亡者文

嗚呼歲不登諸君苦饑饉久矣余率羣從煮粥食之凡三閱月薨薨增增就食茲土猥罹疫氣間有斃者念君等兄弟妻子各鳥獸散遊魂無歸遺骸中野余甚憫焉封不坏土醑以椒漿維爾有衆庶幾安之母逞淫厲爲人間患嗚乎哀哉

福山王兆琛序樹筆堂制藝曰余同年友劉次白廉訪選山左文鈔分前後二集共二十冊凡吾鄉先達若顯通若隱逸無不搜羅而采擇之惟我朝自定鼎訖仁廟百有七十餘年齊魯之邦文人蔚起各成一家其遺稿殘編或刊行於世或珍藏於家操選政者難備錄焉卽如文邑于瑤圃先生文僅錄其五余讀文鈔得見先生文雖窺一斑而不能不自憾所見之未廣也丙申督豫章運路經袁浦與先生曾孫石舟姻叔謀面迺出所刊樹筆堂遺稿屬敘於余余攜赴舟次朝夕諷詠一二篇始備悉其學業之深厚文境之精高置之正嘉隆萬中幾無以辨之其風度醞藉則如春山之淡遠其吐屬浩邁則如秋濤之鼓盪其深入而層出則如繭之抽絲如蕉之剝心其刻至而透露則如錐之畫沙印之印泥先生雖屢困矮屋而抒筆命意毫無抑鬱牢騷之氣形於行間先生云吾安知世之閱吾文者謂吾文何吾自爲之而自娛之後之讀樹筆堂遺稿者其亦共娛之矣余末學晚姻焉足論先生之文惟自幸其所見之既廣並得遂其仰止之私聊綴數語贅於篇末云爾

于其珣字華白其昭弟幼穎悟年十四入邑庠逾四十不得志由附貢援例通仕籍任刑部山西司主事雍正元年以保舉一等賜緞紗人

獲紫貂進本部員外郎江西司郎中歷刑部十一年矢清矢慎 上顧
吏部大臣曰于其珣是好司官 特授池州府知府 召見養心殿諭
之曰因爾爲人誠實且在部年久故用爾爲知府凡作官才情關乎天
分不能勉強而廉潔守分則人人可以自勵惟能存心誠樸以實心行
實事乃爲盡職至知府有表帥州縣之責一府之事必須周知州縣好
者則獎勵之不好者卽當揭參若一味姑容寬縱不惟有害地方亦且
有誤國事爾果勤慎奉公雖剛介亦自不妨倘任性而行傲上陵下則
甚不可爾其仰體朕擢用之至意隨 賜御書喜雨詩朋黨論各一幅
上諭一道並貂皮香念珠紫金錠等是時池州郡邑荒歉野多流亡
其珣出白金安集招撫郡人以甦調廬州府遷廣東鹽運使未赴任緣

文登縣志

卷九上二

人物二

十八

事降調引 見奉 旨發往河南以府道用既又 命往廣東以道員
用補授肇高廉羅道按察使司副使所屬郡三州四縣十九其地山水
重複耕者恃圍基以爲蓄洩其珣親歷各屬董率圩長殫力修築以勞
卒於官喪不能歸故人賻之乃得旋里

歐志敘述多舛
照行狀改正

海陽鞠濂蓉浦于公墓誌銘

雍正庚戌四月二十六日廣東肇高廉羅道按察使司副使蓉浦于公卒於肇慶之官署嗚呼以公忠清
誠樸邀 當亡特達之知 天子方欲大用公而公遽以勞勩殞身得年不及下壽官止於監司此知公
者所爲太息其施設之未竟而重爲朝廷惜也按狀公諱其珣華白其字又字蓉浦世籍登州之文登縣
曾祖諱維哲祖諱性篤皆邑庠生皆以公父貴 誥贈通議大夫戶部左侍郎公父則順治乙未進士歷
官戶部左侍郎諱可託吾鄉所稱龍河公也嫡母王淑人生母 贈宜人張氏公幼有異稟與其兄瑤圃
先生日夜鏃礪兄弟相師友及兄早世公益自刻苦期有以爲母氏歡者而年逾四十猶不售則援例通
仕籍任刑部山西司主事至今 上卽位用刑部尚書張公侍郎王公舉 特賜御用緞紗及人獲紫貂
又用刑部尚書勵公侍郎盧公高公舉累進江西司郎中管現審司事四年冬 特授江南池州府知府
轉廬州擢肇高廉羅道先後兩遇 覃恩初授承德郎再授奉政大夫公嘗以郎中侍班 上顧吏部大
臣曰于其珣是好司官著記名補放知府其授池州也 上召見養心殿訓之曰因爾爲人誠實故用爲
知府其仰體擢用至意往復諄諭凡一百四十六言詳具行狀中隨 賜御書朋黨論喜雨詩各一幅

上諭一道貂皮一張香念珠一掛紫金錠二十以寵其行嗚乎休哉此君臣相與之異數惟督撫重臣始得之公非大吏顧獨蒙眷注優渥如此考諸故事前此殆未嘗見也公歷刑曹十一年凡於爰比不立異不苟同不自持已見不媿阿隨人是非事有兩議者則原情而以理斷之明允之稱藉甚輦轂下公之爲諸公所倚重而上結主知者以此其後由廬州遷運使未赴坐池州承審遲延議降調而奉旨引見發廣東以道員用者亦以上知公有素故也公以四年十月授池州即以十二月馳往受事其年郡邑荒歉奏贖甫上而發帑之令未下公亟出三百金安集之使得延息以待粵東山水盤紆耕者恃圍基以蓄洩公親歷所屬郡縣董圩長悉力修築方欲擘畫指付爲一道久遠計而遽以內勞外感得疾不起嗚乎惜哉蓋公蒞池州未久駐肇慶甫數月故其見諸措施者靡靡如此公之卒也距其生康熙壬子得年五十有九配劉氏誥封宜人男子子八人景文選俱廩生思曠太學生劉孺人出亮乘太學生崇簡候選縣丞泌庠生慤太學生典側室王孺人出女子子七人孫男十九人孫女八人公賦至性事嫡母及生母色養備至其孤姪熙學字秋溟者以詩學聞得公之教督爲多秋溟即瑤圃先生子也公撫之不異已出故秋溟聞公訃其哭公亦不異所自出云濂與公子姪相契年二十餘即識公公工書得兩歐陽法丰采凝重美鬚髯爲人端方敦樸與人交不翁翁熱亦不落潦涼濂雖不悉公政蹟而當官之建樹可於其器量覘也辛亥季冬濂遯跡山村公之孤選自文登來手行狀一册踰門告曰先府君公而忘私既通籍卽令不孝等勿之官所性慎密不伐與戚好語亦不及官事有老僕隨府君之池州旣止旅舍將就寢一道士託他事見出二百金以進府君變色諭之曰曩吾直若非汝私也感且不可又因而利之乎其急持去勿污我微老僕言不孝等固不知也以是知府君之治行其末由排縉者多矣今卜以雍正十年九月十三日葬府君天福山之新阡而墓隧之石無辭以刻不孝等爽然惴慄大懼素所見聞者亦且湮鬱不彰吾子與府君舊其賜之銘用釋諸孤之罪戾於無窮乎濂旣不獲辭則語選曰余觀古人所次傳誌有舉一二端以傳其人者豈其他誌行皆沒沒而無考與抑以著其一二而可以旣其人與當雍正之

文登縣志

卷九上二

人物二

十九

丙午 至尊勵精圖治慎簡有位而公於是時克當天心有實心任事之衷是已足表見於今而有待於後世矣獨愧濂文辭藹弱弗稱不能爲公永久之傳也銘曰公先大夫休有顯聞維公繼之卓卓偉人回翔刑曹乃動帝顧命作守臣持節一路施未百一胡不永年遐荒奄忽朝野所歎天語褒嘉垂光千祀勒石埋墟以竣良史

于其琰字璞如鄉賢可寄子兄其瑞任雲南開化府通判持躬端謹儉素如諸生卒於官其琰年十三入邑庠事親孝尤慷慨樂施與康熙丙子大饑與堂兄其珫捐粟萬石煮粥日食數千人凡半載全活無算以例授河南息縣知縣是時京師大旱引見時霖雨如注聖祖喜曰數月無雨民禾將稿今獲甘霖必爾等有雲雨蒼生之兆用心作官異日可大用也其琰單車赴任以清勤自矢招集流亡散給牛種開墾荒田一切差徭悉與豁免置學田十餘頃延師訓課鄉民子弟貧生各給米八石銀四兩己丑歲大歉設粥廠十餘處流亡者復業治息十載民

自以為無冤丁母艱歸息之民攀轅呼號有抱足而痛苦不止者再遷四川南江縣縣處萬山中居民僅七百餘戶多方招徠仁聲遠播以疾卒於官祀忠義祠弟其璜四川鹽亭知縣其璿城武縣教諭家傳

于其竣丙子賑饑邑人為之立惠愛碑銘

猗與我公 篤生東方 吾儕小人 庇公之鄉 飲和食德 惠我窮氓 昊天不弔 哲人云亡
我有祈寒 誰授衣裳 我有饑饉 誰賜餼糧 我有疾病 誰施藥湯 我有爭鬪 誰判短長
遠憶令德 泣斷心腸 於維我公 生榮死芳 在天為神 英靈洋洋 勒諸貞珉 沒世不忘

于熙學字無學晚號秋溟其瑤子幼孤刻意勵學由附貢生官工部虞衡司郎中好藏書所居東始山房牙籤萬軸手自校讎終其身不懈雍正乙巳志外訛處皆引據史冊及各家集部訂正之歷城王萃任成山衛教授熙學以詩進質萃授以詩法以不涉理路不落言筌為宗旨熙學篤信之所為詩清微淡遠得王孟遺意書學亦仿唐人剛方磊落細

文登縣志

卷九上二

人物二

二十一

筋入骨得歐柳之神人爭寶之著有鐵槎樵語十卷張鵬展採入山左續詩鈔子致字此度諸生有霽鶴堂詩稿邁字我斯歲貢生克守家學工書法豪宕沈雄似李北海家傳

歷城王萃鐵槎樵語序

宋嚴滄浪論詩惟在妙悟興趣以不涉理路不落言筌為上而自負其論詩如那查太子析骨還父析肉還母滄浪之論雖矣而余謂為詩欲如滄浪之論亦欲如滄浪自負之語蓋詩未有不收視返聽慘淡經營移日分夜寂寞求音而能詣其極者故妙悟由於沈鬱興趣生於頓挫東野之寒號後山之吟榻與滄浪自負之語曾無少異矣于子秋溟少司農龍河先生家孫擁書萬卷清吟海上以余為孤竹之知途出其詩卷是正余師友零落舊學銷亡媿於秋溟無能相長因舉余之旁通於滄浪者以告之秋溟古心自鞭橫空硬語其為詩多有合於滄浪之論或不河漢吾言也

又王萃東無學都下四首

姑餘山中有于子年始妙英富文史三蒼七錄羅心胸一硯軒然紫海水海上天風起天涯春來浩蕩醉京華持將盛年較入洛瓦屋東頭翠帙斜
十二街滿東風緊大冠修劍車連軫知君魚藻頌猗那詎獨清吟添謝沈大阮從容陞楯邊小阮接武金闈前崢嶸開濟傳先德記取名家尺五天
成連刺船去杳冥湘靈瑟罷君山青松陰滿地白鶴觀詩思如是清冷冷不著一字得風流自成一家據上游祇須努力事精進會心即是逍遙遊

秋半來我舊水上一卷詩如東筍狀鯨吐鰲擲才縱橫大海雲濤堆漉瀆卽今輦路幾番風千絲楊柳黃
濛濛生衣細馬遺春好延伫溪南行藥翁

文登縣志

卷九上二

人物二

二十一

文登縣志卷九上三

人物二

于令蒞字箕來號方石可託曾孫祖其珣父選郡學生嘗教以持身涉世從根本處做令蒞終身允蹈之性至孝母李氏病攣跪不能言先意承志藥必親嘗食飲必親哺衣不解結者二年嘗夜半焚香祈以身代母歿結廬墓側獨居三年以冢子書佃從空山寂歷脫粟自給負土築墳值令節則伏墓哭或中夜飲泣題詩廬壁以狀哀思嘗以炎風負土汗浹目病或饋羊肝以療執禮不用終三年歸講肄經史放意於唐宋諸家文評訂有明以來制藝以教子孫乾隆甲午副貢東闈丁酉應順天鄉試闈中既以北元中式以末塲字句微礙易置貢元自是文名漸

文登縣志

卷九上三

人物二

一

著書法亦見重於時宗工國士多愛重之癸卯掄北元年己老作書與子云得科名於親歿之後彌增悲哽明年主講永平府敬勝書院教士以制行爲先士風丕變除莘縣教諭甫至觀 聖廟剝落禮樂器多散佚遂白上憲修飭之在任七十八日謝病歸庚戌 欽賜翰林院檢討又二年歸林下作書話以津逮後學族黨中有節烈無力建坊者胥爲立碑表之嘉慶六年卒年八十九易箦時惟呼以當年哺母之碗納諸棺令蒞持已正直剛方交友以節義相期許書法承先世家學探源於秦篆漢分六朝於鍾王法外別闢門徑標氣骨寫性靈蔚跂鬱律不可方物筆墨間生氣凜凜則性真情摯積而流焉者也涇縣包世臣評國朝書法列於能品著有勤貽堂稿蔚齋試草古今文古近體詩四書

講義族譜書話凡十八卷詩選入山左續詩鈔道光四年 旌表孝子
祀忠義祠書佃字泉南嘉慶庚午舉人任濟南府學訓導剛正不阿落
落寡合初抵濟南時學宮茅塞鸞試卷者寄居廡中貨食物者充牣墀
下書佃並斥出率紳士鼎新 聖廟嚴扃深邃煥然改觀書法尊父訓
名重一時包世臣續入能品云

家傳

山東鹽運使李文耕于孝子家傳

旌表孝子于公諱令蒞字箕來號方石文登人郡廩生諱選字賓書次子也早歲有聲黌序間尤篤孝友奉親承歡力供子職於功名仕進不暇汲汲瞻依左右備極色養有相忘於形聲外者戚黨咸指稱之乾隆己巳賓書公歿竭力當大事附身附棺必誠必信以母在不敢違膝下遽依邱壘也瞻戀哀痛不欲生母又病孿跪不能言公匍匐下籬以身代終不得應乃迎意曲會代之言十常得九母以此忘其苦孝子飲食必親哺藥餌必親嘗衣不解結者二年餘己卯母終竭力營葬遂結廬墓側負土築墳晨夕哭奠哀動路人每見農夫販豎之有怙恃者輒流涕不能自己題廬壁云舍南稚子手把鋤故斜倚石歡相呼舍北小兒道旁坐起鞭馬牛銜尾過田野市井兩殷勤日暮爭歸南北村所得未暇計多少入門慈母問飢飽嗟余忍飢手自炊咫尺相隔無由知唧唧哀音空自吐夜半山深向誰訴讀者莫不感泣三年服闋鄰族固勸之歸乃自廬返猶時時往省墓悲戀不忘如此者又十年乾隆甲午中式山東副貢丁酉

文登縣志

卷九上三

人物二

一一

中順天副貢充 武英殿校錄官癸卯中順天舉人少遂顯揚猶以親不及見爲痛每同年歡會輒飲泣而散丁未授莘縣教諭訓士首重倫紀遇諸生有恩謝病歸學者依依不忍釋庚戌赴會試得 欽賜翰林院檢討去廬墓時四十餘年猶以得職於親歿之後與無職同爲素服圖以誌憾優游林泉十餘年嘉慶丁酉年八十九以疾終卒之先猶飭諸孤以當年哺母之碗納諸棺以誌子職之未盡也嗚乎公之孝行篤矣昔子輿氏謂人少則慕父母大孝則終身慕父母公自毀齒奉高堂卽不以功名奪其孝愛而兩遭大故廬墓摧毀年躋耄耋猶拳拳子職不少忘倫所謂終身慕父母者非耶公於廬墓時纂修先世嘉言懿行著爲譜以貽子姪飭無墜宗緒教諸子先內行每云根本一差萬事瓦裂佔畢非所貴也處兄弟和而能讓有不合者正色戒之而不失其誼弟潛無嗣爲之立後弟諫早世厚撫其孀孤遠祖塋域爲居民躡蹂倡族衆修葺買田置守俾復其舊充校錄時以曾祖龍河公周歷六科多所建白關係國計民生者章數上俱蒙 俞允 世祖歎爲真諫議而 國史無傳亟白當事立傳列入焉居平迪牖後進一以正學爲先門下掇科名登仕版者皆有本末遇族黨姻戚中之孝弟節義久經湮沒者爲文紀之或匾其居或鐫諸石以期不朽其厚於人者率類是雖一鐸不足以盡其施爲然親睦敦厚之行浹於閭門達之閭里傳之通國君陳所謂惟孝友于兄弟施于有政者殆庶幾焉沒後二十三年奉 旨旌表公之名已不朽於天地而其孝思之篤制行之純家法之正教澤之遠有不僅可爲于氏子孫法者詩曰永言孝思孝思維則又曰孝思不匱永錫爾類濡毫之餘蓋不勝景慕云

山東布政使賀長齡書于孝子傳後

大孝終身慕父母終身也者非終父母之身終其身也是故養可能也敬爲難敬可能也安爲難安可能也卒爲難若于孝子者其安而能卒者與孝子家素貧母氏李病孿跪不能言孝子迎意代言十常得九飲食藥餌必躬哺之及葬負土成墳哀感行路其卒也年八十九矣飭其子以哺母之碗殉於廬身有盡期心無盡期人自有生以至屬纊凡天之命於我者何一事敢謂能盡此自古聖賢惟日夜孜孜不知老之

將至而自視常若歆然所以爲大聖大賢也百齡影徂千載心在聖賢不敵之神卽聖賢無窮之心爲之欲報之德昊天罔極孝子之不自慊乃其所以能自慊也歟孝子名令蒞文登人子書佃現官濟南訓導敬其請也爲書數言復之孝子家世事實俱載邑乘茲不贅

瀋陽王朝幹書于孝子傳後

予少讀書留都萃升書院客有自文登渡海來者攜擘窠書款曰方石老人時雖未詳其姓氏就書法觀之瘦勁入古已預卜爲士君子之有質行者後十餘年筮仕山左歷宰五縣牧二州每進都人士與稽文獻而所蒞郡邑率去文登千餘里夙所服仰如方石老人者亦無由致詳焉今年移守濟南郡學官于君泉南余同年生也工草隸諸生以卷軸乞書者無虛日與之語輒稱謹守家學傳先人筆法因進讀其家乘乃知泉南尊甫卽海右所稱方石先生者也先生諱令蒞字箕來廬墓方石山中自稱方石學者因稱方石先生云先生性至孝廬墓後四十餘年每見農人販夫有怙恃者輒流涕悲不自勝又嘗謂所親曰凡人沒於親在之年雖老彭亦殤子沒於親終之後雖殤子亦老彭嗚乎仁孝之言乃至此哉予因自幸向者見其書法謂有質行洵不誣也古人謂精一業者可進於道則道之備者宜於業無不精如方石先生本其仁孝之心形於筆墨自有超乎流俗壽之千萬世可以共見固知先生不僅以書重而凡重先生者益重先生之書也予於先生之書遇之二十年前預卜其心迹而今日乃得聞其詳是則予之私幸者爾余既有表彰文獻之志而又與先生爲年家子因爲書其卷尾以抒平時嚮往之意以告世之讀先生家傳者並以告世之知有方石老人書而未讀方石老人傳者

濰縣張昭潛書方石老人逸事

文登于方石先生以能書名海內其大書尤奇偉能薈萃漢魏六朝唐宋而自名一家鐵畫棊枰亙古無兩余嘗於淡園師家見其書想見其爲人吾友于澤春先生族孫也嘗爲余言有伊縣武弁某赴省謁大僚適有持一紙求售者巨楮也其大不恆有大像爭購之方持不下武弁曰不如界某某縣于方石奇士

文登縣志

卷九上三一

人物二

三

也書法雄一世若得此紙作大書眞偉觀矣大僚熟耳先生名則皆曰然以紙界之歸求先生書先生見紙大喜平鋪於地徘徊其旁者數日既躍然神旺大呼潑墨飛揚蹈厲一揮而成飛鴻戲海四字字大如方几及署尾力若不能勝者擲筆氣絕侍者大驚移時乃甦書既成扁諸內室旣而求之則失之矣澤春又言先生性正直尙氣節重然諾行誼照一方母歿廬墓側者三年以祿不逮親不樂仕進墓側有方石故晚自號方石老人徜徉崑崙山以終老云又言先生沒後尙貽退筆數枝筆毫勁健間嘗用以學書不能倒也偶示老筆工筆工曰此雕毫也聞之吾師能用雕毫臂力必開兩石弓今孰人能用之哉先生諱令蒞乾隆癸卯舉人官莘縣教諭庚戌會試 欽賜翰林院檢討 張昭潛曰澤春天性耿介不苟合於人余心竊異之及爲余道其家世而後知其先澤有然也蓋海岱磅礴之氣東窮於暘谷昌黎所謂氣之所窮必有魁奇忠信材德之人生其間當不虛也方石老人儻其人歟澤春又爲余言方石老人長子諱書佃世所稱泉南先生也能以書法世其家方石老人雄奇恣肆泉南公迺深細秀穩善承家學嘉慶庚申舉於鄉仕濟南府訓導撫軍某公悅其書箋札皆倩公爲之公頗以爲煩撫軍知其意怠也更以甘言餌之公怒旣而遣其輿臺要公公曰余豈若輩家奴耶卒不往歷下有孝廉某素無行其父嘗以忤逆首之官以是爲清議所窘某故巨富思藉公書以自重一日潛遣人謂公曰某慕公清德久矣公儻爲書一軸紙尾署其姓字呼爲某兄某當以五百金爲壽公大怒面唾其人而去公有弟名書傑亦工書書法絕類方石老人而行草奇幻又別出一格隱居不仕結廬崑崙山中善飲酒酒酣則馳馬峻坂放懷溟渤之界間仰視飛鷗盤辟上下因捫胸大笑以自豪輒歸作擘窠大字往往有大鵬垂雲金翅劈海氣概不幸中年墮馬死泉南

公遂獨以書名世

徐文焯諸生祖肇芳官周南驛丞文焯正直剛方孝友敦篤鄉黨化之

以孫士林贈通奉大夫河南布政使家傳

徐之淮字桐柏文煌子天性孝愛積學有素以父母宿疾遂絕意求進與夫人鞠氏同心竭力侍養老而孺慕勿衰宗族鄉黨稱為雙孝贈通奉大夫河南布政使子士林官江蘇巡撫以病告歸行至淮安自知不起遺疏 奏曰臣故父之淮同耄母鞠氏一生貧苦奉侍臣祖父母臥病十餘年事皆庸行而盡心竭力歷久不懈感動路人咸稱為孝臣在河南藩司任內恭遇 覃恩誥封每欲敍具孝行請 旌父母輒正言斥止今臣臨歿而不為陳請不孝滋甚伏乞 皇上錫類鴻慈 御書匾額 特賜旌廬俾草野潛修仰荷 宸翰表揚則臣雖死之日猶頂戴 天恩於無極乾隆七年 御書潛德遺庥暨雙孝永傳字建坊旌

文登縣志 卷九上三

人物二

四

表祀忠義祠

生員叢煜杲採

徐士林父母孝行事略

士林父諱之淮字桐柏號守齋母鞠氏以士林汀漳道任內 誥封士林父讀書攻苦未成名三十歲後因祖父母年邁多病朝夕不忍離遂不就試同母事祖父母一生無違言無違色祖父中風六載不能言語亦不能步履士林父母晝夜護持凡飲食坐臥及一切喜怒哀惡會意將迎無不暗合及疾革瀉洩三月手掬其溷澣其衣從不假手他人祖父臨終時凄然淚下索紙筆作書曰吾兒吾婦於吾無憾矣惟天報汝姻亞旁視者無不灑涕祖母末年患嗽兼失明士林父母親手哺飯起居扶之家貧如洗必私藏甘旨以供衰親夜間聞嗽聲即起炊啖以口食嗽止乃就寢一夜不下十起十年於茲矣癸未大荒舊菴稻米三斗日供祖母饗殮祖母問曰汝等何食士林父母答曰皆稻飯實乃咽稗糠茹枯葉闔家病饑並不令祖母知也宗族鄉黨皆稱為雙孝云今老父謝世老母在堂茅廬數間即士林父母事祖父母舊地也伏乞老夫子大人賜以匾式題雙孝之廬四字附以小傳不特闡發幽光且使世世子孫知所矜式感且不朽其月日可題十月以前蓋乞匾愚誠八月內已稟報老父老母矣
父雖沒士林固不忍沒其父也

徐士林字式孺之淮子康熙癸巳進士由教習授內閣中書遷刑部主事改禮部主事晉員外郎出守安慶府治獄精審下無冤民陞江蘇按察使降補汀漳道乾隆元年陞河南布政使以父病請假旋丁憂服未

閱 命署江蘇布政使以母病八旬且父柩未葬懇免許之四年正月
命由本籍前往江蘇以布政使護理巡撫印士林復以母老病篤不
能暫離陳奏請俟母病稍愈自行奏聞會母病漸痊語之曰徒以吾病
屢瀆 聖聰今我已能飯尚不果行是欺 天也違制不忠違母不孝
汝將何居乃惶恐就道四月來京授江蘇布政使遂單車之任村僕三
人行李一囊而已五年陞江蘇巡撫六年四月以病請致仕奉 上諭
已遣太醫前往診視本應照所請行但此任甚重一時實難得人汝可
念朕苦衷爲朕勉強辦理加意調攝六月復以病體日重心氣虛耗臣
年五十有八臣母八十有三夢魂驚悸寢食靡甯懇請給假得 旨俞
允行至淮安卒遺疏入 諭曰徐士林學問素裕忠孝性成因母老遠

離不受妻孥之養鞠躬盡瘁以致沈疴聞解組之音力疾旋里以圖侍
母臨終之際無一語及私勸朕以憂盛危明之心爲久安長治之計此
等良臣方資倚任乃今溘逝實朕切切含悲不能自己者也著入京師
賢良祠 賜祭葬如例士林居官三十年清勤敬慎坐臥處布衾木榻
有人所不能堪者嘗以元旦疆臣多進方物士林獨進典謨要義一卷
奉 硃批云語不云乎贈人以物不如贈人以言也其知遇之深如此
詳載 國史例傳著有岳山集祀鄉賢祠安慶江蘇名宦祠京師賢良
祠弟士楹字甯君乾隆丙辰舉人兄卒僚友爭致賻士楹皆卻之壬戌
會試榜猶未發因兄蒙 恩賜給祭葬呈請代謝 天恩三月三十日
奏入蒙 恩召見本日禮部奉旨徐士林任江蘇巡撫時操守廉潔囊

橐蕭然身後各督撫資助喪費伊弟徐士楹一概未受是其恪受家訓克承兄志甚屬可嘉著賞賜進士準其一體殿試後任電白知縣電白縣志士楹乾隆十五年知縣事清潔持躬衣履舊敝視民如子尤善培文風見生童俊秀可造者勤爲教養以邑中科第未盛擬修風水爲論數百言欲改建文廟城門以振士氣大功未舉以辛未夏卒在官甫及一年士民咸傷環署泣涕

先正事略徐雨峯撫軍傳

雍正八年 詔立京師賢良祠祀開國以來元勳魁輔褒德酬庸典至隆鉅凡閣部大臣非有殊績奉特旨皆不得入其後以巡撫入祀者得二人其一爲徐公士林一爲潘公斯棠兩公皆年未六十未竟其用而徐公先潘公十一年首膺祀典尤異數云公字式孺號雨峯山東文登人家故貧公幼聞鄉塾讀書聲慕之跪母膝前曰願送兒入塾中如所請遂舉康熙五十二年進士由教習授內閣中書雍正二年遷刑部主事四年遷員外郎五年授安慶知府十年擢江蘇按察使坐失察私鑄左遷汀漳道漳俗械鬪殺人捕之輒聚衆據山或請用兵公不可命壯丁分扼要隘三日度其食且盡遣人深入誦以好語曰垂手出山者免如其言果逐隊出乃伏其讐於旁讐大呼曰爲首者某也立擒以徇衆驚散自後捕犯無據山

文登縣志

卷九上三

人物二

六

者乾隆元年遷河南布政使丁父憂 命署江蘇布政使公以母病八旬且父柩未葬懇辭許之四年命以布政使護理江蘇巡撫公復奏母病篤不能暫離請俟母病稍愈自行奏聞是年四月入京 高宗召對問山東直隸麥收若何曰旱且麥間得雨如何曰雖雨無益問何以用人曰工獻納者雖敏非才味是非者雖廉無補上深然之補江蘇布政使五年夏疏言頃見湖廣資送山東流民經過兩江數日內至三千有奇恃衆逞刃有司受其需索商民畏其糾擾臣愚以爲有田可耕之災民亟宜資送復業其原無恆產願在外傭值者應聽其便至遊惰無業之民請概停資送庶災民得行旅之資刁民無聚衆之擾或謂無籍窮民恐流而爲匪臣未聞不爲匪於本籍獨爲匪於鄰封者也亦未聞眞爲匪者遞回原籍卽能務本力田而不復潛至鄰封也安分則撫綏之犯法則懲創之是在地方吏處置得宜而已 上聽其言下九卿議行尋授江蘇巡撫先是湖北巡撫崔公紀以湖廣舊食淮鹽自雍正元年議定價值後遞年加增實爲民累疏請核減 廷議令各督撫詳議各持己見議久未定至是請 特簡大臣往會核 詔公會同新任鹽政確核定議公言鹽爲民食所資貴固累民賤亦累商今確核成本每引賤價以五兩三錢餘爲率貴價以五兩七錢餘爲率仍請每引酌給餘息二三錢以紓商力疏下部議成本應如所定至餘息諒已攤入成本內毋庸酌給公具疏堅持原議 特旨允行五年徐海水災奏賑之明年春酌借貧民穀麥以資耕種沛縣災尤重疏請接賑又言江蘇社穀積貯無多續勸捐十餘萬石 上嘉之尋以病請告 優旨慰留 遣御醫往視又疏言淮北被水二麥無收臣不敢泥成例已先飭藩司撥帑賑濟俟查明成災分數具題得 旨如此辦理甚副朕視民如傷之意六月病益重且以母年八十三不能迎養寢食難安懇請給假得 旨俞允九月行至淮安卒年五十有八遺疏入 諭曰徐士林學問素裕忠孝性成因母老遠離不受妻孥之養鞠躬盡瘁以致沈疴聞解組之音疾歸以圖侍母臨終之際無一語及私勸朕以憂盛危明之心爲久安長治之計此等良臣遽聞溘逝朕實切切含悲不能自己也可入祀京師賢良祠以爲臣工勸導賜祭葬如例遺疏奏故父之淮母鞠氏孝養祖父母臥病二十餘年歷久不懈懇

賜表揚有 旨令地方官題請 旌表九年江蘇巡撫陳公大受奏請入祀蘇州名宦祠公治獄如神任刑部時有二人伐木塞外木標乙斃有司訊結矣越三月乙弟以謀殺控甲甲逃公曰置當場死者之妻孥不問而以三月後局外之人與獄乎甲逃懼累非懼罪也甲聞出獄果虛知安慶時宿松孀田氏事姑孝兄公利其產逼嫁之與羣匪篡焉婦刎於途以墜水告公坐堂皇見黑衣女子啾啾如有所懇拘兄公質之則毛髮漸灑口吐實公深愧以鬼道設教而滿庭胥隸皆有見聞不能掩也每守令來謁輒具獄命判試其才且曰深文傷和姑息養奸戒之哉夫律例猶醫書本草也其情事萬端如病者之經絡虛實也不善用藥者殺人不善用律者如之每獄獄定必先摘大略牌示始發繕文册吏不得因緣為奸性廉儉撫蘇時宴僚屬滄浪亭以五簋為度吳俗丕變賈長至節天寒裘禿按察使包括以貂裘假公公披之如忘涕唾交揮家僮耳語曰此包公衣也公惶然少頃論公事快揮灑如初聽訟飢家人供角黍且判且啖髭頰盡赤蓋誤硃為鉛筆箸交下不能復辨晚坐白木榻一燈熒然手批目覽雖除夕元辰勿輟幕下客憐之治具觴公公猛噉不問是何精膳其平素精神夢寐知愛民憂國而已故於服食居處人以是供公以是受泊然無所容心也文覺禪師來江南督撫將軍以下負矜矢屈膝公不為動會議楚鹽時或勸公讓鹽政主稿公曰問心公私耳何嫌之避時內外大臣噎媚不前而公疏先上乃附紙尾以進公於鄉會試師門惓惓不忘曰此人生遇合之始也至要路則終身未嘗通一刺

黃叔琳江蘇巡撫徐公神道碑銘

國家崇德報功特設賢良祠於京師以風厲天下乾隆六年秋奉 旨以江蘇巡撫徐公入焉嘉忠孝也是秋九月十六日公請假回籍舟次淮安疾革夜起草遺表敬授使者遂卒及表上 天子覽之震悼乃有是命公於去年卜葬於九頂山予已誌其墓今秋其季弟以謁選來復有神道碑之請曰神道神明之也公既獲祀則瞻望新阡靈爽憑焉自不得與他墓表比竊惟我 朝定鼎百餘年矣名臣輩出而與於賢良祠者元勳國老之外殊寥寥焉猶且下其議於禮臣覆核再三然後得定蓋若斯之難也獨公以一

文登縣志

卷九上三

人物二

七

朝遺疏感動 宸衷眷念良臣遂加特典豈不異哉豈不異哉蓋公一生大概不外於 聖天子學問有素忠孝性成兩言而此兩言者固自昔名臣之所謙讓而未遑也非此則雖才猷經濟震耀暴表皆末耳惟公質粹養遂專用力於本原之地故自筮仕以來無立異無苟同獨此誠實不欺者有以結 聖主之深知曲體於生前而邀榮於沒後遂儼然躋諸元勳國老之列而不疑此可為千古用人之法傳諸史冊猶應為之感激而咨嗟者也按公在 世宗憲皇帝時厥歷中外清勤盡瘁天下仰其忠及 皇上登極終喪養母疊疏陳情天下欽其孝要之忠以孝成孝由忠著舉人之所難兼者而公獨兩全而無憾抑亦公之所遇使然歟公少無宦情自成進士後即引歸養志贈翁日以大義敦勉之乃出意謂及時展布以無忝於所生迨十年後即可奉身退耳故由中翰歷刑禮二曹定讞詞議儀制常侃侃力爭獨署名以進以及勘寶坻縣災狀視文安縣隄工雖觸暑衝寒晝夜罔息尤以廉介自勵曾頒賞安南國事訖不受一縑而守安慶時尤著於陋規革除殆盡又未有養廉疏食菜羹晏如也惟以民生之凋瘵為己戚所屬饑輒假便宜發倉減糶臺議以節禮補虧空力爭之卒得寢其強執如是及擢臬司惟明惟恕謂鹵莽拘牽者皆不可以折獄一時歎為名言無何以前任失察鑄調汀漳道恩威並濟武弁協和悍俗感格當是時贈翁及太夫人皆老矣初公在安慶去所居千里而近迎養於署者兩年贈翁喜曰吾來觀汝政耳今若此復何憂吾思故鄉風土趣發裝公堅留不獲心常快然迨由吳之閩道益遠不復就養公恆望白雲而流涕曰王陽何如人哉乾隆元年 上知公名特召至中途即有河南方伯之命及 陛見嘉獎逾常趨赴新任公連遣使迎贈翁終弗許時豫省方報陞新科盈億萬頃往往有以舊業報新者民不堪命公為分別則壤核實其數小民慶更生焉餘皆滌去煩苛寬以濟猛已聞贈翁抱恙急繕疏請終養 上許之而訃音至矣戴星奔歸形神盡毀太夫人亦老病公杜門讀禮無復出山志 上念江蘇重地方伯非公莫可任 中旨頻頒部文絡繹而公叩天流涕固辭者三 上雖不允命姑緩其期然終不忍罪也及太夫人病漸痊呼公吐曰汝徒以吾故屢瀆天聰今吾已強飯而仍留戀於此天可欺乎違天不忠違母不

孝汝將何居聲色俱厲公不得已入謝因申終養之請 天子爲之動容徐問兄弟子嗣具悉 上曰弟既年長可以奉母汝當爲國宣力乃免冠頓首出遂攜三僕單車以行既之任會江蘇浮糧疊奉 聖恩減至九十餘萬又以旱災并蠲正供百萬諸經費幾不支或有以他策進者公喟然曰吾不能爲聚斂臣知綜核名實調劑緩急而已其恩蠲錢糧務使均沾實惠分戶爲三等不使胥吏高下其手又念淮徐海水厄計其倉儲盈耗撥貯以備緩急湖廣資送流民入境者三千有奇檄文武力爲防護復條奏資送事宜報聞秉藩十月利興弊除治事嘗至夜分危坐一榻一燈熒然僚屬聞之莫不嗟歎蓋公旣以受恩深重不敢暇逸又稍一間靜則思親之切悲從中來亦藉公而忘私之義強自抑制也然公之心病因此起矣五年七月中丞張公調任湖北以公代之乃益爲正人心厚風俗計遇僚屬諄諄告誡惟居心險薄行止輕佻者屏弗用所上百牘無一非切要者奏徐海二州舊漕折色請較市價減輕以紓民力奏淮北夏月被災秋成無望請將極貧加賑五月次貧加賑三月又奏採買不敷食穀因極論前議者停罷之非又奏流通鹽引宜每引加息二三錢以恤商者惠民 上皆嘉納之公方冀風俗人心漸次整理可以將母之情上達 天子而病已不支乃以病狀聞 上猶溫 旨慰留之遣太醫馳視公委頓滋甚再疏始得請竟卒於淮安舟次遺表無一語及私惟以千里相望不得一面老母爲痛而願 皇上以憂盛危明之心爲久安長治之計嗚呼昔人謂令伯一表可並蓼莪武鄉二表同符說命公之遺表殆克兼之所以一經 御覽立降德音而太息痛悼之不能以已也賢良之祀名載旂常不亦宜乎公名士林號兩峯籍山東文登縣世有潛德大父文煥值鼎革隱居不仕考之淮同鞠太夫人侍病母十餘年極力盡誠未嘗少懈公之忠孝有自來矣皆以公貴 贈通奉大夫公學無不窺尤酷嗜宋五子書生平不立道學名而歸於躬行實踐於本 朝獨慕湯睢州陸平湖之爲人蓋其學問同也卒與二公並祀於賢良祠云爰系之以銘銘曰文登之鄉名世鍾止九項之峯神靈棲止惟孝惟忠感動 天子省覽遺表唏噓不已追溯生平歷歷可紀何以酬庸賢良是祀 天子曰咨爲彼臣軌匪爵之崇厥德之異視此豐碑永光桑梓

文登縣志

卷九上三

人物二

八

邑人叢洞書徐公神道碑後

嗚乎人生大倫君親兩端移孝作忠子道爲重書稱君陳惟孝友于兄弟克施有政其在詩曰侯誰在矣張仲孝友自來名公巨卿居高位建殊勳能爲一代柱石望德器根基必自孝始吾邑兩峯徐公任蘇撫及辛酉蹇瘁疾篤告病歸卒於淮陰舟次 敕晉賢良祠 賜諭祭葬舉朝卿士大夫榮茲異數稔知公成勞懋績嘖嘖歎服推爲一代名臣最愚考公生平行事及其行述所載竊謂公之遭遇功名世共知之其碩德懿行或未盡著公英敏特達少負宿學膺鄉薦捷南宮由中翰歷部郎銓授太守閱道司而巡撫歷任殊政炳炳耳目甘棠誌愛鼎彝揚麻誠足以榮當時垂後世然恐重其末而輕其本詳其小而沒其大也德行者政事之原性天者德行之根公家世忠厚太先生守齋公性至孝與鞠太夫人奉事庭幃左右就養靡不竭情盡愼公守先型至性倍篤生平修子職體親心懿行卓卓難以枚舉夫惟大端約略可誌公立身端方歷宦途不爲干謁其仕京師非公務未嘗遽與公卿接比爲道府與督撫藩臬交未嘗一有餽送其守身之嚴謹可知也篤於兄弟財無私囊自入官歷道府司院比歲養廉一付仲弟惟所出納翁和中婉曲諷勉其季由泮宮入鄉薦成進士仲亦納粟就名德範可欽其友于之綱繆可知也逮事雙親曲體志事卽一語終身不忘癸巳釋褐歸省太先生諭云努力一官慰爾高曾公恪守庭訓判刑曹守安慶及司院任內慎庶獄多所平反謹保障除害興利豫吳之郊兆民食德其繼述之周至可知也然此猶其常也方其秉藩中州以太先生喪旋里守制太夫人尋卽染病公日夜號慟擗踊之餘並侍湯藥日不交睫者經旬累月無何遽有巡撫蘇松之 命公以母病辭不就職 詔諭再降公復固辭披瀝肝膽情辭愷惻仰冀 聖意一轉得遂戀戀罔極之思迨終不獲 命揮淚北上雖承慈母之嚴命而公之衷腸寸寸欲斷矣及抵任報 國之心彌篤思母之憂益深公以違母而憂卽以思母而病覽其告病兩奏聲與淚俱血沿墨流忠孝之情愴人心目及觀遺疏所陳別無一言及其家事而惟深老母之瞻瞻蓋棺之日永此依依終身之慕沒世不忘爲孝子故爲良臣是以生膺 龍昇之榮歿享俎豆之奉詩云高山

仰止景行行止雖不能至心嚮往之公起韋布致位中丞上邀 聖明之眷而身溢鼎鼐之光其規模固已遠矣然有性天乃有才猷有勳名公之事業不易及而孝德大可師愚故表而著之以明典型之攸存而示吾鄉仕宦之標

山東布政使衛哲治祭大中丞徐公文

巡撫江蘇兩峯夫子既歿之七年哲治以菲材備藩東省東省爲公桑梓里松楸祠墓在焉哲治故舊屬吏也感公生平高義旣以職守不克親奠墓前中心歉歉弗獲自己遂以乾隆十四年三月十六日遣從事官文登縣知縣鄭維嵩具酒醴牲帛之儀往而爲文以致祭其詞曰嗚呼東牟不夜實產舊學乾坤清氣人間先覺公以科甲仕宦三十餘年洊歷中外不僭不忒文章經濟允爲表式待下率屬惟正惟直筆不能盡聊抒一得始公在京典掌綸絲旋轉禮曹錦窠貴資一麾出守皖水驅馳姑蘇總憲白日朱旗監司閩粵多服是宜藩我中州旬宣以時量移吳地遂總千師肅清東海節鉞兼持五蓋示儉變厥侈靡賓興復古勸課忘疲諸生濟濟口指手披綢繆陰雨積蓄防飢庶僚聽命風俗潛移士勵於學民樂以嬉政化大洽胡遽疾辭 帝念公疾敕宣太醫藥餌倍進省視起居 帝念公孝俾歸無遲庶幾夙夜仰慰爾慈胥江于邁舟至淮夷一朝永逝哲人其萎哲治在淮聞訃連而往視含斂涕泣哀思遺表懷君保邦制治 天子念舊贈卹頻施嗚乎惟公文教吳士頌揚惟公善政吳民不忘公愛僚屬官吏激昂公兼忠孝祠入賢良公有令弟連氣同芳公有令子箕裘克光生沒榮哀於公何傷溫潤密栗玉質金相精魄靈氣山高水長顧念在昔承乏長洲囂囂讒口屢欲操矛公實不信杜絕謬悠不惟不信重被薦收公匪私予愛人以德受公訓誨沐公獎植勉竭鈍厯至今職公身雖往公言常識矧在公里拜奠不克追維往年中心怵惻典型日遠小子安則生芻苢芬神其來格尙饗

錢塘袁枚徐撫軍墓誌銘

公諱士林字式孺號兩峯世居山東文登縣父之淮有孝行公幼聞鄰兒讀書聲慕之跪太夫人膝前曰

文登縣志

卷九上三

人物二

九

願送兒置村塾中許之遂舉康熙辛卯孝廉癸巳進士補中書遷刑部主事知安慶府再遷江蘇按察使以失察私鑄左遷汀漳道漳俗鬪殺人捕之輒聚衆據山或請用兵公曰無庸命壯丁分扼要隘三日度其食且盡遣人深入誦以好語曰垂手出山者免如其言果遂隊出乃伏其仇於旁仇大呼曰爲首者某也立擒以徇衆驚散嗣後捕犯無據山者遷河南布政使丁父憂 詔奪情巡撫江蘇公不起服闋入都 天子問山東直隸麥收幾何曰旱且萎問得雨如何曰雖雨無益問何以用人曰工獻納者雖敏非才味是非者雖廉實蠹 上深然之補江蘇布政使尋遷巡撫未一年病病中念太夫人年高不能迎養三上疏乞歸 上許之行至淮安薨 天子震悼命崇祀賢良壽五十有八公要路不通一字而於鄉曾師門惓惓不忘曰此人生遇合之始也治獄如神任刑部時有二人伐木塞外木標乙斃有司訊結矣越三月乙弟以謀殺控甲甲逃公曰置當場死者之妻子不問而以三月後局外之人與訟乎甲逃懼累非懼罪也甲聞即出獄果虛知安慶時宿松孀田氏事姑孝兄公利其產偕嫁之與羣匪篡焉婦刎於途誣以墜水公坐堂上見黑衣女子啾啾如有訴召兄公質之則毛髮漸灑口吐情實公深愧以鬼道設教而滿庭胥隸皆有見聞不能掩也凡讞決於憲轅絕人影射守令謁者具獄命判試其才教曰深文傷和姑息養奸戒之哉夫律例猶醫書本草也其情事萬端如病者之經絡虛實也不善用藥者殺人不善用律者如之性廉儉而絕不自矜賀長至節天寒裘禿霜與涕俱臬使包括以貂假公公披之如忘涕唾交揮家人耳語曰此包公衣也公大慚謝過少頃論公事快揮灑如初聽訟飢大呼點心家人供角黍且判且啖少頃髭頰盡赤蓋誤朱爲飴糖筆箸交下不能復辨晚坐白木榻一燈熒然左右案可隱人手披目覽雖除夕元辰勿輟幕下客憐之具美饌邀公公猛噉不問是何名色其平素精神夢寐偃仰唾涕知愛民憂國惟日不足而已故於服食居處人以是供公以是受不容心於豐亦不容心於儉也文覺禪師來江南督撫將軍以下負糶矢屈膝公長揖呼和尚織造海保入獄五月猶狐裘公進葛衣大府訶之公曰罪雖重於律五月不衣裳也如以爲嫌請劾臬使楚鹽不運 詔命會同鹽政覈議或勸讓鹽政主稿公笑

曰問心公私耳何嫌之避請加息以惠商時內外大臣噫娟不前而公章先上乃附紙尾以進公子一人名朝亮生十四年而公薨妻張氏口口口口口口之驕用人先求其直章上人以此朱文端公云銘曰昔湯文正為政江南民化其儉苦節成甘後有繼者諄諄訓詞民或不從且相警警隔五十年徐公至止宴滄浪亭五簋而已蘇城翕然儉且中禮惟余小子憎人講學聞先生風恍然夢覺而言而信信在言前同禱而應應在禱先至誠動物其中有天羊質虎皮類然不然嗚乎徐公今無其倫來非戀爵去非要君儉非矯俗仁非市恩始於立身終於事親正色為秋微笑為春不愛公勤愛公之醇不敬公清敬公之真爰為公銘以示後人

海陽鞠滸書徐中丞宿松田烈婦碑記後

鄉先生式孺徐公知安慶時宿松孀婦田氏有賢德兄公方德利其產偕嫁之約羣兇劫以去婦於途中自刎死誣以墜水事發方德堅不吐實田氏以鬼訴先生雪其冤置諸犯於法自製碑文以彰田氏之節先生任蘇松廉使滸南遊謁於官署讀公所作碑記烈婦得此千載下生氣懍懍矣公日記尙有不盡及者涉怪也試爲子言之余理烈婦獄方德等謬妄其詞將加之三木而日欲嗅恐隸卒或上下其手於是揮諸犯且出俟異日再詢忽覩儀門外有若婦人狀跪伏北向者以示胥役皆無見堂上刑書輩竊語曰得非田氏魂乎余意動硃書田氏字於牌付役循儀門呼之婦遽起尾役後入自東角門至階伏呼之上不應撤簷前炬再呼之則起步伏東楹前問即田氏耶曰諾遂述嫁夫守節年數及拊王氏嫂孤兒事悉合其聲息較生人爲微而歷歷可析蓋儼然烈婦魂也爲之寒骨淒神毛髮竦竦余令道其所以死者則語隱而聲咽審聽不盡了會其意則往復悲訴尤痛心於方德余亦爽然泣下情不自禁時月色皎然其形體不異人惟自肩以上視之正黑類戲劇中鬼物以烏帕覆面者余酌以清茶且慰之曰若所欲言當盡是汝且去吾當置諸犯於法以據若憤懣若節命役執牌前引婦尾後由西角門出轉儀門甬道中猶望見之至大門則滅跡於是堂上下人皆怵息然莫之睹惟某刑房一幼子睹之俗謂兒童能視鬼信然

文登縣志

卷九上三

人物二

十一

與公又曰當爰書初上時余聚會精神晨夕披檢思所以既其實者旬時矣然則烈婦之魂其爲公誠一
所感無疑也獨念烈婦異日力能扼方德之吭俾以其心路石以死而猶有所祈於公何也蓋烈婦所仇
烈婦能報諸幽冥而事不判自神君白於大庭則無以立關誣誕之口而堅億萬傳聞者之信自貞魂一
就公堂方德不待刑而自暴其狀何張王輩之陰猾無不明白呈露則烈婦之捐軀遂志無隱弗昭其焯
焯休光可以徹寰區而昭奔世烈婦緩方德之死而於公是請不憚見形以待清問者或者其在是與又
念烈婦鍾間氣以生其形化其氣常凝而公之聰明正直實爲神所憑依陰陽一氣也雖人鬼殊域而氣
類之觸感而相通彼烈婦之靈爽亦惟具兩間正氣者能召之理有固然無足異者公以事涉於怪不詳
之記中濂謂其事怪而理則常夫怪而不失其常非君子所不道者也故詳述之

蘇州府志士林正直忠厚精明強記先歷刑曹更大郡益明習法令周知情僞擢江蘇按察使凡讞決先
摘定案大略懸示於外而後發繕文冊吏無所容其奸守令進謁者必試以疑難案情觀其才識而教誠
之其起江蘇布政使單車之任村僕三人獲被書籍而已是年 特旨蠲免江蘇正供百萬督臣奏請止
派小戶以惠貧民而田數難稽議紛紛不決公令各州縣檢考徵冊按額銀多寡分三等派蠲議遂定無
所容其上下手民沾實惠就拜江蘇巡撫告誠屬員曲盡居官之道慮吳俗奢靡游惰著條約力勸紳士
爲民表率嘗設五簋脫粟具宴鄉先生於滄浪亭令郡民縱觀俾知節儉務本凡公私苦累知無不言賑
恤淮北水災熟籌倉穀定楚中鹽價等疏皆據實陳奏不避嫌怨素工舉子業課士必拔真才念常平積
貯有限下教各州縣實力奉行社倉法事垂成而積勞成疾再疏乞歸舟至淮安卒得 旨褒卹祀賢良
祠

山左詩鈔傳曰公與余同鄉舉且同出歸安吳易齋夫子之門嘗以弟畜余官刑部侍直 世宗憲皇帝
謂曰爾骨格重他日當爲名臣勉之守安慶日余爲六安州牧每赴省必下榻焉亦每奉委會審部駁大
案公聽斷精緻無不得之情及其得之心而應之手落筆數千言折疑疏滯如見如繪批卻導窾無不應

刃而解撫軍程君元章深倚重之數委署臬司活人無算而無一倖免者撫軍陞浙江制府臨行以三人薦驛鹽道陳公宏謀公與余也陞江蘇按察使左遷福建汀漳道陞河南布政使丁外艱歸里起江蘇布政使請終制許之服闋再起江蘇布政以母老請終養不許詣闕再辭上慰遣之問何日起程公對曰臣行李一肩僕從數人明日便可就道上為嗟嘆久之抵任年餘陞江蘇巡撫又年餘力請終養歸卒於途崇祀賢良祠及安慶江蘇各名宦祠政績載國史公學淹貫博通工制義於詩非其所長存蟬餘集一卷高西園為公寫玉山特立圖小照時余奉命出塞已就道公遣使即舟中索題詩云歷官聲譽滿長安特立如君覺更難直與巉巖爭磊落還教冰雪讓清寒里謠久訝龍圖近異相應從麟閣看骨格不緣天付與品題爭得重金鑾將母三辭鑒至誠旬宣強起為蒼生惟憐恩重功難稱豈羨名高官易成幾郡流亡纔撫集何時官吏共澄清自從秉節臨江左白髮新看添數莖此傳盧見曾所作鄉園憶舊錄曰文登徐士林官刑部侍直世宗憲皇帝云爾骨格重異日當為名臣公少時家苦貧夫入張氏紡績供膏火府院試往返數百里徒步行道經福邑東關有梁氏者夜夢有鳳凰自東來心異之翼日候之門外日薄西山公自東來足重爾梁氏觀其氣貌非常人曰此即鳳矣因款留且厚贈之公自貴至老待梁氏禮有加其陞江蘇布政使也丁外艱服闋以母老辭不允赴任時僕從三人襆被書籍而已吳俗奢侈公宴鄉先生於滄浪亭設五簋飯脫粟郡民縱觀咸知節儉至今江南設盛饌必先有徐公宴云官中書有句云歸來惹得山妻問侍女薰香近有無陞江蘇巡撫袁子才謂繼湯文正公之後一人而已蘇州府志士林正直忠厚精明強記歷更大郡更明習法令崇祀鄉賢安慶江蘇皆入名宦此真不愧為鳳矣

徐士林進二典三謨要義疏

為奏明恭進事竊臣海隅下土蒙皇上天恩畀以封疆重寄寵榮逾格訓勉勤拳夙夜撫躬報酬無術茲者恭逢元旦普天同慶臣職任外吏理當進貢方物稍伸臣子戀主之忱伏念臣仰荷皇上

文登縣志

卷九上三

人物二

十一

特達之知一身以外寸絲粒粟皆叨祿縉養尚有何物堪以奉貢惟烟烟臣心願我皇上德隆堯舜治邁唐虞延萬世無疆之景福披陳丹陛庶或抒臣獻曝微誠臣幼習尚書謹擇典謨要義倣廷臣經解之例推衍五篇具表繕册恭進惟是臣素治舉業於聖功王道之廣大未能精究祇就愚臣欲進之言藉經義為靖獻敷詞淺陋知無當精義於萬一伏冀聖慈垂察愚悃敕賜留覽臣曷勝惶悚榮幸之至為此恭摺具奏仰祈睿鑒臣謹奏奉硃批語不云乎贈人以物不如贈人以言也

進二典三謨要義表

奏為敷陳典謨要義仰贊昇平景運慶值元辰恭呈睿鑒謹奉表上進者伏以聖學誕登溯堯舜中天之盛皇猷丕煥覩勳華復旦之麻體元德以乘時淑氣與卿雲並麗秉鴻鈞而播化仁風偕春日同和惟宥密之精神欽承於有本自豐功之亭育咸若乎羣生聿當始和布令之辰謹循太史進書之典用緣蠡測敬獻葵忱臣誠惶誠恐稽首頓首上言臣聞微言大義尚書為立政之宏規明道開天典謨乃治人之宗旨溯昔日考言詢事親傳古帝之心即盈廷珥筆製詞皆屬聖人之手是以抉其精奧雖百家疏註未罄淵源而揆厥旨歸則數語提綱可陳機要聖功浩浩能盡其性本神明以默成神謨洋洋樂取於人具鼓舞之妙用覽民風渾噩府事勿倦於修和頌君德聖神幾康更敕以兢業曰咨曰傲皆屬言拜手之心聲乃賡乃歌即光被時雍之雅奏攬鴻篇於方策義屬兼綜陳巨目於簡編辭堪縷晰蓋致身願同稷契而稽古期助高深欽惟皇帝陛下功崇時敏德懋日新丕顯丕承綿億萬年之景運惟精惟一宗十六字之心傳用人行政之方勤求上理撫世誠民之道曲成不遺舉四海六合而作之師會千聖百王而建其極生安自全乎資稟學問日粹於懋修而猶夙夜嚴恭祇膺古訓朝夕乾惕用顧民庸常持敬勝之銘永履無逸之戒廣開視聽採錄恆及於片長愛育黎元諮訪每殷於庶績事循彝典而綏猷錫福之道必廣運宸衷政切民依即用飲食之經亦受裁睿慮制治要於久道容保無疆慎德懷乎永圖至誠無息羣工敬聞誥誡共勉泰交大化咸致和平猶申異命履郵隆之盛

治維迪吉之遠謨 緝熙光明遜志而典於學 温恭允塞研幾而說諸心仰惟 帝德之崇深誠何從以襄贊伏觀 聖心之廣大曾不棄於庸愚臣奉職宣揚忝司敷納學媿雕蟲刻楮未窺經籍藩籬業勤編柳截蒲豈測聖賢堂奧而涓埃思報恆緘縷微沈遭遇莫儔願效區區一得非唐虞之治不敢達於宸聰惟典冊之文敬用呈於 天鑒體例略遵經解對揚俯竭愚衷舉其要五端錄其詞如左首以欽明文思謹陳峻德之全功繼以明目達聰克廣奮庸之盛績保民莫大於養裁成輔相今古同揆爲政必本諸身悠久貞恆後先一轍昭秦階之豫順永著休嘉徵又字之驟和恆歌喜起不自揣其罔識謹論述於諸條敢援詢於芻蕘之言或符謀及庶人之義首時拜獻期上佐 首出之功元日敬陳冀仰承 元后之訓伏祈 鑒其誠悃 察及邇言 垂濬哲之神披臨端緒 廣疇咨之道採擇細微列諸奏章寧敢塵於乙夜西山之架備諸封事庶得附於史箴矇誦之班臣無任瞻 天仰 聖激切屏營之至謹奉表隨 進以 聞

欽明文思安安

臣謹按虞書不言性而欽明文思一語實爲後世言性之宗欽卽性之嚴肅明卽性之虛靈文卽性之條理思卽性之運量仁義禮智渾然畢具分之則爲小德之川流合之則爲大德之敦化堯統而備之無虛假無間斷無勉強故贊之曰安安安安者性之也夫天下無性外之德亦無性外之功舍德性以言功或騁駕馭之才或尙粉飾之具運世無本設施皆虛勢不流於功利維霸不止堯爲繼天立極之首聖堯典爲開宗明義之首篇史臣探本立言誠慎之也且性有實體焉有實用焉堯之推行化裁於家國天下中者俾典庸禮何一非欽知明處當何一非明經緯咸宜而睿慮悉周何一非文非思推之觀象授時而天地察鳥獸若登庸若采而取舍慎予奪公又孰非欽明文思之所流露者乎蓋至誠能盡其性則能盡人之性參贊位育皆是道也堯典一書不獨爲大學之宗亦卽爲中庸之祖贊堯德矣而必首冠以欽者何敬者德之聚也敬則靜虛靜虛則能照物明非苛察也敬則篤實篤實則有輝光文非煩縟也敬則深沈

文登縣志

卷九上三

人物二

十一

深沈則無微不入思非游移也是故唐虞之世君咨臣儆交贊一堂無非以欽相終始也遞傳三代曰祇台德先曰聖敬日躋曰緝熙敬止曰執兢維烈無非以欽相接續心法也道法也卽治法也先聖後聖其揆一也或謂堯德安安堯固無事於學乎是又不然十六字之心傳闡之自舜實啓之自堯精一執中非卽聖人之實學乎然聖學仍不外乎一欽何也惟欽故精惟欽故一惟欽故中堯之安安卽兢兢業業之極致而已然則聖性聖學聖德聖功一以貫之者也

關四門明目達四聰

臣謹按帝王之治天下惟以一人之精神息息與天下相流通而已蓋天下猶一家也一家之精神不相浹則不能理一家而天下可知天下猶一身也一身之精神不相攝則不能理一身而天下可知是故賢路不可不廣也道在關門民隱不可不通也道在明目達聰或謂舜攝位二十八載若朝若野綱舉目張以佐延訪何賢不登以佐阜成何民不惠乃卽位之始仍汲汲然以此爲先務者何蓋聖人體天地生才之心以爲心雖俊又咸登不敢謂野無遺賢也體天地愛民之心以爲心雖萬國咸寧不敢謂民無疾苦也且卽聖明之世亦必不能不遺一賢不遺一民運會初開風氣醇古聖君相培養百年士尙實行人砥廉隅上不亟求下無輕應中天麟鳳網羅尤難卽民隱亦多端矣沮洳甫定得母有未奠厥居者乎艱食方奏得母有不給於供者乎象刑初設得母有好究未盡戡獄訟未盡平者乎下一令矣宜於此或不宜於彼施一政矣宜於前或不宜於後君門萬里清問難周此又事勢之無可如何者然而聖人之心則必欲使不遺一賢不遺一民資格不足限世類不必拘轉轉相引不爲嫌非第曰關門而曰關四門不以一人之延攬爲延攬而以天下之延攬爲延攬也欣戚則共察其狀歌怨則共辨其音好惡順逆則共體其情非第曰明目達聰而曰明目達四聰不以一人之耳目爲耳目而以天下之耳目爲耳目也蓋賢才公器也獨任則隘兼收則廣聰明天德也自用則小用人則大孟子稱舜曰樂取於人以爲善其謂是與然則舜其任衆不任獨乎曰非也敷納以言明試以功有登庸之門無倖進之門也執其兩端用其中於

民作我耳目弗能淆我明聰也虛則公公則明明則斷此舜之所以爲大知也夫
德爲善政政在養民

臣謹按聖人以仁育萬民義取諸養而養又非必家給而人賜之也聖人因天之道則地之宜盡物之才節人之性裁成之輔相之而萬民無不各得所養此中天六府三事之政萬世所以永賴也至後世養民之政愈備而養民之政愈難何也古之時土廣人稀生之數多於食之數後則生齒日繁矣百畝之家閭三世而分授之一夫將不及十畝其養之難者一古之時風俗儉樸蓄之數多於用之數後則浮靡日興矣婚喪宴會服飾器皿一日之費或且耗中人之產其養之難者二古之時授田維均民無大富亦無大貧後則田在民不在官矣富者擁膏腴而貧者無寸產其養之難者三於是水旱告警議賑議蠲民不足而取諸君因時補救亦理勢之不得不然者也臣竊謂謀養於臨時不若謀養於先事以君養民不若仍使民各自爲養此其道不外乎勤以力農儉以積穀仍佐以酌劑虛盈之法而已嘗見連阡共陌之田肥磽非有懸殊而糞多力勤耕耘以時者所獲倍之人力可爭地利也儉蓄蓋藏之家豐年無美食而荒歲亦無菜色人謀可勝天時也勤儉之效不大彰明較著與至於酌劑盈虛莫善於社倉之法官貸民必多假冒民貸官必受追呼民與民貸必出倍息惟社倉無此三害且勸捐於富民而貧者得以資緩急真多益寡此亦不均而均之義也雖然察其勤惰示以勸懲非僅循行故事也敬禮老成風示節儉非可遽以法繩也勸捐輸禁擾累公出納防侵漁事貴經久非徒目前苟且之計也是必親民之官以實心行實政謀民事如家事爲之上者又復示之以寵異寬之以歲月俾事習而民信即中材亦可以奏功漢代循良加秩賜金不易其任而治績獨稱盛者此道得也獨是府事皆言養而必及正德者何正人心即所以培國本教固不在養外也九功敘九敘歌矣而必終之以戒休董威者何民力可使之舒民氣不可使之驕刑與賞皆所以維養之道於不窮也旨哉大禹養民一言聖人立政之義備矣

慎厥身修思永

文登縣志 卷九上三

人物二

十三

臣謹按孔子言九經首舉修身帝王端本之治誠莫此爲急也顧人主修身與士庶異聖主修身尤與英主異人主之身天下共見之身也以一修統衆修一人而實繫萬方之觀瞻聖主之身天下共信之身也即已修常如未修百密而猶切一疏之兢惕此其道要於永誠於思而實本於慎慎者何謹幾而已幾之爲言微也天下事未有不起於微者幾之爲言獨也天下事未有不始於獨者方其深宮默處內念初興天人理欲介在毫芒天下臣民所不得而窺也而皇躬於此分得失萬民於此分安危國家於此分治忽蓋幾之所動有諸中必形諸外發乎邇必見乎遠未可以瞬息忽也聖主修身極於盡性至命而必先以誠意正心清明在躬矣而不敢忘儉約誠恐嗜欲偶萌玩好即足傷民物之氣愷悌宅衷矣而不敢忘忠厚誠恐涼薄偶啓綜核或有違天地之和知戲渝之宜絕則嘖笑不以假人知志氣之宜清則燕昵不以弛已知滿假之宜戒則雖治定功成而不敢以自足而少怠細行必矜小務克勤凡防微杜漸而所其無逸者皆所以謹其幾也既謹其幾則存養於幾先與省察於幾後者不待言矣故曰慎也且人君可大可久之業所恃以運量於天下後世者唯以心耳心不足以攝一身則矜情作意雖以持一時而不足心誠足以攝一身則精明強固即以歷百世而有餘易有之天行健君子以自強不息不息者永之謂也所以聖主法天基命宥密無欲速無苟安無謀近功無圖淺效耳目之所不能及者精神及之時地之所不能通者念慮通之慎生思思復生慎有循環而無絕續所謂終始惟一德乃日新者此物此志也即極之聖謨洋洋奕禩奉爲著蔡聖功浩浩百代遵爲典型作君作師被天壤而光史册者在聖主止自完其修身之量而已臣竊以爲有虞之世四方風動致治極盛矣而皋陶仍以修身爲言者有盛德乃有大業勿忘本圖也勅命時幾聖學無疆矣而皋陶仍以慎修思永爲言者天地之量翕關日新德無終窮而道無止境也皋陶一謨言修身則曰慎言知人則曰兢業言安民則曰寅恭總之虞廷之心法一欽而已矣

元首明哉股肱良哉庶事康哉

臣謹按孟子之言曰責難於君謂之恭其說似創而實自虞廷始舜以股肱先元首君勉臣也皋陶以元

首先股肱臣勉君也夫大舜何如主也重華協帝南面垂裳法度彰禮樂備府事治民物利爲之臣者雖有嘉謨莫贊高深意惟有歌詠太平頌揚聖德已耳乃皋陶仍殷殷致勉者抑何願望無已而告戒之過切乎臣以爲此皋陶忠愛之誠發乎情之不容已而動於性之不自知也夫人心有所甚愛敬之人則必爲之稱道之詠歌之無已則又爲之勸勉而做戒之卽至德崇業廣而期望之意終無究極性情之地因愛生忠有相迫於不覺者又况以皋陶戴舜其一德交孚性情相深之際有遠出於尋常功名爵祿之外者乎是故精益求精益求密崇益求崇深益求深祇覺目中之聖德有定形意中之聖德無盡量今日之聖德其已見者有徵而將來之聖德其遙遙想望而莫罄者尙無以逆測其所至也歌曰明哉試問其所謂明者爲何境爲何象卽皋陶亦有不能名狀者但曰明則良良其康予小臣不能無望於元首云爾忠之至愛之至也故曰發於情之不能已而動於性之不自知者也乃臣竊謂以勸勉致其忠愛者惟聖臣而以虛公發其忠愛者實惟聖主上天下澤君臣之分藜嚴矣而元首股肱之喻發之自舜則直合堂廉爲一體聯上下爲一心千載而後猶有聞而感激者况身爲廷臣者乎蓋天下有聖不自聖之君然後有治益求治之臣舜當治定功成之日咨嗟誥誡愈屢虛衷其至誠惻怛卽足以發人藹然油然而心而鼓舞振興更足以動人翻然勃然之氣以皋陶之性情忠愛甯僅曰予未有知思日贊贊襄哉已耶正言不足而反言之誠有不自知其望之何以切而言之何以長者矣臣於此悟天人理欲之幾焉君弗諫臣貢諛人欲也君納言臣弼直天理也中天之世君曰咨臣曰做臣以中材之策勵勉聖主而不以爲嫌君以首出之聖神受直言而不以爲忤盛世君臣渾然天理其世俗計較之私毫髮不得而參之是之謂眞明是之謂眞良所以萬事就理治登郵隆不第稱小康已也儒生讀書懷古每謂虞廷賡歌盛事難再一旦躬逢景運目親休明瞻雲日之采聞都兪之聲旁皇自顧不知當置身於何等也

徐士林乞解職養親疏

臣自前歲 陛見蒙 皇上諭以臣子大義跪聆之下感奮交集自念臣母老年多病陸路斷難迎養所

文登縣志

卷九上三

人物二

十四

以弟姪妻子俱留侍母臣子身官署雖不敢居移孝作忠之名實自矢以身報 國之志詎意上年十月初六日會勸海塘感寒作惡回署輒患下痢入春以來氣喘不寐醫未奏效然臣強自枝梧不敢偷安并不敢言疾蓋念 主恩深重病痊可以圖效且恐傳聞家鄉重貽衰親之憂也乃今本月初十日拜疏之後忽坐立不能自主雖力疾視事而神思恍惚如在雲霧自知蒲柳弱質素失調養非日夕所能奏愈封疆重任江蘇要區事無巨細皆關 國計民生卽精明強固尙恐一時疏忽乃以孱弱之軀勉強從事必致有負 皇上委任之重臣身縱不足惜而貽誤地方如臣職何且臣母八十三歲景同風燭拜違二載衰邁愈增儻臣母聞知臣病其牽腸憂念更不知作何景象是臣旣不能報 國又不能事母徒以病軀而痛傷耄母之心言念及此臣心如刺臣罪益深臣病亦輾轉滋甚仰惟 皇上錫類深仁體恤周至伏乞 聖慈恩準解職另簡賢能接任俾政務不致廢弛臣得就閒侍母調養病軀永戴 高天厚地之恩儻臣奉母天年一息尙存決不敢自圖便安以負 聖主隆遇則又臣之永矢寤寐而不能一日忘者也 謹 奏

徐士林復請解職疏

臣念 君親兩大恩義並隆若受 國厚恩在父母且不能私有其子臣子何敢私有其身然臣上念 君親恩重下顧病體根源有不得不瀆詞陳懇者蓋臣病總因心氣虧損脾胃受傷自上年十月服湯藥兩月繼而不能下咽醫家謂脾土惡溼宜改用丸藥究未能見功今候太醫診視自能精鑿病源然欲期速效必用湯藥而脾胃不能受必仍用丸藥臣起病至今已閱八月始而嘔瀉繼而眩暈氣喘從前日進糜粥一二甌今且厭而思去臣知受病根深非藥餌所能日夕計瘳者也夫臣之所恃以仰報 君恩者祇此心耳巡撫衙門無一事不當用心無一時不當用心臣材質愚鈍惟習慣勞苦事無巨細皆躬自裁決數月以來獲苓罔閒而委頓日甚者獲苓之功能助而不能生藥餌一日之補助不抵心血一時之耗散邇日披閱案牘心神散漫搖搖若不能定是臣之心病矣心病而愈用愈不能補將竟至於不可用鮮

有不貽誤地方者是臣假不敢偷安之名致貽誤地方之實重貽 君父焦勞臣罪更無可道况疾痛則呼父母天性所不能解者臣年五十有八臣母八十有三一日睽離即此生少見一日在官兩載豈能一刻去懷然未病時默制以公而忘私之大義猶可強抑自患病以來起居坐臥時若有白髮垂耳之龍鍾耄母在臣心目間是以夢魂驚悸寢食靡甯有不期然而然伏蒙 皇上以父母愛子之心愛臣身臣敢不自愛其身以仰慰 宸衷且以慰臣母所以輾轉思維欲期病愈必須靜養然在官一日當盡一日之職今未奉 諭旨解任惟有力疾辦理仍哀懇 聖慈矜原臣病根由準令給假回籍乘此未甚危篤之時歸見臣母此心既已就安庶可依照太醫製方調治以期全愈臣遭非常 知遇力圖報稱之心實不能已於一息尙存之日今日之潛陳愚悃正欲保其身以備驅使若借病以求安臣固斷斷不敢出此即病痊而猶然戀母不思報 國爲重臣心亦實切不甯耿耿微忱惟 聖明昭鑒謹 奏

徐士林遺疏

臣本濱海貧寒賦性質直蒙 聖主知遇信任之深畀以江蘇重寄每念盡瘁致身仰副 皇上培養元氣轉移風俗之盛意而學復不充有志未逮辜負 皇上倚用洪恩實萬死莫贖此一刻不敢偷安一絲不敢苟取之愚忱庶幾堪以仰對至於臣子朝亮年僅弱齡隨同臣弟臣妻留家侍母臣季弟聞臣病篤近日來南得侍舍殮臣既離母之官妻孥之念久置度外今日旅邸溘逝臣無所恨惟八十三歲之耄母已蒙 天恩准予歸省而臣既不得奉母天年且千里相望仍不得一見母面以致遺痛母心則 君親兩負臣實飲恨九泉弗能瞑者也伏念我 皇上聖學淵深仁覆海隅誠哉萬世生民之主惟願 皇上念重熙累洽治法大備以憂盛危明之心爲久安長治之計政去其最弊者而勿輕事紛更言擇其可行者而勿遺棄淺近愛民爲本而驕逸之風不可長用人爲要而樸茂之材不可廢慎始慮終惟懷永圖則愚悃拳拳仰冀 聖明留意抑臣更有請者臣故父之淮同耄母鞠氏一生貧苦奉侍臣祖母臥病十餘年事皆庸行而盡心竭力歷久不懈感動路人咸稱爲孝臣在河南藩司任內恭遇覃恩誥封每欲敘具

文登縣志

卷九上三

人物二

十五

孝行請 旌父母輒正言斥止今臣臨沒而不爲陳請不孝滋甚伏乞 皇上錫類鴻慈 御書匾額特賜旌廬俾草野潛修仰荷 宸翰表揚則臣雖死之日猶戴 天恩於無極矣謹 奏

諭祭徐士林文

乾隆六年月日 皇帝諭祭原任江蘇巡撫徐士林之靈曰翊熙朝之泰運端重良臣稽冊府之鴻猷宜崇元祀蓋成勞懋著生平之風概如存斯盛烈昭垂奕世之寵褒益篤載申綸綍式薦牲醪爾徐士林植品端方存心誠實蜚聲杏苑學既裕乎三冬列職槐廳望久彰於九棘吳豫著旬宣之績幹濟多才金闈流節鉞之輝清勤表譽抒忠奉國盡瘁鞠躬臨歿陳情已允褒揚之請入祠展祀更頒奠醑之文於戲流芬竹帛卓然一代之完人樹範巖廊允矣千秋之茂典列豆籩於祠宇渥澤攸隆布筵几於里閭湛恩疊沛靈其不昧尙克歆承

徐士林勗諸同事詩四首

乾坤豈是無情物民社還依至性人不有一腔真熱血廟堂未許說經綸
但使無顏皆可富若非有骨豈能貧雙睛不染金銀氣才是英雄一輩人
珍重昂藏七尺身空諸依傍自精神脚根實地全由我眼底冰山最怕人
口頭經濟非眞學面上才華是淺人鱗甲倚稀雲霧裏神龍原不露全身

徐朝亮字嚴六士林子乾隆丙子舉人任浙江烏程縣知縣陞湖州府

同知性狷介不能事上官而善折疑獄人謂有父風云自知與世不合

致仕歸家

傳

廢鐸曰浙江烏鎮同知徐公朝亮大中丞兩峯先生令嗣也中丞歿時年方總角而勤苦自勵遂得名其爲人不輕然諾不苟取與亦狷介之士一行作吏簡於酬應上官以中丞故特加青顧而官聲終不超越中年便退居林下蓋自知其與世不合也然予聞其折獄一二事有迥非尋常流輩所能及者一節婦青年矢志一子尚在襁褓中後子年將冠不忍離湯猶與同室寢處且共一溺器而節婦忽孕其家貲豐厚族人咸利其嫁而無瑕可摘亦遂安之節婦有娠族人各遣婦人守之將待其分娩而鬻之節婦自以絕無他說弗以爲意無何竟產一子將寘諸隘巷衆共持之鳴諸官邑宰拘家衆鄰佑鞠之婦無穢迹而族人譟之不已控諸上憲委鄰邑會勘終無端緒後以委公公視婦人端莊靜一因詳詰之盡得其情乃反覆思維以己意斷之曰凡離人思夫結想成緣偶值落紅與少男同一溺器男子先登婦人繼之熱氣薰蒸感而成孕往往有之但其子無骨必不能育白之公堂節婦聞之取兒擲諸階石皮囊內裹血水而已其案乃結婦歸設公位於室祀之報德以終其身又富室某隴畔溝中夏月溺死一行人尸子訴之公庭以爲地主納之於溝拘而訊之則素不識其人何緣加害其子噪不已公曰此甚易明洗冤錄所載凡係自溺死之人腦中必有淤泥逼死於水者則否但以子而剖死父之首萬一不實重典難逃其子言死亦無悔於是破顱驗之腦中泥滿乃置其子於法而結案焉此二事予俱得之傳聞之口尙非公絕詣然尋常之吏遇之非索賄以蕩產卽愆忽以戕生求其委曲詳明如公者有幾人哉

劉重殷字式九贈儒林郎汝州州同一俊子康熙丁酉舉人性情和易敦睦宗族不以親疏貴賤分畛域選授河南汝州州同因父故不樂仕進優游林下遠近稱孝子嘉粟字子穎附貢生性孝友好施與自以先

文登縣志

卷九上三

人物二

十六

世業儒不治生產乃經理家貲有餘輒濟人不以財自累年饑出穀平

糶鄉人德之家傳

劉重選字升如贈中憲大夫高州知府一清子雍正甲辰進士授戶部主事性忠厚汲引寒微情意懇摯分校鄉闈得雲南陳大受卷亟薦之爲主司所抑大受以拔貢朝考入京去家萬里貧不能歸重選召至京寓飲食教誨視猶弟子後陳由詞館任江蘇巡撫重選時官揚州同知陳以師恩不敢以僚屬相待專摺奏調別省而問遺不絕終身事以師禮重選後以廣東高州府知府致仕有粵東草一卷廢鐸
劉孔昭字視則封文林郎汾西知縣一良子雍正癸丑進士翰林院庶吉士改授山西汾西縣天性穎慧家食時潛心經義已具成竹由拔貢

入太學天人性命之旨確有見地文章駸駸入古不落恆蹊官汾西二載請終養歸從學者益衆年四十六卒士論惜之德州宋弼秋夜懷人絕句云數載逍遙侍從班一麾汾水遂初還家山東近蓬萊鳥憶爾投綸碧海間謂孔昭也家傳

常元素字太乙靖海衛廩生工詩古文詞康熙間蓬萊孝子王恩榮爲父復讐殺尹奇強學使黃叔琳按臨登州元素爲孝子作傳學使評曰寫王生三次復讎聲光情形宛然楮上令閱者號哭歌笑震怒悲酸一時並集而行文更復錯落變化激昂宛到子長而下不多觀之筆人奇文奇法臺之斷獄奇有此三奇用當刊布流傳俾之同爲不朽其見重於時如此而元素工力深造尤長於制藝清古幽奧得明人徐思曠包

文登縣志

卷九上三

人物二

十七

爾庚遺法性豪宕不羈常往來齊魯燕趙淮泗間客死道途年未五十也有太乙文集今佚惟制藝存焉生員劉翼採

東海筆談曰太乙工詩詞精音律名震二東尤長於古文所作論序雜之唐宋大家中幾無以辨平生魂魄有搔首問青天之概歿後著作散失同志賽合浦畢澹菴諸君子力爲哀集今見王孝子傳王端惠先生私謚議雖僅一斑如窺全豹矣

邑人賽珠常太乙傳

常太乙諱元素以字行性豪宕不羈使酒尙氣視儕輩齷齪無可其意者其爲文提筆直走浩浩落落數千言立就涉獵羣書兼通詩賦歌曲一落紙輒翹然自喜時復椎奇鑿險效唐人盧仝李賀樊宗師一派同輩或嘲笑之不顧也朗江項震岳爲文登營協鎮幕客偶以事飲林上舍家太乙先在座項南人喜翰墨睥睨文場視太乙袒褐單衣蔑如也酒數行語稍稍侵之太乙推案起大呼裂毗直視項若將揮拳相向者項無可奈何竟罷酒自是邑人皆謂太乙狂生云然頗好任俠急朋友之難故士之落魄不偶者多稱道之晚年喜堪輿家言及星命卜筮擊劍射覆之術皆能道其義常遊青淄沂濟北眺燕山易水勝概南還登泰岱絕頂上鄒嶧摩秦碑抵淮泗渡揚子江每數年纔一歸歸輒復出山以東士大夫無不知太乙姓字者太乙靖海人補衛庠小試輒冠軍年四十九卒不第雍正甲辰客死青州旅邸

郭文大字堯瞻威海衛人雍正乙卯拔貢任黃陂縣丞文詞宏博深厚挹注不竭所著東海筆談足資博雅鄉先生遺文多賴以不墜雍正十

三年裁衛併入文登文大網羅散失搜討故事纂舊威海衛志十卷衛

地掌故不至失墜文大之力也詩稿曰環麓堂

生員谷蘊藻採

呂瑤字荆石威海衛人雍正壬子舉人生平潛心周聘侯四書精言按

其章句纂而敍之參考二十餘年成纂敍四書精言十二卷弟璿字象

儀工文詞年五十二中乾隆甲子解元元墨雄深雅健學者至今傳誦

生員王樹葵採

王兆鵬字程九雍正乙卯優貢生福建巡撫士任子幼穎敏工詩文士

任以王德純案獲譴効力軍臺兆鵬間關萬里以一身周旋險阻應機

立斷處之裕如士任卒於臺所匍匐奔喪扶柩歸葬將卒命子孫去其

冠頂布袍柳棺以志痛父之意人咸悲之

王樹葵採

文登縣志

卷九上三

人物二

十八

邑人呂潤蕃優貢生王南溟墓誌銘

乾隆癸巳仲夏余宿疴方蹇須杖而步有自威海來者傳言南溟君疾甚猶子岍君甥也遣之往省歸言狀余曰噫殆矣是多歷艱阻兼時時念其先公勤緒不怠心氣枯竭以致斯也是烏得久未幾其嗣子孫以以訃來且述速葬之命請為刻辭嗚乎余與君世姻也相知為深病先於君而獨後死其忍不銘君姓王氏諱兆鵬字程九一字南溟為福建巡撫都御史莘野公嫡長子幼穎敏工詩文尤長於幹略中丞公既貴自曲家河徙居衛城君時未冠已屹然自立任家事如老成人年弱冠補博士弟子員食餼屢試棘闈不遇遂以優行貢成均中丞公自江移閩歷顯要十餘年君未嘗從之官歲一省覲而官中典章條例悉明了如指掌老幕僚不能及也乾隆庚申中丞公罷官時諸任事者皆辭去君一身從難中綜理巨細無失壬戌軍臺効力之命下少宰崑圃黃公謂公曰君有萬里行內外事誰可任者公以君對黃公乃召君試以事君區畫條對悉中機宜黃公嗟服曰有子如是君復何憂中丞公既出塞而籍家之命下君方自塞歸省中途聞變從者皆失色君坦然曰此愈足以自我公矣當是時事方殷風鶴四驚有構言中丞公有寄藏者大府命攝守某查訊君曰某父官閩十餘年持身清白載在口碑即鄉人皆知之安得有寄藏乎且事非一日耳目豈能盡掩某怒以為不承辭色俱厲君乃憤然曰即如公言誠有之但盡以賂當路貴人矣願乞筆疏其名以呈某愕然遂罷訊越二年家益困乃詣郡守曰某父歷仕踵項皆君恩顧自經封籍今二載未有明旨衆口嗷嗷或收官及可量給惟公代啓以免久懸守然之白於大府大府為之請事未下而中丞公卒於臺君聞訃匍匐奔喪扶柩以歸隨蒙 恩旨以原產賜予 聖澤深廣抑其間斡旋亦君力也至丁卯而核減追賠之文又下先是聞有撥用風災修理營城諸項應賠銀七百餘金部咨追解君曰此非先公事司書誤耳然非往來文移可了謁邑宰鄭公請假以行公許之遂如閩閩藩吏某聞君至託疾不見君使謂之曰吾聞關數千里而來誰之為如以諸項清案見付不論不然交盤印册具在將據以上質其無悔凡罷官者虧項追補類皆吏移易上下其手意途遠根誅難悉諸郎君又多少

年不更事且卽請限而摧挫之餘力不能得之有司故如霆擊鷲攫睽忽迅疾卽冤抑無敢格者君至固已駭愕及聞語益憚命其僚檢案呈君果前任諸公事又在例前具呈剖析本末詞旨詳贍復請先咨本籍以安老母撫軍潘公雅重之悉如君指事遂得豁旣乃訪故吏舊僚得中丞公歷任諸善蹟素所未悉者筆之成冊閩人曰是非常公子也皆爭餽贖悉辭不受而獨受其詩歌文詞之頌中丞者以歸初君之赴閩也人皆爲君難之及歸始服其練然君自是閉關不與外事安貧養母課兩幼弟暨諸子讀書不輟數年皆先後入黌序未幾而室人李氏卒次子某又卒猶子孫然暨弟兆鵬皆相繼卒郭夫人不久亦卒君哀痛毀瘠感傷無已而疾始搆矣嗚呼當中丞公之歿也君年方壯仕又不爲無階使稍出干進其所建樹宜不後於時不然卽爲貧而仕與世委蛇得微祿以自沾漑當不至抑鬱困頓以死而君顧終不以彼易此嘗言不能處富貴者必不能處貧賤噫志節可知已君且卒君之從兄兆聖戊午孝廉也爲君世父司訓景伯公子早卒一子貧無嗣君曰不可令司訓公無後以曲家河田四十畝宅一區予之以是爲繼嗣地又囑兩弟暨子孫以曰吾先公卒於塞垣吾無以振先人之遺罪人也其去冠頂爲布袍柳棺以志吾痛弟若子泣而受命嗚呼人知君以貴公子不失先業宜坐享豐饌而不知其艱難窮悴有孤門寒峻所不能堪知君諳練精敏才堪任重而不知其矜慎危厲如孤松危石自立於崩崖絕壑之間知君以詩書禮法肅家政無替前光而不知其深哀遠慕至彌留猶以中丞公之故痛自貶損爲可悲也君生於康熙某年月日卒於某年月日享壽六十有三妻李氏子孫以庠生次孫其嗣弟兆鵬女子一人孫以於某月某日葬於布穀村之阡從中丞公兆也銘曰以爲劍而韜其鋌以爲鑑而埋其光惟孝友之肫肫性以不傷嗚乎百世之貽視此藏



文登縣志卷九下一

人物二

陶崇化字仁高威海衛廩生陶氏在前世以武功顯惟崇化始就儒術游庠食餼未幾鼎革陶氏失職而施德在人者久衛之士民咸愛敬之崇化孝友純篤磊落光明待人無城府立身為學秩然有本末身雖不顯歸然係人望需次貢成均以壽考終贈登仕郎青城縣訓導墓表

漕運總督黃登賢陶公墓表

威海陶氏原籍江南之鳳陽始祖諱洪以從龍軍功明洪武二十年累授山東甯海衛世襲指揮生二子長鐸擊倭有功事載明史次鉞借職官於淮安永樂元年調威海衛殉難無後以兄子敞襲敞生瑛瑛生裕裕生端端生大勇大勇生繼祖掌威海衛指揮印皆誥授明威將軍妣皆恭人自敞以下八世單傳不絕如綫端五歲大勇十歲即孤繼祖僅以二歲孤繼祖之母徐恭人飲冰茹檠撫以成立居官仁明忠厚糞粥賑饑存活萬人配周恭人生子三諱崇化字仁高者其季也陶氏在前朝世以武功顯惟仁高始就儒術游庠食餼未幾鼎革陶氏失職而施德在人者久衛之士民咸愛敬之公孝友純篤磊落光明待人無城府立身為學秩然有本末身雖不顯歸然係人望需次貢成均以壽考終配阮氏同邑饒州府教授

文登縣志

卷九下一

人物二

諱鴻猷女諳詩書曉大義婦德母教為邑矜式先公卒康熙十三年二月日合葬衛城北欽村祖阡之次厥後陶氏子孫多經術之士科名相望實公啓之也余先大夫久宦山左悉其家世迨公之元孫易肄業成均謁余里第長身玉立通達治體余心器之乾隆己丑余奉命督漕易適守淮安有循良聲益信為世族子弟克秉家教者嗣以公墓碑歲久漫漶不可辨謹錄家傳不遠千里請表於余余與太守曾共事淮陰相知最深今讀其傳而歎公之貽謀者遠故撮其大節表之而子孫世系亦詳列焉過其阡者知陶氏世德清芬綿綿繩繩以垂奕禩方興未艾已公卒後膺康熙三十年覃恩賜登仕郎青城縣儒學訓導配贈孺人男子三希聖恩貢生青城縣訓導作聖廩生模聖殤孫男四希聖出者二威鳳拔貢生荏平縣教諭有鳳歲貢生范縣訓導作聖出者二騰龍從龍皆廩生曾孫十二人元士康熙癸巳恩科舉人正士拔貢生江西長甯縣知縣申士庠生彤士增生威鳳出偉士增生聯士庠生奎士有鳳出吉士歲貢生寅士庠生倅士庠生騰龍出凱士雍正壬子科舉人杰士郡增生從龍出元孫十七人易其一也

陶希聖字聖洋崇化子威海衛人康熙間恩貢任青城縣訓導中年

失耦義不再娶撫孤姪如己子年踰七十手不釋卷共推敦行績學之

士子威鳳字德徵康熙丁丑選貢除荏平縣教諭未赴任好學工文庠

師王蘭生通詳各憲考語曰正直端方謙沖和易持身教子先正典型

贈通奉大夫江蘇布政使

舊威海志威鳳作己卯拔貢今據行狀改正



陶正士字方厓威鳳子天性嗜學下帷攻苦有聲膠庠讀書白雪書院
濟南名士皆重之康熙辛卯副貢雍正癸卯以拔貢入太學由教習挑
發江西試用知縣初署興安縣值歲侵前任糶倉穀幾盡民衆大譁將
罷市僚佐請以民變通詳正士蒞任甫三日蹙然曰饑民謀朝夕耳胡
驚爲乃親諭父老力請借穀數千石賑之民困得甦補長甯縣奉例墾
荒不假胥吏手親勘清丈陞科之多寡遲速視田上中下爲差民不病
而帑不虧上憲檄其事爲通省司牧法邑素健訟乃訪峻訟豪棍之姓
名榜於通市不期年而訟獄衰息在任三年邑人頌曰夜間無犬吠花
陰勤撫字也曰懍懍四知甘守貧絕苞苴也曰無私鐵面喜重賡曰徧
種桃花色色新則鋤豪強與培士氣也再署武甯縣未數月卒於官櫬

文登縣志

卷九下一

人物二

二

回武甯人祖奠江干有哭失聲者以出嗣子易贈通奉大夫江蘇布政

使

行狀

陶易字經初正士子出嗣申士乾隆甲子優貢壬申 恩科順天舉人

由教習揀發湖南試用知縣歷任劇邑卓有政聲由益陽調任衡陽縣
恤老貧矜孤寡抑豪右塵案一空諸不軌者咸斂手邑尙奢靡易勸民
節儉出示曉諭愷切周摯民皆動色相戒城池廟宇考棚書院凡廢墜
者無不修舉會有保舉堪勝知府之 命楚撫喬疏薦四人易與焉

特授山西平定直隸州衡陽感易德爲立去思碑以紀善政牧平定時
州治土厚水深井泉甚少上城建置山巔止一井居民苦之易創立嘉
山書院謀於東偏隙地鑿井衆有難色易獨銳意爲之不數丈忽泉水

涌出甘冽異常士民以爲神助名曰陶公井建亭於旁學使吳巖刻詩紀其事遷江蘇淮安府知府會黃河漫溢詳請大府賑撫兼施民頌其惠陞廣東惠潮嘉道保留江安等處糧道擢江甯布政使代理織造管新龍江關稅務易四歲承父申士嗣母呂氏教養兼備夜然松脂攀枯枝煨芋魁授易讀易貴後狀其事徵名人詩藏弃之素性恬淡尤好勤動退食之暇即延邑紳耆諮詢利弊是以興學造士補城浚池百廢俱舉事集而民不擾服官二十餘年始終如一遼東李鐸著尙史七十卷無力授梓易守淮安時爲捐千金刻以行世並奏入 四庫著有筠愛堂文稿惜陰詩草遊雍隨筆平定雜詩平志備採易卒子孫多通仕籍以文學相繼數十世不衰

家傳

文登縣志

卷九下一

人物二

二二

先正事略循良傳陶易知衡陽縣承分縣之後與清泉令江恂協恭爲治政事大理甲乙爭塋地易往勸以山還甲乙曰民供稅納糧有年易曰此田地自巡撫趙公文量乃升科彼葬時未丈量故無糧稅眞山主也汝何由先納稅乙詞屈出魚鱗册爲證易笑曰此趙公文量册縣令印之册書掌之汝盜册爲訟本宜以還我乙叩頭伏罪界遂定其他發掘奸伏多出意表縣人驚以爲神

候補郎中趙希璜陶公墓誌

陶梅軒先生卒後二十有一年嘉慶戊午先生之孫象炳來令內黃與希璜同官持先生行狀乞識於希璜曰先生任布政使時乾隆戊戌以徐述夔案被逮入都疾篤遂歿象炳孤苦零丁不能自立今得微祿養親將殯先生喪丐予次其生平識其顛末銘諸貞珉昭諸來世希璜辭不獲已因敬識之按狀先生姓陶氏諱易字經初號梅軒先世祖洪武間官威海衛指揮僉事世襲遂爲文登人八世至高祖諱崇化始就儒術充廩膳生曾祖諱希聖青城縣儒學訓導妣李氏祖諱威鳳茌平縣儒學教諭妣王氏生四子長元士雍正壬子科舉人次本生父諱正士號方厓雍正癸卯選拔貢生任江西長甯縣知縣妣呂氏父諱申士邑庠生早世妣呂氏苦節奉 旌事詳縣志次彤士邑庠生自訓導公後以先生貴封贈如先生官妣皆夫人先生由方厓公次子入繼呂夫人撫孤教養家故貧霜風雪夜然松煨芋以飼先生先生能仰體夫人心機聲與書聲齊徹也年十七補諸生隨食餼乾隆甲子考取優貢生肄業國子監己巳考取八旗教習官壬申應京兆試中式舉人座主爲孫文定公嘉淦介少宗伯福同考官爲夏醴谷先生之蓉旌以教習期滿引 見奉 旨以知縣用甲戌揀發湖南試用歷署桃源武陵安化安福瀏陽等縣楚俗號稱健訟先生抑強扶弱發奸摘伏咸頌神君案無留滯民鮮冤獄丁丑補益陽縣知縣己卯調衡陽縣知縣癸未兼護府篆有衡陽病瘋人在廣西提督衙門投遞逆詞粵撫馮公楚撫喬公駐衡陽查辦衆心惶惑先生以鎮靜處之祇取病瘋人正法家屬俱免緣坐衆心允服是冬 命下直省督撫保舉堪勝知府任者喬公首以先生名入 告甲申引 見擢山西直隸平定州知州己丑 簡放江蘇淮安府知府先

生益感激悚惶奮勉圖治辛卯冬淮關監督署內被劫 聖諭嚴切督撫駐節河干查拏賊盜或擬將板
開居民盡拘刑訊先生力爭不可而止後獲盜果非附近人大府由是益器重先生甲申秋黃河漫溢水
灌郡城先生詳請大府賑撫兼施率屬親給無濫無遺是冬調江甯府知府因俸滿引 見蒙 天語垂
詢被水情形及賑撫事宜先生敬謹條封 溫旨嘉納甫回任即陞授廣東惠潮嘉道閣部高公晉專摺
保留奏補江安督糧道丙申春奉 命擢授江甯布政使是年赴熱河行在陛見蒙 恩賜食 召見者
再 諭令速回辦理淮徐災務先生星馳回任順道挨查一如在淮安時戊戌夏有已故舉人徐述夔詩
集違礙經蔡某首告批府查辦未催詳覆蔡某又赴學使衙門具控致先生被逮行至韓莊疾發勢遂沈
重入都後延至十日而卒先生生於康熙某年月日卒於乾隆某年月日年六十五歲配于夫人與先生
合德子五人茲以嘉慶七年月日合葬先生於欽村新阡之原蓋距卒後二十有五年矣象炳署內黃縣
知縣時獲奸民張標奉 特旨擢官司馬卓卓有祖風克光顯先德無疑也

湖南庶吉士劉宗瑛衡陽陶侯去思碑

今 天子惠養黎元崇獎吏治三年大計之外又有保舉堪勝知府之 詔凡循卓異等者咸得不次擢
遷甲申春吾楚宮保李公中丞喬公會疏薦牧令之賢者四人於朝我邑侯陶公哀然首列入觀 天子
嘉其績特授山西直隸平定州牧都人士咸德侯重惜其去乃相率謀所以不朽者郵書屬余爲文余備
員部曹既於京邸得親侯之議論丰采且都人士至京悉爲余誦侯之善政與其德之所自咸用是知治
行優隆非徒我侯賢也抑太夫人之遺澤遠矣蓋侯世爲山左甲族贈公早捐館太夫人以苦節自貞雖
艱辛備至而所以教侯者必根於忠孝期以遠到洎侯捧檄出宰太夫人已棄世久然侯每蒞一邑輒祇
祇業惟恐一不得當其猶不忘太夫人遺訓乎侯初以優行貢成均分鐸八旗壬申科登京兆賢書比
年試禮部贛縣劉侍御得其卷力薦不售而教習適滿以知縣揀發湖南歷任劇邑侯素抱瓌偉重爲當
事所器他邑有難讞之案以屬侯無不立判歲己巳當事爲衡擇吏侯乃自益陽調繁來顧吾衡自丙子

文登縣志

卷九下一

人物二

四

歲以繁劇而分分猶故衡也一二無良既多所構煽吏又或因緣爲奸以故案牘日積侯至則立爲剖決
其於老者貧者孤且寡者必加意矜恤不使豪暴得以侮之而獨於訟師積匪不少恕由是塵案一空諸
不軌者咸知斂手則侯之良於割也可概見已吾邑舊稱樸近者習尙頗靡完課多逋而喪葬一節有
唱夜歌之陋有吹手打夫分界把持之累所望於司牧之匡正非細也自侯治衡而返積習者無敢徃故
樂輸將者惟恐後時迄今讀勸民節儉一示剴切周摯無弗動色相戒蓋衡之善政未可毛舉其動關治
要類如斯也且夫士大夫出宰方隅類無不循良自許而至於甯瘠於己毋病於民殊未數數然也侯之
甫下車也邑文廟垂成而費不繼侯悉力董之工賴以竣其改建考棚及重新府學雖郡邑公役侯皆首
肩其事不少諉若城西之武廟署內之崇文閣買池軒與夫城北之臨蒸書院或分俸以倡修或買地以
改建或捐廉而歸故物宏德造皆工浩費繁爲他人所靳而不爲者侯顧爲之愈摯以視市田宅而長子
孫者復奚若也其繕葺城垣固期完固可久帑項不敷卽期會而徵發之用民力以衛民亦奚不可者侯
惟恐病民而一切以身任之則其所以嘉惠衡人者亦何所弗至哉抑侯雖久於吏治而筆翰之工不減
古作者每念衡清分治而疆域田賦諸事志仍其合其何以垂信乃進邑人士開館纂輯補缺刪繁悉高
簡有法然則侯非徒良吏直良史才矣侯蒞衡六年其治行久在大吏賞識中嘗委署桂陽州及護理郡
篆其護郡篆也適屆歲試所拔七邑前茅皆知名士其所刊試牘可按而知也夫侯之爲政非有意於示
異而要其愛民也溥故庶事所在行之無不周其造士也隆故學校所關爲之無不至卽侯治之善而所
得於慈訓者斷可識矣昔歐陽永叔貧而早孤其篤訓一得之太夫人而德業鴻駿爲有宋一代名臣今
由侯之政事文章以溯所自成蓋與歐公等誠嗣是而益宏遠略以無忘 天子休命則德業所底當更
有以繫海內之思者獨衡之人也乎哉侯名易字經初別號悔軒山東登州府文登縣人
廢鐸曰陶方伯易父文學士早卒母夫人呂氏及笄于歸七年而寡未有誕育誓以身殉時舅姑年踰
六旬哭勸之乃撫四歲姪爲嗣卽方伯也恆產無多惟恃己十指作勞上奉高堂下撫藐孤甘旨無缺教

養有方而其自奉則效范文正公畫粥之法以延生垂三十年如一日舅姑歿當大事必誠必信未嘗以未亡人廢禮嗣子學語卽口授句讀出就外傳歸必課其勤惰鞠育之恩同於罔極故公至成人尙不知其非夫人出也公性純孝承夫人意旨晝夜攻苦未冠應童子試輒列前茅乾隆甲子舉優貢第一而太夫人卒公痛不欲生竭蹶爲請 旌建坊以慰幽貞服除後以教習銓縣令復中壬申鄉魁以不得逮祿養公餘惟衣布素戒諸子勿得綺羅每值超遷輒痛哭不已蓋悲母氏之不及見也行年六十餘始陟藩司少君七人俱各成立孫男中副車者二一任縣令一任學博曾孫而下人文蔚起皆太夫人苦節及公純孝所致也

陶象珮字鯉堂易孫贈修職郎曾晉子嘉慶甲子副貢任昌邑縣教諭好學尤熟於昭明文選以選詩之諧於律句者彙爲一集爲五律二百七十八首五絕二十二首曰諧律集璧合珠聯依韻編次爲從來集句所未有道光以來陶氏能文詞有著述者歲貢生蔭棟字星舫孝友端方工書畫尤長於詩著有韻蘭花館詩鈔己酉舉人受欽字敬甫教授鄉里成就後學甚衆著有學古堂詩稿諸生陶穎字瑞東著有周易廣

文登縣志

卷九下一

人物二

五

象六卷書說詩說各二卷學庸講義四書萃說禹貢釋今圖各一卷續

柳堂吟草二卷皆易曾孫

家傳

畢宿燾字溥幼鬻子十四入邑庠二十二登鄉薦乾隆己未進士授山西萬泉縣知縣縣素刁悍前令以奸民聚衆毆官褫職宿燾抵任樸者撫以恩黠者繩以法民俗丕變升澤州同知分任東冶鎮爲政嚴明抑豪強除奸民訟獄剖決如流民之屈抑不得伸於縣令者多赴東冶控訴日數十計陞吏部員外轉戶部郎中致仕贈朝議大夫漳州府知府著有保釐堂稿

家傳

邑人呂潤蕃戶部郎中范園畢公傳

公諱宿燾字溥幼號范園十一峯先生長子幼承家學端重有法度年十四入邑庠二十二中雍正己酉科舉人乾隆丁巳以明通選博平學教諭薄祿自給惟以造就人才爲念見諸生輒津津講畫不少倦學使者徐公鐸布政使黃公叔琳咸歎息曰司鐸之任久輕惟知計脯脔諸生耳如畢學博者可謂錚錚

矣任博平十餘年己未成進士出大學士泰安趙公國麟之門再丁艱服闋選山西萬泉縣知縣縣當饑荒之後盜賊充斥聚眾至鉅萬府縣官不能制上命大學士公諾親往捕之餘黨猶竄伏山谷頑梗不順化公除萬泉諸親友悉爲公懼謂書生不能詰姦懲刑暴亂也及抵任詢民疾苦前政之不便於民者悉除之其不率教者懲創之又榜示於衆曰歸農者免死爲盜者殺無赦百姓翕然從化歲亦屢登萬泉自是有起色布政使某性貪污苞苴公行門若市獨河東道喬公光烈蒲州府知府周公景柱清直不阿而州縣中之廉介自守不依附勢門者公一人而已後某事發上命諸城劉文正公往鞠之官吏皆震恐公與喬周二公以不事比附蒙特旨嘉獎記名超擢尋遷公爲澤州府同知澤州府同知分駐東冶鎮不專獄訟事所督者礦廠鹽政緝捕盜賊而已僥倖無過卽稱職而澤多富商大賈恃鹽務爲利藪虧損斤兩以自肥出入乘駟駿服貂豹狐白裘高堂華屋狎聲妓酣歌達旦酒池肉林視之若泥沙不少顧惜皆於鹽焉取之其入公門也則捐有府道員外郎中職銜頂戴藍白耀目自運司以下莫不分庭抗禮出則賡剝小民民怒而不敢言公至澤澤人曰此萬泉廉貞父母也能活我不遠數百里匍匐往愬者如織公蒞任則取富商之虐民者力懲之而貧民之不得伸志於有司者咸與昭雪前此鹽商以十三兩爲斤又加沙土汙湯穢物貧民不敢爭至是諸市鹽者同詞抵商人曰不得復用十三兩爲斤又加沙土汙湯穢物也商人無敢爭鹽政平陞吏部驗封司員外郎嘗奉命監督米麥平糶市儉姦商串通胥吏夤緣包買者公悉杜其弊源不事刑威而積弊一清陞戶部山西司郎中在部勤事無虛日察胥吏尤嚴自知古道不諧於俗因歎曰吾老矣安能失吾故步遂致仕歸公服膺朱子小學視聽坐立飲食起居皆有法度對賓客以及燕居必正衣冠無惰容刀劍戶牖皆箴銘以自警終其身如一日卒年八十三

畢宿庚字西有宿燾弟幼穎異年十五入邑庠第一十七應乾隆丙辰

文登縣志

卷九下一

人物二

六

恩科鄉試中式第四名舉人選德平縣教諭日集諸生凡立品植學

無不諄切勸導士風一變陞直隸清河縣知縣起居飲食一如寒素除

弊政清案牘與民休息不事煩苛邑人樂之在任八年卒於官地贈通

奉大夫安徽布政使著有擘芳堂文稿蛙鳴詩集子所雋官主簿借補

涇陽縣典史贈朝議大夫工部主事家傳

新安汪承霈清河縣知縣灌園畢公墓誌銘

公諱宿庚字西有畢姓先世爲周畢公之裔始祖當漢初時自陝避亂占籍山東之斥山遂世爲文登人舊牒散落無可考金有大中大夫上柱國賜銀魚袋諱文貴管軍請俸百戶諱旺以戰伐功顯其龍山先壘刻石猶存也見於譜牒可稽者則自元甯海州同知諱徵者始徵生泌泌生叔昌叔昌生宗定宗定生翀任撫甯縣尉自是遷居邑東關翀生達達生元祐明隆慶間歲貢生官莒州學正元祐生其性其性生多寵俱邑庠生多寵生傑如增廣生性篤孝祀忠義祠公之曾祖也祖諱鍾姬康熙戊寅歲貢生文行孚鄉國生子二長諱壽康熙甲午舉人單縣教諭次諱壽公考也雍正癸卯科拔貢甲辰科副貢砥行稽古東方學者宗奉之後以公伯氏貴祖泊考累贈奉政大夫祖妣劉氏趙氏妣岳氏皆宜人公昆季二人兄諱宿燾乾隆己未科進士歷官山西司郎中公其季也公生而穎慧讀書背誦千言十歲爲文落筆輒成篇十二歲考奉政公卒公號踊哀毀無異成人十五歲應童子試學使長白額公拔冠多士十七歲應乾

隆丙辰 恩科鄉試中式第四名舉人庚午再丁岳太宜人艱營葬治喪一一如禮甲戌禮部試取明通卷選授德平縣教諭至則日集諸生凡立品植學無不諄切勸導士風丕變己丑春選直隸清河縣知縣四月抵任除弊政清案牘與民休息不事煩苛甲午九月東省逆匪王倫嘯聚臨清距邑城五十里人心驚惶公撫以鎮靜民皆安堵在任八年邑人樂之以庚子某月日卒於官享年五十有八配張孺人寬仁慈惠賢而有德後公十四年卒合葬於城西北香山之麓公子持狀請銘公爲先文端公及門士不敢以不文辭銘曰坦夷和樂以率其性真醇樸茂以全其天其學則富其守則廉循吏之最治績孰先佳城永安億萬

斯年

畢所密字退思宿庚子乾隆甲午舉人署江陰靖江崑山知縣歷鄆縣富平知縣調咸甯縣適教匪自楚竄秦中賊魁齊王氏姚之富高均得等領十餘萬衆出斜峪關直趨西安所密奉檄率兵勇守西安南關得賊謀戮之擢留壩同知未抵任署鳳翔知府旋署西安府護理按察使未一年卒於官西安兵火之後又值歲饑所密捐廉倡率紳士爲粥場賑之全活無算祀西安名宦祠並肖像城隍廟內祀之著有蘅塘詩稿

文登縣志

卷九下一

人物二

七

贈通奉大夫安徽布政使

新登州志

江陰縣志名宦門畢所密乾隆五十四年署縣事清節最著爲政嚴察有扞網者痛繩之奸宄惕息治獄剖決如流民無羈滯之苦亢旱茹素步禱雨立至人以爲至誠所感蒞任甫三月卽代去民思之至今呼爲畢青天云

咸甯城隍廟畢公祭文

維嘉慶九年歲次甲子九月祭日咸甯闔縣紳士商民謹以香醑庶羞剛鬣柔毛之儀敢昭告於 誥授奉政大夫蘅塘畢老公祖大人之靈前曰嗚乎公祖逝矣笑貌音容不可復覩而功德政教何忍遽忘惟我公祖上焉爲國篤棊本自性成下焉爲民鞠謀非同矯強督理軍需一語定盈庭之議團練鄉勇萬家樂安堵之居片言折獄明決服乎兩造歎歲施粥愛育徧乎三農所欲與聚所惡勿施父母之歌孔邇不侮矜寡不畏強禦正直之氣常伸由咸邑以理府事隨車轍以布恩膏農夫相與忭於鄉商賈相與慶於市位雖止於縣郡才實備乎宰衡使趙擢而上陞當惠澤之彌溥孰意昊天不閱哲人云亡雖無老成尙有德政生有功於民社歿宜祀以祠堂在昔漢班伯爲定襄太守收捕隱伏敬如神宋袁詔爲臨安太守舉手加額呼爲佛朱邑以愛利爲行桐鄉立祠以奉祀陸雲辭浚邑而去畫像配食於縣社愛君澤民後先一轍歌功頌德今古同心恭惟咸甯城隍司彰善癉惡之柄我蘅塘公祖有崇正黜邪之思制行既合神明香烟宜配俎豆今闔縣紳士商民等願迎我公祖之神送入城隍之廟神像尊嚴儀容經千年而如在春秋跪拜禮祀歷萬代而常新公祖有靈惟像是憑嗚乎痛哉尙饗

邑人宋允和蘅塘畢公傳

公諱所密字退思號蘅塘文登人十二峯先生孫也父諱宿庚以孝廉任直隸清河縣公性敦厚直諒遇事明敏有斷以太學生中乾隆甲午科順天舉人時東省逆匪王倫嘯聚臨清州去清河密邇公自京星

夜赴清河省父而清河土城庫陋去賊營又近人心惶恐或謂公父曰有守土之責者自當與城存亡公子置身事外宜送眷屬入都以避寇公泣曰臣事君子事父一理也願佐大人守城萬一不測雖死無恨則率丁壯登陴防守無間晝夜及臨清賊平清河卒無恙未幾公父卒於官蕭然無長物公扶柩旋里營葬家計日窘乃授經鄉里資脩脯以給丁未大挑一等授縣令初署江陰縣清節冠一時治獄剖決如流蒞事僅三月卽代去民思之呼爲畢青天云次署靖江縣縣有樂部人新婚卽別久之未歸其妻以紡績致百金其叔欲奪之不可得見市人有貌似其兄者與母謀使貌似者冒爲兄歸騙嫂金而與之分母許之比引入其家嫂曰不似不似冒者登牀曠就之嫂急控於縣公訊焉其母堅以爲子其弟堅以爲兄惟婦不以爲夫公笑謂貌似者曰汝果是婦之夫乎汝伶人也以演劇爲業所學何劇我能笛我爲汝吹汝卽爲我在公堂演唱因命取笛來公又笑曰賜福一齣粗曲也凡爲伶者不工他劇未有不通此者汝能唱是婦屬汝矣公取笛吹之其人色沮語塞不能贊一辭公曰假矣答之並管婦叔逐之去堂下觀者皆大笑以爲快縣有鬪毆者力不勝乃自殺其四歲男以誣之其人弗能辯遂誣服而凶器卒不獲公察控者神色可疑聞其家有九歲女守舍使控者跪於堂乃遣役往給之曰汝父使吾來取前日殺汝弟刀女卽揭地板取刀與之血跡宛然冤獄遂明次署崑山縣清漕弊決獄訟平允一如在江陰靖江時旋以丁母艱歸服闋補陝西鄠縣令逾年復調任富平鄠縣士庶陳牒乞留以違例不可鄠民皆失望垂涕嘉慶丙辰自富平調任咸甯咸甯爲西安首邑而是時川楚教匪自湖北竄漢中賊首高均得掠城固洋縣有衆萬餘而齊王氏李全等分二道由城固洋縣老林踰北山出寶雞岐山合攻郿縣掠盤屋將直犯西安經略額勒登保檄公率勇壯守西安南關日夜防禦居民恃以無恐會總兵王文雄等連敗賊軍賊軍不敢再窺西安陝撫以公防禦功奏 聞升留壩廳撫民同知未抵任委署鳳翔府復委署西安府時兵燹後百姓疲弊屬縣有偏災者請賑濟饑多所全活而西安終南山爲教匪出沒藪萬山叢複東西絲互千餘里山匪爲賊嚮導官兵搜擒餘孽待訊者百餘案苗莠維揉良民之株連者在所不免公曰古人稱刑

文登縣志

卷九下一

人物二

八

爲祥者以其不縱不枉也服念五六日至于旬時然後敢蔽囚焉今此被擒者果皆賊乎反覆研究殲魁釋從陝民德之以積勞卒於西安寓廨公任咸甯凡六載卒之日咸甯士民肖像城隍祠內哭臨者日千餘人蓋俎豆至今云

畢所謫字正言宿燾子乾隆己亥副貢授甯陽縣教諭時 聖林內洙

水斷絕所謫奉檄挑濬掘土得元人黨懷英篆碑上鐫浚復洙源四字

又樹柏數千株保題知縣調署浦城縣事縣爲閩浙扼要京省通衢南

北跼長二百五十餘里時值清查差務絡繹請於上官裁外跼供億浦

人德之調侯官縣遷雲霄同知台州知府屢鞫大獄皆得情署甯紹台

道調漳州知府漳俗刁悍械鬪成風水陸巨盜出沒無常懸千金賞格

擒獲巨盜林花鼓等十餘名並夥黨六十餘名盜風稍戢後以六部員

外郎用旋告歸著有挹翠堂詩稿

新登州志敘述多
外據行狀改正

王世藩字价人乾隆丙辰舉人任廣西博白縣廉明仁恕折獄平允縣

人德之生員于鳳樓採

墨齋隨筆王价人任博白縣攝桂平事有呂貢生者有桂園十餘畝園丁二人分南北守之一日北園丁夜間為盜所殺王公檢驗傷在項曰內盜非外盜也園牆高丈餘石築堅滑無著脚處不可倉猝無階而越牆頭雖微有跡亦非自然著者且其人傷在項若勿然據南園丁陳某供稱夜聞喊聲起而飛赴至則已殺死矣急迫之際砍則非顛即臂刺則非胸即脅豈有端端正正安受其刃之理遂至陳室見其妻在門內年少而美復見陳袴近襠處有青蠅羣聚乃命役另取袴與著脫其袴依洗冤錄法蒸之以釜噴以醋如是者三而血迹見公曰此人乃汝殺尚誣人乎陳不承曰小人赴救時手扶其尸偶為血汗以袴拭之昨乃洗去耳公曰此刀印非手印也命搜其刀雜得數口逐一比較一刀與印符公曰即此刀是汝不承吾嚴刑訊矣陳乃泣而吐實曰小人該死蓋陳歸遇其妻與北園丁通殺而移其尸於北牆下也遂定案而事結 邑人于熙學喜王价人至詩昔別君從宦今來亦老夫交情 衰病在世味雪霜俱海雨冬猶細山看夜更羸淹留知不惜懷抱得傾輸

劉儲鯤字培南乾隆辛酉年四十以選拔入太學考授宗學教習期滿候選知縣以丁內艱馳歸未及服闋而卒著有鐵槎山房遺詩選入山

左詩鈔監生金正桃採

文登縣志 卷九下一

人物二

九

博平金枝鐵槎山房詩序

文邑鐵槎山高摩太虛俯臨大海朝日曛曛蜃樓奇幻至其地者直忘其為人間世其靈氣鬱勃知必篤生異人也而劉子培南果傑出其間先是溥幼畢夫子司鐸吾博課業之餘並及詩古余以下里巴人謬蒙刮目唱酬之會每日惜汝未見培南也一日值夫子招飲座上一客修幹長眉私忖得毋培南耶叩之果然各喜不自勝快談無虛日後夫子出宰山右音問遂疏未幾歷亭賽夫子復為吾博廣文謁拜時方問培南起居而培南早致垂問並錄其詩稿見示予披讀一過光怪滿眼歎曰真山海之靈也乃逾年而培南死矣余乍聞愕然幾於不知所為既而曰培南固宜死也夫人情物態雕鏤無遺幾見天公不愠怪者長吉天東野窮義山冠不挂朝籍往事可徵也而培南之詩兼諸子之長而猶不足是非取死之道耶培南固宜死也顧念培南甫得謁選而歿囊底羞澀有子食貧恐不能傳其父業爰取斯帙手鈔而編次之聊慰培南於九泉俾知千里外猶有知己不相負也鈔既成則登吾博奎文閣上時時東望海雲慘淡山影迷離猶想見吾培南云

山左詩鈔鐵槎山房遺詩登萊道副使熊公繹祖所寄原集小序惟記履歷世家事實無憑采錄序云培南年四十以選拔入成均考授宗學教習期滿候選知縣以丁內艱歸未及服闋而卒是培南之死未五十也十數年來老成凋謝吾東海上大風日益衰微有才如培南及吾州李子金甌者天又不假之以年可勝惜哉

邵紳書字誠一諸生城南南馬村人性好學能以精銳之思涵泳四書白文以求先聖語脈所著四書臆說不盡守章句集註而旁推互證理

析毫芒多可與朱註相發明處嘗謂聖賢之書時異勢殊必欲一字解不錯則必其人自釋之而後可千百年後遙相揣摩焉能無出入處如程朱之解四書正前人之訛以貽後學厥功偉矣縱有一二失檢之處勢所不免不足爲程朱累也雖然德無常師主善爲師學者讀書窮理務求至乎其極前賢若有錯誤苟能辨而正之此卽前賢之功臣卽如我今日辨前人之誤後又有辨我之誤者其所辨果是將喜之乎抑怒之乎聞過則喜恐不獨子路有是情也又如聖門子貢之貨殖再有之聚斂宰我之短喪自是瑜不掩瑕何必爲諸賢諱亦何足爲諸賢病村學究見有與程朱異說者則以爲背註可惡獨不思先儒之註不可背先聖之經獨可背乎其人自以爲尊程朱不知此等無志之人以聖賢

文登縣志

卷九下一

人物二

十一

之公心揣之其見絕於程朱也有斷然者紳書研究性理於先儒論性諸說剖晰精微所著繼善成性論取諸家之說折衷於孔子尤具卓識家故貧旅食沙漠三十餘年著書不倦所著易說已佚惟四書臆說四

卷續編一卷存焉

舊名四書叢談
今改名臆說

四書臆說自序

天下之理莫易解於四書亦莫難解於四書其易解何也大中至正之途探喉而出無時勢之隔無託喻之言無奇險之字故易解也然言近而指遠辭淡而味長至氣象神吻之間賢與聖各不相襲善讀者於千載而下使其氣象如接吾目神吻如聞吾耳則非熟讀精思有百倍之功者不能其難解又何如乎紳雖不敏讀聖賢書常願以白文爲主而於古人傳註必求其與經文脗合者方敢信之間於披讀之餘有問心不安者錄若干條及所註易義遙質於高明之士其爲愚者千慮果有一得未之敢知其或誤入迷途一二同志修以月斧鑿以郢斤俾得去非而就是焉是則吾之所厚望也夫乾隆甲寅

又繼善成性論

愚嘗作繼善成性論以明古今言性之不同而折衷於孔子大意謂告子諸人止見氣質者也孟子專言義理者也至宋儒始大爲分晰使義理氣質不相混者也而孔子則但言氣質而義理在其中者也易曰一陰一陽之謂道繼之者善也成之者性也蓋陰陽者氣也而一陰一陽之迭運陽之德爲仁爲禮陰之德爲義爲智實有四德爲信合而言之爲理人所共由爲道道不外於陰陽也繼之成之亦陰陽之所繼

成人秉陰陽之氣以成形則氣質自是主名而義理寓於其中猶陰陽自是主名而道寓於其中道不外於陰陽故義理不外於氣質也天生蒸民有物有則但言物而則在其中如子路問成人但言人而人之所以爲人者不煩言而自見故夫子言性祇就氣質而言而義理之寓於其中者亦不煩言而見與告子等人止見氣質者大不同也且言氣質可以該義理以有物必有則天下無不善之則也言義理或難以律氣質謂則寓於物天下固有不善之物也此孔孟言性之別也宋儒分言義理氣質而以義理爲主孔子言氣質而含義理是以氣質爲主以義理爲主者人道之當然也以氣質爲主者物生之本然也此孔子宋儒言性之別也如論語相近章言性是言氣質而義理在其中集註謂兼氣質而言是以義理爲主之說主從尙不分明至下文則又言此言氣質之性既言兼氣質而言又曰此言氣質之性則不免所見恍惚而未得孔子論性之真也且孔子以氣質論性又有確據下章以上智下愚爲言明是論氣質以義理不可以智愚言也而惟字之意則跟上章而辨別之知上章亦以氣質言也或曰理寓於氣中而氣爲之主故性之理雖同而人之善惡常因乎其氣質爲高下然則韓子三品之說似大得也曰韓子云所以爲性者五曰仁曰禮曰信曰義曰智則是以義理言性矣而乃曰性之品有上中下三夫理無不善焉有三品乎彼之所謂三品者氣質而已矣是告子止知氣質而不知義理韓子又誤以氣質爲義理也彼所謂上焉者善焉而已矣下焉者惡焉而已矣此是標榜孔子上智下愚不移之說中焉者可導而上下也此是標榜孔子性近習遠之說然孔子原是言氣質而義理寓其中韓子則是言義理而以氣質當之似同而實大不同也然謂上之性就學而愈明下之性畏威而寡罪是故上者可教而下者可制也此甚有關於風教可謂卓識矣

叢秉肅字如齋廩生學宗程朱以主敬爲本游其門者言有教行有法

文登縣志

卷九下一

人物二

十一

口講指畫剴切詳明著有四書蒙正學庸講義行世

邑人于穎發傳

延州張井學庸講義序

大學中庸學者童而習之及其壯大而嘗焉者比比也余幼就師講授更泛觀前人討論之書迄未得了然於心後從鄆州緜環谷先生兩載爲之析疑辨惑而後二書之大旨與夫諸說二書者之離合短長稍無扞格不通之虞今觀于芝厓司馬所刊叢氏大學中庸講義一書何其深切著明言之似吾師也卑視訓詁者謂止便帖括俗學而莫之究心而求理太深又或視聖賢庸言如九天九地之不可思議其弊不課虛叩寂入於二氏之學不止此則不講之過而子朱子之所大懼也善乎楊體之之言曰大學以性字作骨而以本字爲要領中庸以道字作骨而以誠字爲要領本言理故此謂知本句重知字誠言道故惟聖者能之句重能字非知無以操其本大學所以重明德非行無以極其誠中庸所以重至德其於二書可謂批其卻而導其窾者是書以順講爲體未暇及此然學者卽是書而熟翫之而前數說者未嘗不躍然於文從字順之中講二書者能不負叢氏之苦心庶不爲子朱子之所呵可由此以求心得矣而尙何嘗焉之足患乎是爲序

金鏞字序東乾隆己亥舉人任汶上縣教諭修復禮物不振士風著有

學庸依文論孟類觀詩貫易緒禹貢洪範撮要夏小正評點周子圖書

疏道德經同異辨陽谷小識慈峯古體文燈下答問書法數卷

新登州志

姜模字秋嵐乾隆己亥舉人任益都縣教諭潛心經學著有經義考以五禮封建官制井田學校樂制爲綱雜探註疏及各家之說參互訂正於經義多所發明子以炤號省伏諸生著有易經集解戴經集解以炤子乃邵號菊垞增生著有書經集解禹貢考詩經考春秋類編春秋考異三傳異字考乾嘉以來邑中言經學者自畢亨外多推姜氏謂其能原本註疏正義旁及宋元以來諸家之書字求其義經會其通近代所謂漢人故訓之學也

廩生王學韓採

王嘉璐字東籬諸生著有四書箋記十四卷雜探註疏以下各家之說章疏節釋徵引亦頗繁富蓋欲合漢學宋學而一之手自鈔寫蠅頭楷字細密無縫蓋讀書精勤孜孜不懈也

舊名四書端記今改正

文登縣志

卷九下一

人物二

十二

于觀貞字盪溪諸生博學工詩負才傲物多與俗忤一子先天妻又繼喪子然一身終不受人羈縲始猶以舌耕自給及老所遇益乖無復生理戚友有欲贍之者不屑也以嘉慶壬申正月七日自經於家祠中蓋必不肯辱身降志云著有樵雲詩韻四卷

李鴻祖弔于樵雲詩序

樵雲詩韻自序余不幸生遭運厄非詩實過然詩其紀吾厄者也溯十歲時隨先嚴客濟南館淮北泊先嚴見背益熒熒無所向且又艱於館食極至顛困走燕樵隱依山託爲永號昌黎云不平則鳴以余方之平輒不鳴母乃愈鳴愈不平乎

門人于廷璠樵雲詩韻述略

塾師于樵雲先生自祖及父皆籍蓬萊爲知名士先生入邑庠卽丁父艱廿四歲遊食齊燕間歷二年乃轉館鄉塾中名漸起而遇益蹇守亦逾堅逾中歲痛西河遂棄諸生業厄幾瀕死迨晚母夫人歿又遂縲嘗自言遘極困輒發爲詩不求工亦不輕示人今歲己未館廷璠家亟請之先生泫然曰余經辛苦多矣無後昆可示姑付及門存之可乎乃刪其略顏曰詩韻又以身親負薪故自號樵雲子

廢鐸嘆曰先生爲余邑名士而所遇不偶卒窮餓以死亦可哀己方幼時從父讀十歲能詩父命詠新燕應聲而成其末句云回首烟川闊依誰作主人父蹙額曰是子晚運合奇詩兆之矣其爲人剛正而峭直不隨俗爲毀譽故與世多忤詩文亦如其人純以心精勝無時俗靡曼之習有子早卒老而復縲設帳以糊口卽以館爲家七旬撤帳歸僦屋於邑西之呂家集其族子欲迎養不可同人見其初至多招之飲食

數則不至曰余非僧道託鉢胡可常也一日自經於室棺衾畢具衆殮而招其族子葬之

邑人呂沛惇讀于樵雲詩韻歌

先生抗志何嚶嚶俯視濁俗纖牛毛河內世德興門高往往奮翮天池翔泊身矯起方髻髻早見秀氣冲
星杓便便腹笥腴不枵富於吟覽艱於遭濟西燕北馳詩豪形勞名賤歸蓬蒿長鏡負背薪橫挑浩歌一
曲雲中韶生憎迂態狂非驕樵朋拍手笑且嘲橋南西市多塵囂看山百里遊戴鼈咽絕任空陋巷瓢鳩
居聽雨澗聲呶茁庭玉樹森凌霄嶄然見角鬢雙髻墮天嫁禍鳴號眇孤墳草芊荒郊邇來孤館悲長
宵鏗窗兀誦嗽無聊一笑真空大劫超寄生轉泊隨枯棹客歲忽訂忘年交雷陳襟氣逾漆膠先民有言
詢芻蕘談元揮塵鳴天璫搜奇突發囊錦鈔快若渴病澆醇醪我未識曲遑謬褒忤欲有動心不操短檠
儼對煎蘭膏漫拈長句無推敲折楊黃花紛喧嘈敢浼薛燭評豪曹糠粃簸揚瓦礫淘千秋失得爭釐毫
何時把臂同嬉遨飽看明月聽松濤夕陽挂木煙橫皋幽禽戛戛風刁刁維陳野菽並山肴亟呼阿段傾
葡萄右手持盃左手螯醜陶大醉忘憂熬劃然長嘯驚山魃掃空一豪撐青翹

邑人李鴻祖弔于樵雲詩

文章憎命達聞之杜陵叟斯言果不誤茲理誰當剖吾觀古詩人所遇多不偶數畸如先生由來亦罕有
溯自束髮歲出語驚耆耆中年倍奇瑰藝圃恣薪標色爭鼎鼐駁筆挾蛟龍走抗懷古無師負氣今誰友
用此日坎壈所至遭擊掊蹉跎七十年天人共躡蹂逢人劍欲按到門犬輒吠已折陶令兒更奪黔婁婦
途窮惟富詩身乏乃餘壽信哉自作誄生日際陽九自余初識君相重每俛首而君殊落落不問妍與醜
衆人貴附和絲蘿互相糾亭亭澗底松岸厓不可耦一世皆睥睨眼底誰豪右我志自孤行人憐肯猥受
客冬時相見輒言生不久爭知志士懷出語原非苟尺帛挂祠宇竟撒懸厓手俯仰生死間使人痛疾首
今來值獻歲憑棺悲已後不忘平生歡哭奠空山酒哀君生不辰多君義不負灑淚抒哀辭許我知音否
嗚乎俗眼白亂吠多桀狗不遇九方皋誰能外牝牡

文登縣志卷九下二

人物二

李鳳書字宣綸附貢生少孤事生母以孝聞居鄉以敦讓為教族人皆化之贈文林郎靈壽縣知縣有愛菊堂詩稿採入山左續詩鈔歐志

呂潤蕃墓誌君玉貌修髯丰姿峻整望之凝然而中實樂易又耽於詩凡登臨懷思寄之吟詠者皆翛然自遠晚年好菊植佳菊數十百本雜蒔庭階花時佳色繽紛觸目睥然日吟哦其中客至則把酒共賞殆真得柴桑之逸者

愛菊堂感懷詩

世人皆患拙究亦不能巧成敗利鈍間機智豈云保所以古達觀安貧以樂道咄爾狙公術三四欺顛倒此詐一相高萬穿密春草遂令營營輩跳梁弄才藻不知宇宙寬機本庸人造譎謀終自傷孰若儉侏好守墨非至愚大夢等終老
焚香展書讀脈脈開懷抱

李鴻祖字誦亭鳳書子嘉慶乙丑進士任靈壽縣知縣自遊庠即擅文譽每一藝出紙為之貴與族人允升齊名同登乾隆壬子賢書時稱二

文登縣志

卷九下二

人物二

一

李詩優游平和蘊藉風雅有自娛詩稿古近體詩共五百餘首

廩生劉秉鏐採

李允升字晉階嘉慶辛酉進士任濟南府學教授嗜學好古不墨守章句嘗謂聖人之言炳若日星其大端不越彝倫日用身心家國之間顯示天下後世軌範非有難知學者不讀古人書奉一講章為主臬冥然不復有疑其靈穎者間有疑而無所證亦相與俯仰隨俗而不敢言爰取諸家之說而折衷焉為四書證疑八卷詩義旁通十二卷其說詩以序為首次毛傳次鄭箋次孔疏而列諸說於後擇善而從以求其是於先儒之說多所發明允升制藝冠一時接引後學諄諄不倦官教授時濟南劉登桂以家貧廢讀允升召至署中授之粲課以學登桂遂登賢書其子孫多擢科甲培植之功劉氏世世不忘云子瀄琳癸酉拔貢任

臨朐教諭涪林子厚愷咸豐壬子舉人任莒州學正

劉秉鏐採

學使馮譽驥詩義旁通序

文登李藹溪先生篤學人也道光己酉余任視學先生之子敦麓適爲臨朐教官其孫厚愷又余選拔所得士也余因是以知先生既敦麓學博手先生所著詩義旁通若干卷來求序余惟毛傳鄭箋而後各持己見以說詩者衆矣自朱子探衆說爲集傳元延祐定科舉法用以取士遂承用至今蓋集傳者詩義之正宗也顧其中雖多自論定要亦取用舊說王伯厚謂其參考三家闕意涉指卓然千載之上豈不以詩無達詁非博稽而總貫之或無以自免於末師專已守殘之陋也今觀先生此書沈潛經義淵源小序博取漢以來諸家講述有合於集傳者引而伸之其可與集傳並存者附錄焉至邶風狐鳥之喻鄭丰叔伯之稱出其東門爲異國之人采薇出車紀中興之烈蓋持己見以求合者名曰旁通明不敢自託正宗之意亦以見解經之法不必專守一途抑又朱子參考三家之遺旨也若夫詩教之重尤在諧聲是編音韻以陳季立古音考爲宗而以顧亭林之本音參之將因是以復明經韻其益通乎文字訓詁之原也已余既重先生之殫心經訓而又欲導其後之人也故序之

林培由字有藁乾隆庚午舉人大挑知縣署江蘇金匱縣事江陰縣某毆斃族叔賄老僕令代承立券與僕爲信俾僕抵罪大府委培由會鞠培由訪得其情獲所立券契示某某伏罪百姓呼爲神調華亭縣知縣

文登縣志

卷九下二

人物二

二

華亭爲松江首邑號難治培由訓孝弟課農桑懲奸猾築隄捍海潮庶政皆有條理旋里後侍其父光昱甚謹光昱常患股疾培由臥榻旁服事寒暑無閒性友愛積廉不自私公諸昆弟俾皆可衣食嘉慶庚午年八十四歲重赴鹿鳴 上諭文登縣在籍原任華亭縣知縣林培由齒邁八旬官階一命鄉舉際先庚之歲賓興歷周甲之期虔籲 恩榮再陪華宴著加 恩賞給六品頂戴以示朕嘉惠耆儒至意欽此又二年

壬申卒子鍾傳鹽課大使鍾卜俱贈文林郎銅陵縣知縣

歐志

林培玠字用覲嘉慶丁卯副貢多讀奇書擇其尤雅者著覽古隨筆四卷又熟悉邑中故事凡故家士族潛德懿行著爲稗乘以告後來東海文獻多賴以不墜有廢鐸嚙六卷節烈傳一卷道光庚子年屆七十銓

陽穀縣教諭適訓導張某以病卒於學署培玠初抵任艱窘之際經紀其喪以兩齋所得全畀之張所欠債代償之張極乃得歸培玠自恃年老獨持古道與同僚多牴牾爲讒言所中蒞任八月遽于計典士論寃之子鍾漢字西清廩生工八分書著有碑銘彙編三卷

生員林汝助採

廢鐸嚙自序曰余性不好讀方總角時先大人導之入塾讀書甫能上口輒佻達自恣及長塾師課以經書文藝僅習口耳之學不求深解雖間獵微名亦祇襲取實而按之門外漢也而愛說部如命凡稗官野史莫不搜羅而觀之又樂聽往事憶幼時侍先君及諸伯父杖履談及邑中故事歷歷誌之弗敢忘既而應試郡同人讎集各述所聞聽之通宵不倦積之胸中盈千累百每思哀集而記載之而數十年奔波名場亦姑整置迨年逾四旬屢遭虐疾展轉病鄉十載方愈而年已半百耳聾目瞶齒豁頭童故業全拋名心頓盡惟日躑躅街頭與鄰人共笑語復聽牧童樵豎無稽之言以爲樂回憶舊聞強半遺忘益以新得彙集成編分爲八卷置諸案頭日肆觀覽顧未得所以命名之義友人見而諛之曰言雖淺近雅足勸懲蓋公諸同人以資談笑余用是瞿然矣夫夷堅諸皋與正史並垂齊諧志怪于寶搜神遐哉尙矣嗣是而後代有名搆國朝以來新城司寇河間宗伯出著作之餘作遊戲之筆炳煥寔區膾炙人口聊齋先生祖述盲左憲章腐遷集說部之大成造野史之止境後有作者弗可及已他如錦繡才人各抒己見或駢四儷六則憂玉敲金或比事屬辭則蘇潮韓海汗牛充棟更僕難數我何人斯顧以寒蟬之鳴池蛙之奏亂人聽聞詎不令人齒冷耶友人曰不然韓子有云牛溲馬勃敗鼓之皮兼收並蓄待用無遺夫宿醒

文登縣志

卷九下二

人物二

三

半解誰豁醉眸午夢初醒疇開倦眼進以兒女閨房之語鄉曲鄙俚之詞未必不羣然色喜悠然神怡則是編雖微固亦陶情怡志之一助也余無以易其說會年屆七旬始銓陽穀教諭去家千七百餘里隆冬奔波而至囊少有所得以贍餘年而既至則歲試初畢且所遇復多不偶蒞任八月遽于計典匍匐歸濟資斧斷絕徧乞於公卿之門幸臬憲見憐薦回陽穀教讀新任王明府以學舍不便贈乾脩百金始得旋里既抵里入則室人交適出則債主盈門無以排解復閱舊編刪其繁冗無味者共成六卷因憶少壯時夢畢生際遇節節相符始知凡事皆由前定乃附諸卷尾而綴弁言於卷首顏之曰廢鐸嚙兼以明吾平生之學無非襲取閱者但作癡人說夢觀可也

林鍾岱嘉慶己未進士掌湖廣道監察御史爲人剛方清慎辨論鯁直

居鄉好義善施賑贍族卒祀鄉賢祠

道光重纂一統志

邑人宋允和湖廣道監察御史實菴林公傳

公諱鍾岱字子詹號實菴文登人父培選以舉人官江蘇知縣公幼敏悟應童子試時學使目爲國器乾隆己酉歲試列優等將選拔貢成均公聞其父疾未及試期而歸歸數日父卒營葬畢謂弟曰吾家稍富貲財擁此何益聚而能散不愈於握算持籌汨沒志氣耶吾兄弟不能成立無以見先人於地下乃出家財賙貧乏親族其素日債貸不能償者悉焚其券自是閉戶讀書不問家人生產事博學強記自經史外旁覽百家之言挈其要領參合時務曰師心而不師古與泥古而不知時者皆俗學也爲文務達己見恥爲剽說浮詞中乙卯順天舉人嘉慶己未成進士授兵部武選司主事出入供職不避寒暑弟慮其過勞公曰往時求一第不可得今幸從大夫後敢自逸耶先是乾隆四十九年高宗純皇帝恩賞漢人陣

亡將弁世職閱十餘年無成案嘉慶六年廷臣奏請查辦滿漢例既多不同又無舊例可循公乃約二三同事至方略館檢查 國初以來舊式酌定章程 奏著爲例閩省有陣亡無子者僅一胞姪甫周歲稟賦羸弱孀婦恐不能成立懇請其弟承襲部議以現有胞姪其弟不應承襲且慮其弟未必肯養嫂也公曰部中惟揣度情理非有確見確聞孀婦既慮襁褓子不可以官宜暫予其弟令地方官確查俟有昭穆相當者聽孀婦自擇爲嗣或孀婦沒後亦令族長擇其昭穆相當者繼與得職之人爲嗣再請改襲總不得令他人濫襲請 旨准行因纂入則例閩省弁兵調至臺灣戍守渡海危苦閩兵不欲往請就臺灣召募有以爲便宜可行者欲如其請公曰臺灣人非不足爲兵而必撥內兵往戍者乃所以控制之也臺灣一鎮水陸十三營額兵萬四千有奇皆內地督撫提鎮各標抽調防戍三載更代其家屬皆留內地故臺灣自隸版圖以來經朱一貴之亂又經林爽文之亂有叛民無叛兵則其防在民而不在兵若一旦將內兵撤回易以土著懼將來有不可問者堂官驚曰此老成見也事遂議駁旋補職方司主事陞武選司員外郎車駕司郎中東撫以教匪滋事請調文登營副將移駐曹州下部議衆未決公曰吾文登人素知兵弁擾民爲地方累但國家分兵駐守各有遠圖文登沿海今遠撤兵儻海洋有警何以禦之且隨賊起處率行移鎮亦不成政體也堂官深然之尋補江南道監察御史轉湖廣道監察御史嘉慶二十年卒於官公在武選司十四年事有未安每於堂上執稿剖辯言論侃侃而堂官稔知公鯁直成性咸優容之不之罪也自奉儉而好賓客遇鄉里之愿慤者雖村夫野老無不與通款曲寒士尤周濟而敬禮之多方獎藉見其有成則大快好吟詩所著花嶼草堂詩集於奇男烈女孝子忠臣皆以韻語揄揚其事情真意摯可歌可泣論者以爲有直臣之概云

林鍾遂字

歲貢生才思不羣尤工綺語詩敏捷超逸古歌近鮑明

文登縣志

卷九下二

人物二

四

遠四六雅秀翩翩自得著有蠡海堂詩偶存腫東閑譚同時劉模字端夫詩詞極工居鐵槎山下躬耕自適有談及仕進者輒以他語亂之與鍾遂相契郵筒往來鍾遂作行路難十三章贈之時方至評曰俯仰古今慨當以慷一以抒一己之性靈一以見端夫之高致端夫非獨逸人亦韻士也家乘

林汝謨字慎人培由孫嘉慶己巳進士授安徽銅陵知縣縣濱大江甫下車卽修江壩葺學宮清獄訟嚴考試每出署老幼男婦簇擁道旁焚香頂祝曰百姓安居樂業無過此時願一觀青天以慰民望任三載歸邑中義舉如 文廟節烈祠諸工皆倡捐修築道光甲午歲饑施舍衣食全活甚衆自此以爲常每值青黃不接之時煮粥以賑困乏三十餘

年
狀行

于天澤字崑陽由浙江石堰場大使陞臨海縣知縣廉潔自持聽訟明
允疑獄立決民頌神明邑素多土匪有飛虎旗兩頭蛇諸名目為民害
天澤按名擒誅之先後捕獲洋匪數百名悉置諸法歲歉首先倡捐富
民從之煮粥施賑多所全活擢福建知府署平潭同知平潭孤懸海外
勞心撫輯民賴以安因颶風覆夷船罷吏議去之日沿海諸民送者塞
路天澤性孝友好臨池晚年專仿米襄陽書蒼老入神有臨十七帖石
刻行世贈中憲大夫貴東兵備道歐志

松江陳廷慶跋于太守臨十七帖石刻曰文登于太守崑陽先生三十年前為雲間浦東饒尹其長嗣克
襄由庶常改秩秋曹嘉慶辛未來松主講出其先公手臨右軍書見示藏婀娜於剛健猶想見永和餘韻
公晚年書好米顛予快觀此帖惜不見當日解衣磅礴時也胡希伯跋云崑陽太守山左名宿出宰章安
政聲治譜固為卓卓至字學精妙兩浙當道中無出其右者所臨禊帖遒勁挺秀直追褚董其仿米襄陽

文登縣志

卷九下二

人物二

五

書法尤神采奕
奕渾然無二

于克襄字蓮亭天澤子嘉慶乙丑進士翰林院庶吉士改刑部主事由
郎中外任貴陽府知府貴陽為黔南省垣城中貫河久淤塞遇大水則
患漂溺捐貲挑濬三年工始竣河流通暢不為民害因名太平河以餘
貲修義倉四買穀分貯以備凶荒黔城外雪厓洞為一方名勝舊有諸
葛武侯王陽明祠久傾圮募貲新之乾隆間藩司陳德榮有功地方為
建祠以誌遺愛陞貴東兵備道調湖北鹽法道適鹽匪案中株連無辜
平民數人克襄欲釋之楚督周天爵必欲置諸法克襄力爭楚督出言
詬詈克襄憤起曰士可殺不可辱出言糞土真愧疆臣吾不與鄙穢者
同事也拂衣去著有鐵槎山房聞見錄十卷鐵槎詩存六卷家傳

于惟誠字立斯候選巡檢性豪爽慷慨多大略善排難解紛鄉人爭訟者爲具酒食勸釋之訟者多罷還親族貧困則割地以贍之賴以舉火者甚衆邑境內市集之區共二十有一處 國課例徵牛驢稅銀柴兩伍錢貳分玖釐牙雜稅銀柴錢伍分共銀捌兩貳錢柒分玖釐市設經紀一名俗曰牙行而征斂之酷百倍於常額之外一粟一絲不準私相買賣細及鵝鴨微至薪柴皆不得免有漏者罰無算日暮罷市守候兌稅嘗至夜分儻值雨雪風霾苦不可言鄉民每值市期如赴湯蹈火乾隆三十六年貴州簡貴朝來知縣事下車詢民疾苦惟誠首以情告貴朝仁慈愛民當諭以設法辦理惟誠商同富紳陳守仁等共捐銀百兩交當商生息以輸 國課一切牙稅之弊悉除市廛風清至今賴之卒

文登縣志

卷九下二

人物二

六

年八十九

家傳

于昌緒字慶源惟誠子年十六入邑庠爲文古宕有奇氣學使趙佑器之連擢優等於書無所不窺自天文輿地音樂詞曲外書法古奧奇肆妙絕一時後以廩貢肄業太學尙書鐵保欲招置門下誨其子弟卻之再三曰人貴適志吾不能俯首貴人之門與俗士共奔走伺候也家近南城學者稱南門先生因以自號焉署淄川學教諭卽墨縣訓導卒年八十四弟丕緒字仲恢精醫理能於三年前診脈而決人之生死任醫

學訓術

家傳

畢以紱字子佩所雋子天性敦篤好博覽經史留心時務由縣丞署崇明縣知縣有政績移治丹陽爲浚練湖四十里溉民田數千頃兼濟糧

運值銀價奇昂民間完賦以錢官易銀納司或議加賦以紓曰與其累百姓何如累一身邑人立石頌之署蘇州府管糧通判調署金匱縣事縣有東林書院爲前明顧憲成講學之所後廢爲泗水菴倡捐修葺頓復舊觀比去邑人祖餞十餘里競爲詩歌頌之歐志

吏部左侍郎季芝昌小亭畢公墓誌銘

君諱以紘字子佩號小亭先世均以詩書通顯代有聞人曾祖諱壽雍正癸卯拔貢甲辰副榜祖諱宿庚乾隆丙辰舉人直隸清河縣知縣俱 贈奉政大夫父諱所萬陝西涇陽縣典史 例贈文林郎曾祖妣氏岳祖妣氏張俱 贈宜人妣氏張 例贈孺人昆季二人弟以朗福建候補縣丞署嘉義縣丞君天性敦篤穎悟過人少時隨父任關中讀書於制藝外好博覽羣史留心時務會江南河決援 例以縣丞投効河工復改地方歷任江陰崇明縣丞署徐州府經歷崇明丹陽金匱知縣蘇州府管糧通判始到省值徐州饑委賑災黎君編核戶口拯恤貧病擇悍獨無告者厚給之痛懲吏役之爲奸者民沾實惠至扶攜告語曰畢官府活我也署徐州府經歷以開挑荆山河勞怨不辭咨補江陰縣丞旋調崇明縣丞崇明饑君賑民如在徐時民間謂二十年無此好官嗣辦揚州興化縣及蘇州吳縣賑務皆始終一轍潔己愛民所全甚衆適運河淤淺舉行海運崇明十激鎮爲糧艘寄棹之所君親歷洋面防護催饋凡七閱月大吏奏請儘先升用遂署崇明縣事君蒞崇最久化最深邑人以德銘心版惠洽海疆治河績懋督賑恩深鐫碑贈君蓋紀實也又以廉能受知移治丹陽爲江南第一水陸衝區令其地者一歲之中多次境上供

文登縣志

卷九下二

人物二

七

億殆無虛日君左右措置不使民間有纖毫費暇則據案治事凡有利於民者無不修舉開泰橋修張官渡呂城二閘邑人立石頌之城西練湖受十游水八十餘汊濶四十里灌田四萬餘頃歲久輒淤君集紳董捐廉濬之設涵洞滾水壩數十以利啓閉迄今碧波澄然阡陌交通實君之力湖中有亭民於其旁建報功祠設君長生祿位示不忘也巨盜羅成信等於鄰境迭次行劫掠無數爲商民大患嘗以數十人出沒江湖無敢禦者君偵知其迹擒捕戮之事實奉 旨嘉獎調取引 見時江南蝗起交飛蔽日獨至陽邑不食禾稼見者歎異以爲君之至誠所感中丞林公則徐論君治績兼以漕務出力 奏請以知縣遇缺即補尋署蘇州府管糧通判漕弊以清既又出治金匱縣事時海氛甫息銀價頓昂百姓完賦以錢州縣以錢易銀徵不敷解胥吏咸請加賦君不可請者曰不從將累已君曰吾甘使一身受累不遺闔邑以無窮之累也卒不行爲政恩威並濟於催科獨無所迫尤優禮儒生任丹陽時倡捐鄉會試費紳富從之集二萬餘金詳請方伯發典生息於是寒士無資斧慮金匱東林書院明季東林諸君講學地後廢爲泗水菴君慨然偕邑士夫修葺之增課舍益經費悉復前賢顧公憲成之舊所至政聲卓然比去邑人祖餞十餘里辭之不去競爲詩歌文章以頌君輯而刊之曰抒情嘉頌曰梁溪雲陽紳耆嘉頌君事親孝色養無違居喪哀毀逾恆每歲時致祭展先人遺像未嘗不流涕久之性友愛仲氏宦遊南省孔懷急難歷久不渝族姓繁衍其曾祖易簣時以建立家祠爲屬兩世經營未就君購地立祠置祭田若干畝踵成其事族塋之無墓碣者皆立之居鄉睦鄰里輕財利有稱貸而負之者焚其券終不一言在徐州受某公託重金十篋人不及知卒歸諸其家待人不設城府懷抱坦然官吳中垂三十年循分自盡略不干求故屢登薦牘而秩不果遷嗚乎悲哉君生於乾隆某年月日卒於道光某年月日春秋六十有九配張孺人子二長瀚昭道光丁酉拔貢庚子舉人次淳昭廩貢生孫三將奉樞歸葬而請銘於予予於君爲通家曷敢以不文辭銘曰忠厚夙秉謙抑持躬歷宰三邑萬物春融道德之望循良之宗我銘此石永奠幽宮

畢亨原名以田嘉慶丁卯舉人任江西崇義知縣聰穎特達古學最深

能窮聲音訓詁之理尤邃於尚書著有九水山房文存二卷

新登州志

聊城楊以增九水山房文存序

九水山房文存二卷九水先生著述之僅存者也先生山東文登人姓畢氏初名以珣改名以田嘉慶丁卯領鄉薦累困春官又改名亨道光丙戌大挑一等籤分江西署安義補崇義卒官字恬溪愛卽墨勞山九水之幽勝因號九水先生從休甯戴東原先生遊精漢人故訓之學尤長於書雖爲帖括家言非其意也以國子生主東郡啓文書院郡中搢紳無敢以年職陵誚者然遠於利祿之途莫肯傳先生之學惟增師葉亦園先生敬愛備至以爲吾東學人莫之或先陽湖孫淵如觀察以巍科涖東土疊攝藩臬事擅博雅名爲先生舉主然折節下交久而益敬觀察每有所疑必質之先生先生就其手稿塗抹或至不可辨及觀察彙梓所纂叢書凡先生所乙改悉仍之不易一字說者謂觀察易書二經疏義精當處多本先生說匪直孫子敘錄一卷爲先生所譔也桂未谷先生說文解字義證引先生篤論至數十百事先生嘗修東郡志未卒業繼之者時有竄易補綴不能必其主名先生每與朋友談讌搜摛經史疑義多人所未聞然一皆引伸古訓無拾唾之論亦無憑臆之談道光三十年先生長嗣文昭存增於南河署詢求遺書僅存此册而傳鈔不無錯誤因屬嘉興高君伯平詳校付之梓人篇不過三十文不過三萬而考核精審詞意淵茂內有湯居毫一篇正文既淳粹注尤博辨若正文屬先生則注當得之諍友或先生箴良朋之誤抑或學隨年進自立兩說疑不能明故仍其舊先生之學出於休甯休甯猶時有據孤證意改故籍之弊先生則非集衆證不肯輕下一字近世名流述作率繁富唯江都汪容甫明經晚年有述學二卷爲自定真稿與先生遺書篇帙略當論文則明經之萬朗駘宕過先生論學則識力俱相若而明經身後且六十

文登縣志

卷九下二

人物二

八

年名稱益盛先生乃寥落至此然好學者得先生遺書果能精心推勘觸類而長則先生之說散見他氏者皆可別識是先生之學久而彌光先生亦可以無憾也咸豐二年

涇縣包世臣九水山房文存後序

致用本於窮經治世之術也窮經將以致用尚志之學也自利祿途歸帖括而應試與讀書分爲二間有績學好古之士出其中又以說經爲名高遊談射利而治經與涉事又分爲二乾嘉中漢學盛行南北知名健者十數其人有達有不達大都世臣弱冠時所嘗親近然匡居則求爲可知見知則持此以往其人未嘗見其語未嘗聞也故以世臣之寡陋數十年資多聞以自澤而拳拳服膺蓋亦靳矣嘉慶辛未赴春明二月杪始至德州停驂草棚下遇九水先生同席各飯談次知先生來自濟南因詢東省風氣先生言通省所苦在知府無權益不事事恃節壽爲生涯助州縣賤閭而已世臣心折其持論得要領而先生飯畢先行世臣至都晤舊識之姚秋農尙書朱玉存宮贊語及先生乃知爲二公丁卯所得士二公皆極口稱先生爲當代經生世臣以經生多不解事益奇之詢得寓所遂頻數往返談讌常至夜分深服先生之學主於闡許以通鄭尤長於書然博學而擇善不肆臆說如說詩無擇譽髦斯士爲有教無類廣鄭氏之義而更圓足說書剛克柔克本杜氏說孟子山徑之蹊間介然爲山之直麓有蹊如界推許氏說而徑蹊路不重疊譬宋儒好鑿空以俗訓訓古經其尤甚者自春秋至唐書策所載皆子糾兄而桓公弟顧於千載下意變其長幼以伸己議凡先生立說必有根據皆此類也嘗告世臣曰故訓句讀爲治經始基此處不明則不能疏通古人文法而意義無以饜吾心一旦涉事迂疏無效僕所爲殫精研究實欲由末以探本然半生事此尙多難以自信又已老恐未足以酬初願已及道光丙戌先生以大挑一等分發江西瀕行問居官之要世臣曰先生年已七十雖清健似五十許人而實未足供馳驅先生到彼需次多暇幸念尙書爲政書而向少善說者縱未遑旬比字櫛於大義所存逐條疏記付梓以餉後來則功行比遺愛一邑爲大先生首肯之委署安義值 赦令邑有兄殺胞弟之案先生列之不準援赦上游駁斥先生執

不念鞠子哀泯亂倫彝刑茲無赦之經義以諍之大府怒已定劾休適歛程春海侍郎主試廣東取道豫章大府款之侍郎問先生起居甚悉事乃得解嗣補崇義崇義俗悍地瘠會匪所叢集長官經月不能數日在署治事先生年且八十遂積勞卒官而書竟未成先生夙具服古入官之志而臨事未見經術飾吏治爲吾黨生色者以見用已晚筋力不任故也至可悼惜己酉夏世臣客楊至堂侍郎南河署晤長嗣文昭茂才詢遺書惟前後雜文一册侍郎珍藏至壬子秋以屬嘉興高伯平茂才校而刻之僅三萬餘言先生爲學之宗旨具在果有好學深思觸類而長之儒善讀之則先生之學不患其無傳侍郎此舉非唯篤念者舊已也其嘉惠來學意至深遠世臣故歷敘締交始末並略紀所聞以告觀者咸豐壬子

畢以繡字文亭所謚子候選鹽課大使性高潔淡泊寡營酷嗜秦漢篆隸少師曲阜桂復得其傳臨摹四十年不倦尤慕秦漢印章參金石佐六書以意行法而變化出乎古人鐵筆之工見稱於時畫倣白陽山人筆意貴官顯達索之輒不應家居文山西麓老年偃息林泉有蕭然高世之志著有聽雨樓詩稿子廷昭字幼坪諸生光祿寺署正銜寢侍毫母十年色養備至人稱其孝

生員李德明採

文登縣志

卷九下二

人物二

九

曹尊彝文亭山人傳

文亭山人名以繡姓畢氏世爲文登人居文山之麓因號文亭父所謚乾隆己亥科副貢仕至甯紹台道山人癖嗜篆隸少師曲阜桂未谷得其傳勤四十年不衰尤精秦漢印文所摩刻參金石佐六書以意行法而變化出乎古人畫得白陽真意以余所見近代以來如山人者蓋鮮也南遊返棹築聽雨樓文山下藏古印章四壁爲滿晴日開軒天光雲影近在櫺戶爲海上隱居勝概卽山人集中所云東鄰道觀西鄰郭南面人家北面山也詩喜白陸五律法杜少陵客居撥悶類摩印以詩又善撫古帖涉筆絕肖如名搨顯者物色之輒不應與余居半載旣別篆札疊疊筆墨猶新如常掛山人於座上也西史氏曰余游袁浦與山人稱忘年交云先是林制軍則徐以出觀察門招山人旣至乃罷去遂客江上自癸卯掛別迄今四載郵遞往來每示余心腹惜

余相見晚獲交山人不久也

劉彥煦字育萬歲貢生篤好詩書道光二十一年除平度州訓導年已八十有九爲除陋規諸生欽其高義及解任祖帳數百人咸歎息泣下河南陳州府都司王觀成爲布衣時過邑境染時疾臥病途中與彥煦不相識也彥煦使人輿至家延醫調治王後仕至都閫嘗對人歎息曰劉公厚德刻骨難忘子升謙字直夫太學生樂善好施道光十七年饑

煮粥以食餓者升謙子書芸諸生究心史學教子弟以躬行實踐爲要不專務詞章家傳

王大中字悔菴諸生學問淹貫屢試不售嘉慶乙丑 欽賜翰林院檢

討詩選入山左續詩鈔子廷碩廩貢生挑取臚錄任滕縣教諭家傳

谷生賢字錫九乾隆丁丑武進士銓四川川北守備隨征緬甸於蠻化

村攻賊寨傷頂落崖幾死以功進松潘都司三十八年 王師征金川

檄生賢進勦攻得石卡五卡礮一百五十木城三殺賊無算題補都勻

協遊擊 賞戴花翎 賜恭親巴圖魯號旋於西山梁受傷身死 賜

葬及恤銀入祀昭忠祠廕一子世襲罔替舊威海志

邑人陶易都勻協右營遊擊谷君墓誌銘

乾隆三十有八年 王師征金川二月二十六日進攻納占遊擊將軍谷君沒於陳事聞 朝廷褒恤

文登縣志

卷九下二

人物二

十一

賜祭葬恤銀四百兩陰一子守備逾月君之子曰孚來泣請曰公與我先君同鄉而交久事熟聞敢以銘詞爲請嗚乎余忍銘君哉君與余爲威海衛人後歸縣同爲文登縣人里居近向未款接也繼在京師君將赴任川北始一過往長身鶴立音響鏗發論及國家事則感慨奮發毅然自忘其軀余心蹙之知我里固有偉丈夫如君者也比余爲平定州牧君以都司入 覲又一相見言及緬匪事袒而示我傷痕所在歎曰鎗洞我脇不死墮崖不死意者其別有死所耶余益驚異之君姓谷生賢其諱錫九字也祖父以上皆力農君生而有志學韜略習騎射乾隆二十二年成武進士銓四川川北守備丁亥隨征緬甸進攻蒲乍變佈濟諸處戊子進兵蠻化村連攻賊寨傷頂落崖幾危矣以創回營調養川省督提旋題補松潘都司引 見蒙賞恤傷銀二十兩回籍省募繼赴蜀檄進勒小金川得賊西山下緊要石卡數斃賊人得約咱賊寨又攻西折龍山甲木山梁卡爾金邦科諸處又自東山梁下溝攻得溝內水礮石卡溝口阿仰山梁格藏達烏巴凹各宗一帶以功題補都勻協遊擊又攻翁古爾隆大木城石礮石卡殺賊多人又得打爾碼獨攻孫克宗諸處奉 旨賞戴孔雀翎 賜恭親巴圖魯號銀一百兩又攻克美諾功列超等是年率兵佔踞大金川納占山梁獲大小石卡旋於西山梁受傷身死計在滇省打仗者十四次在川省攻得石卡五道卡礮一百五十木城三石卡數道橋梁一座殺賊無算沒年四十九歲祖允宜父予宏皆以君貴贈昭武大夫祖母鄧氏母苗氏皆恭人娶畢淑人二子長曰孚蔭守備次曰賢業儒女一人孫男二人於某年月日葬於軍馬嶺之原君負大志而卒崎嶇以殉未得展效於世爲可惜也然人旣矢以死報國矣夫豈有所待而審顧於後日耶有所待則非君之志矣爲之銘曰登之水兮粼粼之翠山兮蒸雲魄歸來兮日曠松柏列兮秋春中有堂兮有門昌 厥後兮答國恩奔世業歎兮是爲忠毅之墳

李振甲字玉峯道光戊子武舉授兵部差官順義營都司川北鎮標右

營都司保遊擊

賞戴花翎咸豐六年隨征金陵於紫金山陣亡

新登州志

邑增生宋允和李都尉傳

公諱振甲字玉峯世為文登人幼有器量比長入塾塾師為講馬伏波傳公私語人曰馬革裹尸大丈夫當如是矣因廢讀爛武藝騎射精良勇冠一時以道光戊子武闈舉人授兵部差官期滿補直隸順義營都司緣事落職家居九載絕口不談兵布衣粗食與田夫野老話農桑課晴雨無復知其為故將軍也咸豐三年紅巾猖獗東南諸郡縣望風披靡官軍狃於故習遇賊輒先遁公憤激曰武將惜死賊何由平即赴九江口軍營投効時向軍門鎮九江委公撫恤難民經理火器公區畫有方向軍門異之委帶兵勇公與士卒同甘苦有賞賚徧給之不遺一人士卒不食公不食以故兵勇皆樂為公用向軍門大異之委腹心焉是年十月總理火藥局兼帶南韶鎮南雄協八營官兵公督率訓練步伐止齊一歸整肅由是官兵有起色四年蘇撫吉中丞調赴鎮江九華山管帶糧勇十月向軍門復調回金陵管帶台勇五年九月補授四川川北鎮標右營都司向軍門以公協力同心去之如失左右手奏留軍中參謀營務公入幄運籌上馬殺賊智勇之名震於江左六年三月以敘功 賞戴花翎五月管帶貴州兵營紫金山十八日未刻紅巾蜂擁而至金鼓喧填旌旗蔽野沿江數百里皆賊巢公身先士卒與賊晝夜血戰殺獲無算至二十日刃折矢窮外援不繼猶復徒手奮呼手刃十餘人卒以眾寡不敵遂致遇害事 聞奉 上諭該員係與賊血戰陣亡照應得升階加等議恤以慰忠魂 賜全葬銀三百兩致祭銀十六兩 賞恤銀四百兩 賞給雲騎尉世職襲次完時給與恩騎尉世襲罔替公沒後賊見公手執紅旗麾兵力戰時將薄暮陰風慘淡日月無光賊大懼紛紛潰亂自相踐踏疑公猶未死也嗣後官兵與賊戰賊隱隱若見公則震懾不敢前以為李都司且至云

文登縣志

卷九下二

人物二

十一

姜順原名國忠性忠孝倜儻負奇氣初帶勇勦雲南回匪抵宣威州乘夜以銳師擣賊巢穴味爽破賊營六威名大著大帥屢以恃勇輕敵戒之為易名順順卒不能改每戰輒以少擊眾旋歸山東撫標擢梁山營都司加遊擊銜淄川劉逆煽亂僧忠親王奉 命征討順奉調督軍過周村秋毫無犯賊守孤城久不下順恚忿移軍南門逼之賊懼突出順身先搏擊大戰良久中飛礮死順善撫士卒眾樂為用及卒一軍慟哭事 聞照遊擊議恤并附祀淄川僧王祠

新登州志

邑增生宋允和姜都尉傳

昭武都尉姜公初名國忠改名順文登人居靖海故衛城北姜家溝村世業農公倜儻負奇氣不甚力田成童時嘗於道左見汎兵荷戈負弩赴文登營講武注目良久若有所欣慕者同耦窺其意曰兵勞苦有鋒鏑死亡憂豈若我農夫飽飯力田日午則枕鋤藉蓑酣眠隴上公奮然曰丈夫當縛袴從戎拳旗殺敵建功萬里外博金印如斗大即不幸而身死疆場以馬革裹尸猶當血食萬代如爾等者沾體塗足老死田間何益吾安能鬱鬱久居此耶即於午後擲草蕘奮錘起舞作搏擊狀眾皆笑之稍長嗜酒喜博益無

意於農太翁常怒其游惰兄服賈京師公以負博債走依兄兄曰弟何來禾即熟誰秋穫者即與以數十金使歸公出都門見道上有飲博者輒就焉不數日金盡稱貸歸太翁益不悅咎逐之又潛往京師傭於巨室巡更私歎曰終宵擊柝無出頭期時金陵逆匪猖獗咸豐癸丑冬都中奉 旨團練義勇往應募自是服戎衣習技擊精悍趨捷諸隊皆不及適山東濰人有赴四川永甯觀察任者慮道梗募數人備戒以往公與焉永甯觀察駐瀘州亦練義勇飭公爲隊長公益嫻騎射數月將遣山東義勇數十人回籍有善相人者謂觀察曰姜國忠貴人也數年後官級當至三品且其人負性忠烈大人以國士遇之必能禦侮疆場妖氛不足平也觀察乃遣諸義勇歸獨留公適 欽差幫辦雲南軍務某公路出瀘州見公奇之令帶勇七百人隨赴雲南防勦回匪至則勦宣威州賊匪克捷蒙賞九品頂戴既又克賊於紅橋鋪千家屯柳灣屯等處以功晉賞八品頂戴公乘間說 欽差某公曰賊以宣威州西南諸營爲巢穴我若出其不意宵以銳師擣之可大創也某善之即命公往公乃以敢死士數百人夜入賊營奮勇前驅士卒隨之無不一以當百所向披靡賊呼號驚潰謂將軍自天而下公乘勝躡之至味爽破賊六營斬首二千餘級蹈藉死者無算軍威大震 欽差喜賞六品頂戴以外委即補且誠之曰爲將之道出奇制勝如飛將軍者不易效次則當刁斗森嚴如程不識方爲節制之師自今以往汝其無恃勇輕敵因易其名曰順公唯唯出則忘之每勦賊以少擊衆致身危者數矣然以天幸卒不死嘗由間道捕賊經深山過古寺老僧熟視曰君其姜公耶公問何以知之僧曰自宣威州破賊後雲南婦孺皆仰公威非公孰敢履巖踐荆棘搜賊於人迹罕到之區老僧故知其爲公公勿違寺有酒可痛飲也公盈觴而去後於堯坡諸處勦賊賊見公旗幟駭曰姜將軍至矣則皆遁雲貴總督某公以公勦辦回匪奮勇出力保奏賞五品藍翎歸山東省以把總即補公至山東飭發濟南城守營候補署理歷城外汛把總東昌土匪煽亂公率兵防禦大小數十戰皆獲捷越次升守備加都司銜東昌既平擢梁山營都司加遊擊銜未赴任會淄川劉德培煽惑淄人據孤城爲逆堅守不下 欽差大臣親王僧邸奉 命征討公奉調赴淄川僧邸素稔公名獎勵倍

文登縣志

卷九下二

人物二

十二

至數出戰皆有功而劉逆困守危城窮蹙不日即下公請移近南門扎營距城僅半里勢甚逼賊大懼拚死出戰直犯公營公身先衝賊士卒憤激殊死戰城上礮如雨下我軍戰益力忽飛礮中公公幾顛忍死呼士卒曰前淄城頃刻破吾當與諸軍會食城中士卒見公創甚呼曰將軍急回營裏創賊不足憂也公回營諸將馳往視之曰都閫何如矣公力疾起曰順有罪攻城不克致令賊礮傷要害處吾生不能滅賊死必爲厲鬼以殺賊大聲一呼仆地而殞時年三十有二僧邸聞之泣曰天不欲使吾平海內耶何奪吾勇將之速也士卒回營聞公死皆慟哭羅拜淄川百姓以公之有德於鄉里也爲位以哭之公軍律最嚴信賞必罰與士卒同甘苦 朝廷有賞賚悉陳於庭徧賜士卒已身一無所私素豪飲善博勦賊以來飲不過三爵博則絕口不談每遇賊身先犯難士卒皆樂效死故所至克捷事 聞照遊擊陣亡例從優議恤襲雲騎尉三世後給予恩騎尉世襲罔替淄川之既平也紳民思僧邸之德並感激公之爲民勦賊而死請於 朝爲僧邸捐建專祠以公附祀焉弟國蘭亦以候補外委帶勇征安徽陣亡

鞠德魁六品藍翎咸豐九年三月安徽護城陣亡照守禦所千總例給

恤銀二百兩並加贈守禦所千總銜議給雲騎尉世職襲次完時給與

恩騎尉世襲罔替

生員李德馨採

宋慶賞字旭亭嘉慶戊午舉人大挑知靖安縣事廉潔慈祥振拔單寒

視民如子歲洊饑倡議捐穀平糶不繼復請動常平倉未待報可先發

廩救饑前後三任以疾卒去之日囊囊蕭然士民哀送者塞途

靖安志名宦傳

陳信字蘿溪嘉慶癸酉舉人任霑化訓導端方正直為學守先民遺訓

不蹈時趨著蘿溪史輯四卷自晉書下迄明推闡抑揚足資炯戒

廩生牟嶠採

邵貞元字復堂道光壬午副貢文思敏贍下筆千言立就懷才不遇士

論惜之

生員劉培選採

王者政字春舫道光己丑進士授四川儀隴知縣在任七年有政聲遷

巴州知州越雋同知越雋在萬山中苗獠雜處屢啓兵釁嘗單騎夜入

荒山徧視扼塞盡得其虛實乃羈縻其酋以恩禮撫之羣獠讐慄無敢

動者暇則修書院教士子親督課之遂有登賢書者歷雅州嘉定龍安

知府調甯遠嚴察銅弊并代輸淹田糧款民德之乞養歸著有蜀道聯

文登縣志

卷九下二

人物二

十三

轡集

新登州志

谷臬字賡熙歲貢生贈修職郎端方孝友幼歷艱窘苦志讀書教授生

徒多所成就子振庠字芹雨道光丙午舉人任昌邑博興臨邑訓導刻

意勵行步趨不苟士論重之

生員王樹葵採

孫士傑字鵬舉太學生幼有至性父世法早卒母李氏守節自誓士傑

事節母備極色養母歿廬墓三年未嘗見齒道光辛卯應鄉試卒於省

垣千里歸櫬家人啓視之面如生人以為孝感之報祀忠義祠建坊里

左與節母李氏同坊

家傳

邑舉人谷振庠孫孝子墓表

孫孝子士傑與余家為世交因得悉其為人而緣慳一面心竊憾焉道光二十二年闔邑士大夫聞其事於朝奉旨旌表入祀忠義祠並給建坊銀三十兩余又心竊慰之今孝子歿已五十年而父老傳誦稱孝子不少衰余耳熟焉故能詳也孝子三歲而孤與節母李氏共命七歲入塾會塾師分梨羣兒樂啖

之獨孝子藏以遺母師知之歎曰陸續懷橘復見於今矣比長入太學肄業聞母病倍道歸抑搔扶持無須臾離母憐之夜令退休孝子唯唯乃潛傍寢門席地坐聞母呻吟則疾趨入問母訝其來則曰兒偶起耳久之母知其未寢也乃命居榻側孝子侍母疾澣濯廁諭必躬親暇輒誦佛經爲母祝母久病飲米汁則手調以進如是者五年母歿踰月而葬孝子結廬墓側負土崇封每食必奠奠必呼母者三有家事則焚香俯伏以告如請命者然孝子居縣之北鄙素無烏自孝子廬墓後羣鳥翩翩來翔集松楸朝夕爲常人咸異之三年服闋猶不欲歸親族力勸乃攀柏號泣曰兒不得常在此矣歸理舊業思得一第以顯揚其親年五十三應鄉試卒於濟南寓舍時道光辛卯七月日也其子聞訃扶櫬歸已歷四十餘日家人欲啓櫬視之賓友阻之曰孝子體素豐今靈輻於炎天暑雨中顛簸千餘里勿視便家人強啓之而孝子滿面紅光如生時酣睡未醒者賓友大異之咸太息曰天地有正氣死而不朽如此哉如此哉孝子父名世法早卒母李氏 旌表建坊娶姜氏都氏子三長稼早世婦于氏 旌表節孝次和增廣生次程程之長子蘭升光緒壬午科舉人

畢光昭字華甫以廉子道光季年任浙江鎮海典史白沙曹娥等司巡檢咸豐元年爲省城武林門外段巡官攜健僕周歷村莊宵小屏迹後署南潯鎮巡檢勸諭鄉團立條約勤訓練嚴密守禦民賴以安在任二載以疾卒於官

家傳

文登縣志

卷九下二

人物二

十四

烏程縣訓導魏謙升畢華甫先生傳略

道光乙巳丙午間畢曼年方伯爲餘杭令時夷亂初定土匪竊發其爲防禦計者至周且密余遊其地知其政中心欽欽以得賢令尹爲彼都人士賀未幾方伯調繁去而哲兄華甫先生以佐貳官需次浙中咸豐元年冬奉大府檄爲省城武林門外段巡官君無眷屬僅攜一幹僕爲北方之強幼習拳勇多膂力主與僕可敵數十人每夜出巡行坊陌間以鐵器防身一燈前導凡窮村僻巷無不周歷往往達旦始歸是以宵小皆伏不敢出二年春差將滿忽一夜有七八里外盜劫質庫者君夜巡越界至適遇之盜始逸去而質庫之鄰則窩家也君命其僕入室搜賊有一婦人拒戶不納君以臂格婦婦踣乃入室登其樓有伏賊踰垣遁搜得黃白金首飾百數十事悉返諸質庫事平以告余余曰君深入危地非智勇過人禍且不測可謂膽包於身矣余與里人具公牘於大府籲留我好官不令去大府允之自春至秋巡事始終不懈冀可過二年之冬而君以敘勞當權烏程縣南潯鎮巡檢司事蕭然行李無以就道里人爲治裝而往三年春粵匪攻陷金陵浙江震動郡邑皆事團練南潯爲商賈輻湊地君勸諭鄉團立條約勤訓練嚴密守禦他鎮所團皆不及民賴以安鎮之紳耆亦向大府籲留之已踰二載而君忽遘疾竟至不治以咸豐四年十二月三日終於官舍年五十有七無子以弟之子世璋爲嗣君既卒士民弔者無不哭失聲有官麗水廣文請老歸者得美裨備飾終之用願讓君藏身非平時以實心行實政感人至深者安能如是耶君籍隸山東文登縣爲邑中望族代有聞人至君而入仕於浙大材小就知君者咸惜之君性剛正嚴一介之取與與凡爲卑官者不類友必擇交以立品爲重不端者則絕之其戚有爲顯宦而同鄉不善之者僑居浙中不歸君雖寓在同城不與往還其清介絕俗如此嗟乎今之膺民社者人人得似君勇於敢爲百廢俱舉又何至賊擾中原所在焦爛曠日持久糜饟勞師而上煩 宸慮惜乎君之位卑不克大展其用祇能盡其職分之所當爲以期無愧於心無負於民而止人皆曰此君之不幸也嗚乎豈獨君之不幸已哉

畢清昭字子玉所密孫道光辛卯舉人讀書穎異性孝友事親先意承志人無間言撫兩弱弟皆克樹立居家接物坦白無私年三十八卒士論惜之嗣子世模任金華府水利通判

家傳

畢承昭字曼年清昭弟道光丁酉拔貢授浙江桐廬知縣歷任繁劇者七所至有政聲遷定海同知署甯波知府鄞縣以加耗激民變聚數千人據石山衝浙撫發兵勦之而敗承昭單騎往曉以信義悉解散擢甯紹台道民間有青天之號歷安徽按察使浙江布政使以皖省賊勢披猖改安徽布政使時州郡殘破軍營十數里外皆賊壘承昭內籌軍食外馭悍卒相幾勦禦署巡撫調廣東布政使署巡撫以母老陳情歸弟鈞昭字禾年候選縣丞渾厚和平鄉黨稱善

新登州志

畢瀚昭字星源咸豐丙辰進士授工部主事時金陵賊勢猖獗隨侍郎杜翹出京委辦登屬團練差竣加員外郎銜以母老乞假歸養丁卯捻匪東竄商諸邑令復興團練守崑崙山口文榮二縣安堵如常賊退與在籍戶部主事張樹甲舉人李厚愷太學生呂體復諸生王震一監生于肇春王國桂從九于文蔚于東川劉宗向曲升吉張問仁議築崑崙山石牆以防後患光緒丙子大饑與知縣王廷錦籌貸賑法復請倉穀以濟飢民全活甚衆後與知縣蘇杰勸辦社倉七十餘處以備凶荒凡有益地方之事無不竭力爲之著有不自知編弟茂昭字存樸同治壬戌舉人大挑知縣籤分福建未赴任治家有方課子弟以禮法建祠堂置祭田族中之貧乏者各給以地村中置義倉以恤鄰困與兄瀚昭白

首共爨曲盡友道邑中論友恭之誼者以畢氏兄弟稱首焉

生員劉培選採

濰縣張昭潛工部主事畢公墓誌銘

公諱瀚昭字星源號伯彥文登人幼聰穎年十餘通習經史為文有奇氣文登畢氏自十二峯先生諱霽以鴻博淹雅之學為東方文獻屢躋名場以副車終則公之高祖也會大父諱宿庚乾隆丙辰 恩科舉人任清河縣知縣 贈通奉大夫妣氏張 贈夫人大父諱所雋任涇陽縣典史署咸陽縣縣丞 誥贈朝議大夫妣氏張 贈恭人父諱以紱歷署崇明丹陽金匱知縣蘇州府管糧通判 誥贈中憲大夫妣氏張 封恭人公以道光丁酉拔貢庚子領鄉薦咸豐丙辰捷南宮授工部主事丁巳隨侍郎劉公崐奉修 永陵配殿及 陵前河道以勤謹為劉公所重知其可任艱鉅庚申海疆多故而金陵逆匪以數百萬侵掠大江南北無完土徐州捻匪亦乘機四竄屠燒縣邑殺無辜河南東昌淄川諸匪起而應之所在皆賊巢 廷議舉行團練以鄉兵固土圩而安民生 詔公隨督辦大臣杜侍郎劄至山東公承委團練登屬加員外郎銜是時捻匪自濟南東竄旌旗蔽天惡氛張甚百姓猝不及防紛紛逃散多為賊掠公移會各邑嚴行防勒而文登榮成兩邑南北東皆距海惟西境之崑崙山蜿蜒二百里奇峯疊嶺縮轂東西之口車不得方軌馬不得並轡行人偃僕累級而後上下視巖谷剗削壁立則懍懍若將墜蓋天設之險自古屯戍以禦賊鋒處也公與文榮邑侯籌舉各團長守禦山隘勇氣百倍賊眾屢拚死衝突卒為團丁擊退文榮得以安堵壬戌春回京以太恭人春秋高乞假歸養同治甲子太恭人棄世守制在籍而徐州捻匪又大舉東擾時營伍空虛綠兵羸弱不足恃大帥李鴻章尾賊後築膠萊河土圩將賊逼登萊境上有棄地困賊之 奏登萊兩郡為賊巢挺而走險狼貪羊很煙塵彌望人情洶洶皆曰大帥棄我公以前辦團練與各邑令及各團長皆甚浹倡議復興團練仍守崑崙山口以禦賊賊不敢犯急致書登萊青道潘公爵請諸東撫丁文誠公寶植另籌善策以散賊夥賊亦徐就殲滅東省自泰山至東海二千里得

文登縣志

卷九下二

人物二

十六

以瓦全者惟文榮兩邑及甯海州之東境而已然兩次辦團合文榮數十萬之眾皆以鄉兵自備芻糗不受官法約束公居中策應籌畫經費派撥團丁內而地方官外而各局紳董各山口團長皆須維持一體休戚相關日夜焦勞不遑寢食而精力亦自此耗矣賊退後公慮四方未靖宜籌善後以備緩急文榮以崑崙障其西天險可恃而山口之可通往來者三十餘處爰借眾力劈石築牆一夫當關賊遂巡而不敢進今疊石纍纍猶在望也丙子東省大饑公與邑侯籌春貸秋還之法共貸銀萬餘兩復請邑侯發倉穀賑貧民所全活甚眾丁丑歲大熟乃勸辦社倉七十餘處存穀數百萬石以備凶荒至於勸修文廟勸捐賓興田數千畝凡係有益地方之事無不為之而不德屢辦團練堅辭保獎蓋不欲以眾人之力弋一己之名也天性友愛家居三十年與其弟存樸孝廉白首共爨老而愈篤作退息亭於後圃蒔花種竹游詠其間兄弟怡怡如也著園亭百詠及不自知編以光緒戊子九月二十五日卒年七十有八德配張恭人蕭恭人皆先公卒子三長世基廩貢生孝廉方正候選訓導次世封庠生俱張恭人出三世垣廩膳生蕭恭人出女二長適榮成縣候補通判張公祥符次早夭俱張恭人出孫男十三皆業儒能守祖訓孫女八曾孫二側室李氏時年二十九公歿慟不欲生家人多方解慰之志愈堅仰藥自盡去公歿僅三十四日邑中紳士合詞請於邑侯曰畢公以簪纓世族撥科名擅文譽立朝未久退老於鄉當捻匪猖狂之時能運籌策以保桑梓賊平之後於地方利賴之事無不修舉而忠厚正直化及一鄉卒之日人人流涕則其生平之有造於里黨可知李氏於公歿未葬即以身殉節烈之奇固徵家範尤關風化接之 國典宜膺褒獎而顯幽光邑侯親往弔請 旌表焉例得附書系以銘曰孰積而貽之惟有德者昌孰續而承之惟有文者芳立朝未久功在一方烽燧告警驅彼羆狼泮水流馨育此鸞鳳生民秉赫懿德不忘卓哉巾櫛烈烈幽光我銘永垂兮將與東海俱長

畢世榕字仲容鈞昭子附貢生任高邑知縣同治二年流賊擾畿輔世

榕以土城久圯不可恃當禦之境上自率丁壯二千人遇賊於破塔村

力戰陣亡 贈太僕寺卿 救高邑及本籍各建專祠

新登州志

邑人張樹甲贈太僕寺卿畢君墓誌銘

君諱世榕字仲容一字秀廷簪纓紹襲代有聞人高祖西有公直隸清河知縣曾祖蘅塘公陝西留壩同知俱科目起家循聲卓著蘅塘公功德在人民尤尸祝世所傳爲神秦地者也祖以恆兩淮新興場大使三世俱以君伯方伯公貴贈如其官父鈞昭候選縣丞母李氏海邑少司馬望石先生裔孫貳尹士瑛公女父母俱以孝聞於道光壬辰八月生君君生而岐嶷讀書穎悟倍常兒年十九應童子試屢冠其曹以咸豐辛亥遊庠四戰秋闈薦而不售乃報捐知縣發保定試用於時君年二十七歲矣上游皆器重君悉心委任凡防海辦團通商各要務無役不從五年之間疊膺保薦以同知直隸州次縣缺補用初任豐潤凡四月次補今缺以同治元年十月到任百姓見令君年少又世家貴公子疑未有以饜民望者君殫心民瘼洞見情僞旬稽審斷雖老吏不敢欺一時輿誦翕然未幾而兵事作矣先是直東教匪與髮逆句通勢張甚徧躪畿南及是將竄入趙州逼高邑東界邑土城傾圮略盡君蒞任未久繕治未遑乃急邀紳民議曰城無可守卽守而貽害鄉閭不如禦諸境上因號召鄉練得一千四五百人瀕行誓之曰爾等激於義憤成行以出紀律不嚴祇益亂耳請得以軍法從事退怯者不汝貸亦不以退怯爲汝羞也行數里捉賊覘騎立命戮之俄遇賊前隊揮衆直前搏戰良久殺賊數百人乃賊來愈衆衝我軍三段兜圍截殺洵洵有聲君督愈力手火器斃執旗賊目一人馬賊二人賊知其官也蜂擁而前刺傷君脇君墮馬猶發機連斃二賊忽礮子洞貫胸前乃一手握劍一手拔佩刀更殺一賊而大罵擲刀以死是時賊亦創甚又見戰境上者如此城內可知且疑爲誘敵之兵遂東北斜竄以去翼日尋獲君尸面色如生獨勃勃餘怒氣

文登縣志

卷九下二

人物二

十七

男婦拜極前者齊呼好父母冀全我民竟爲民死民何忍獨生哭聲震地甚於悼其私親也事聞 贈太僕寺卿蔭一子雲騎尉以次襲恩騎尉罔替並 詔於高邑及本籍專祠崇祀以外委瑣慎言配從死兵勇耐焉慎言者本花門族與君同時督戰被七十餘創偏裨中飛將軍也君歿時才三十二歲實爲癸亥三月十一日卽以是日見夢於其太夫人而封翁數日前晚入書齋如聞君履聲固知事有先幾而君之英靈雖死猶弗死矣君配于氏亦本邑世家別駕昌迪公女子二人長芝序十歲次蘭序六歲卽以是年五月葬君雙頂山麓之高原銘曰昔贈君詩君方弱冠投筆班超從軍王粲何期斯語識乃在今魚腸脫手馬革傷心不畫凌煙翻傾淚雨牛刀割雞一官誤汝握拳透爪齧齒穿齧巡忠壺烈庶幾斯人煌煌天章峨峨廟貌兩地烝嘗一靈感召魂兮歸來驂螭駕駟回首蘭陔掩抑流涕未殫子孝先竭臣忠千秋信史萬古英風

濰縣張昭潛畢太僕傳

君姓畢氏諱世榕字仲容山東文登人其先多顯仕爲登州望族君生而岐嶷弱冠游庠慷慨有大志鄉先達器之曰此從軍之王粲投筆之班超也數應鄉試被黜迺援例授縣令發保定試用時咸豐末寇夷交訖逼近郊圻團練防堵無虛日上官多倚以爲重以勞績保薦俟補缺後以同知直隸州用初署豐潤縣事方之任豪民猾吏見令尹年少又世家膏粱子易之及蒞事究心民瘼洞見情僞旬稽審斷胥吏莫之敢欺一時輿頌翕然尋補高邑知縣高邑故趙房子邑戰國時敬侯武靈王輩北略中山嘗鏖戰於此君下車見城垣傾圯緩急一無足恃慨然曰城雖小燕趙古戰場也何無備至此方謀修城練勇而教匪已至教匪者起於山東莘冠館堂之間奉白蓮花教而暗與粵匪句通者也始倡亂僅四十七人懦帥不能討力主撫而旋撫旋叛糾煽驅脅浹月間得四五千人縱橫焚劫畿輔以南蹂躪無完區同治二年春三月教匪掠趙州逼高邑東境君集官紳議之曰城不可守且守城是棄鄉民也不如禦諸境上時募勇得千五百人君諭以忠義皆感激泣下將授甲楯以酒君煦嫗若慈父母又從而獎厲之曰若輩能殺賊

是皆燕趙豪傑之士也瀕行則誓之曰今日之事有進無退退者必斬我退爾亦倒戈刺之於是士氣百倍迺委訓導劉毓珊典史姚廷謨守城而偕外委督勇以出行抵破塔村遇賊力戰死之外委與焉先是賊所過殘破無敢截剿遂散漫曠野以爲常將戰君望之曰賊衆不整可破也鼓衆直前斃賊四五十人賊乃大驚馬上鳴篳篥號四出驍騎擁地而來時我軍漸疲而賊來愈衆故及於難君死身被八創年三十有二外委姓瑣氏諱慎言本花門族素以勇力聞是役也殺賊數百人身被七十餘創人歎爲偏裨中飛將軍也事 聞贈君太僕寺卿予雲騎尉世襲建專祠瑣慎言附祀

張樹甲字耦堂咸豐丙辰進士戶部主事辛酉擒匪之亂以歸省在籍倡議團練固守崑崙山口賊不敢東犯賊退復議修築石牆南北一百六十餘里同治甲戌奉 命賑文安各縣公帑外又傾囊得餘金以助賑全活甚衆生平博覽羣書以學問見重當路寶相國璫尤器重之嘗贈聯云居心忠耿應知我下筆恢奇最羨公官戶部二十餘年補福建司主事引疾歸積書數萬卷著有詩經論文頤志堂雜著子熙紱太學生精輿地所繪文登縣圖如指掌螺紋織毫不缺

廩生牟嶠探

文登縣志

卷九下二

人物二

十八

邑人畢瀚昭張農部傳

張君樹甲字耦堂余同年友也幼穎異好學成童遊庠旋餼於廩科歲試輒高等顧鄉試屢躓君夷然不以爲意益肆力於螢窗雪案間凡名家各稿及歷科房書旁逮漢魏六朝以降所爲詩古詞章莫不究心深入其奧故所作一經落紙見者稱珍咸豐壬子以第一人舉秋試君年已四十矣又三年丙辰偕余掟南宮官農曹余濫竽水部簿書之暇時相過從歲庚申海氛不靖 廷議舉行團練督辦大臣爲杜筠巢侍郎余以奏請隨同出京派辦登屬團練旋即乞養辛酉秋擒匪大股東竄適君歸省在籍乃共爲保衛計復團練緣文邑南北距海狂寇之所不及西則障以崑崙諸山綿延境上有險可扼率文邑團衆守之又集甯海東境團衆守之又約榮成團衆守之共數萬人器械糧糈各備君不時周歷各山隘激以大義俾知保境即以保家禦近不如禦遠詞氣慷慨衆悉樂從又赴石裏兩島商賈輻輳之區勸出貲以助團費紳富則於畝捐外又別有優捐無虞財匱於是士氣百倍賊衆長驅來犯抵福峴章皮橫擔青山等口悉經登時擊走雖各團長克一心力而君之艱難況瘁視如家事卒收地利人和之效此功在桑梓之著者也寇平復壘石因山爲牆爲有備無患之計互百六十餘里今猶纍纍在望也君丁太夫人艱服闋回京供職主稿捐納房監督通州糧運計通籍二十餘年得補福建司主事加員外郎銜大僚交相倚重方謂騰驥可卜竟以末疾告歸越一年卒

張樹甲服闋入都途中作

昔吾離家時惘惘不能去今吾離家時叱馭赴前路非關今昔殊有親無親故親在辭以行痛若失乳哺親歿不復出亦恐負 恩遇四時有消息出處非無據惟當治裝前一展松楸樹宛轉別慈魂俯仰申孺慕捫胸千萬言攀條向誰訴顧惟生鞠恩一瀉淚如注罔極不能酬違侈經世務挂冠情過激彈鋏計殊誤會當辭冗官尋我遂初賦 通籍四十餘宦情淡如水况值萱闈年桑榆迫短晷三復循陔篇歸鞅不能止滿擬偕妻孥竭力奉甘旨豈知堂前荆先萎半樹紫慈顏日垂泣衰病無全理少婦慘朱顏經年又

殉矣所以三年中著面淚如洗心力日衰耗那復堪驅使親朋迭寄書勉爲蒼生起小草忽遠志太倉眞
稊米郎署羈馮唐壯心徒爲爾 同氣只三人弟幼願長往所幸妹氏存風神實散朗鳳雛育未成明珠
遞落掌病骨久支離神思日恹恹今來送我行未語先悽惻問我何時歸恐我羈塵鞅不記勝衣初飢寒
擯族黨腹餒兄讀經手輒妹學紡慈母作嚴師寒月徹虛幌光陰幾回換骨肉漸墟莽燎鬚不讓勤知足
盍師廣此言未渠終已聽雙輪響長風挾飛霞同雲忽鬱決燕羽有差池一慟何堪想 山妻工作家甘
載甘憔悴雖無慷慨姿尙非兒女態每當辦裝日綠窗燈一穗萬種紆春愁不灑臨歧淚今春催赴官語
顧與前異前以叔氏存諸兒賴識字課讀常夜分擇交必古誼自驚茂蘭折痛若失左臂辛苦並一身惟
君自督帥君留網在綱君行市易肆勸學雖夙心治外豈婦事儻遺畫虎譏恐負丸熊意此事我亦難此
語卿姑置勿以訓兒篇亂我方寸地 一兒留持家事如蝟毛集一兒從遠遊泥沾馬蹏黑一兒依乃兄
隨分課耕織一兒就家塾勉力事筆墨而獨更一兒怙恃悼前失一意勤撫摩三年臥榻側稍可節驕慣
未忍予呵叱令伊父母存或當嘖姑息較伊父母恩究不抵萬一以此來征途勢難恕一刻諸兒皆顯愚
此兒尤孤特本無伊穎田安藉冀成立回首念諸雛風前衣盡溼 平昔有恩師心香虔一瓣南軒眞大
儒太邱更碩彥憶從竹林遊南軒詫未見頭角小崢嶸豫卜科名選豈知釋褐歸空切築場戀荒墳下馬
尋宿草隻雞奠立雪誓來生難酬心一片太邱讀禮時羣英悉北面顧獨偉視乎此豈長貧賤傳衣心略
酬解組局忽變羞澀餘空囊破落守枯硯頻年無米炊此境慘歸宦兩師恩最深兩恩報疑倦太息陸莊
荒回首淚如線 家居閱數載族黨洽恩義聞我將遠行來者日數四次第開別筵殷勤贈旅費並問首
路期一一先期至父老爲移裝兒童爲引轡相送幾空村祝我前程利儻無分寸功何以副茲意計惟守
素履窮達不殊致上以酬 國恩下以濟民計政成早賦歸略竟昔年志顏公家廟碑范公義田記暇輒
漉春酒重修疏廣事追話此時情秋山迎曉翠 讀書人愛書亦是一結習傳書有替人此樂尤莫及始
吾學問字册僅免園識經營三十年逐漸富籤笈有室如斗大縱橫經史集新闢一畝園花樹紛離立攜

文登縣志

卷九下二

人物二

十九

書讀花間不知香露溼時有清風來吹紅滿緜帙南面輕王侯官書促行急掩卷辭古人惘惘如有失昔
吾舍渠去有弟爲什襲今乃付諸兒恐徒恣蠹蝕再拜問經神別君定幾日會須盈五車歸擁百城邑
豎儒抱咫尺動詡知時傑吾敢張虛名一得亦須揭方今四海憂不在斧斨缺旗丁齒日繁鴉片毒尤烈
况聞西域船通市恣饕餮飲醜初亦甘養癰後必決農曹諸弊叢尤自煩剔抉錢當五銖復鈔須九賦絮
穀米購內地可補轉漕闕向來謀國人亦自謹施設徒突仍留薪廢食轉因噎奮筆抒罪言愴然五內熱
儒生好談兵往往招譏侮顧以忠憤同傾懷試一吐江南馳羽檄關西沸金鼓恭聞老大臣取次剪醜
虜而獨夜郎天竟閉邛笮戶老佗奮狂謀擢髮罪難數吾欲請長纆縛奴如縛虎枕戈待旦行聞雞中夜
舞荒徼洗蠻烟 王師沛時雨瀾滄一片石鐫功告萬古柳色環行營弓衣繡樂府歸奉 萬年觴青天
已再
補

宋允和字繼正諸生祖雁峰富稱巨萬而性情爽慨濟人之急千金不
吝座上客常滿親朋賴以舉火者無算允和其長孫也天姿超邁至性
過人弱冠遊庠蜚聲譽序而屢困棘闈中年後病股不良於行乃絕意
進取訓子弟課農桑承歡養志自號曰農菴古文有奇氣所著姜都尉
傳得龍門遺意制藝守成宏法於王文恪文好之尤篤年六十病目瞽

猶日爲文倩人書之著有農菴文集淡遠山房詩草子執琛恩貢生員生

趙鵬九探

于昌運字菊農道光戊子副貢甲午舉人揀選知縣賦性孤高淡泊少從父兄宦寓清江浦處紛華徵逐之場而座無談客時人罕識其面惟博覽羣書尤潛心於根柢之學自撰詩經正韻及採輯各家易注數十萬言附以心得能發前人所未發卒年四十有菊農詩集于昌進墓誌

于昌遂字漢卿廩貢生候補知州少負雋才倜儻有奇氣年十三學詩出語輒爲名輩所賞後學殖日富旁覽諸子百家之編獨深契於詩上溯漢魏下逮國初洎乾嘉間詩集無不探討尤得力於漢人五古於斷續離合間窺古人妙處其所作詩天葩煥發雨驟風馳筆簿霄漢氣

文登縣志

卷九下二

人物二

二十一

捲風濤故能樹幟騷壇於山左新城高密派外凌空獨步著有屢提精舍詩稿以宦遊江南晚年卜居揚州臨卒自爲墓誌遺命葬平山堂下

傳家

于昌遂自書詩稿後曰余作詩二十餘年得詩二千餘首因事因年分十一集久思刪訂重錄一過苦無定識偶有就正人所許可每不愜心愜心者人或不之許以是愈無定識乙丑賃居泰州江都郭堯卿館余家課兒子輩讀書暇煮茗挑燈與縱談漢魏六朝唐宋元明迄國初以抵乾嘉諸作者每自扞胸臆擊其長短堯卿往往首肯乃出十一集求爲繩削越月事竣仍爲十一集自道光辛丑迄同治癸亥約取若干首昔爲人所不置可否或指爲疵累者堯卿率取之大抵五古爲多衆所標識或芟之則七律七絕爲多余始恍然證以二十六年學力所至少陵謂得失寸心知良不誣也適有以活字板償逋者謂兵後在揚州巨室壞牆下得之檢其字得四萬六千餘偏旁略備喜其不災喪梨而省鈔胥之苦爰鳩工印二百部藏之篋中以防散落回憶余自十三歲學詩至十五略識門徑然但能爲五律他體率不成章朝夕諷誦者張文昌賈閻仙孟東野李才江及晚唐各家五律數百首耳越年平樂何荔泉來時與先從兄菊農論詩余末座敬聽爲之躍然遂縱觀三唐諸家所作而於初唐陳伯玉中唐劉夢得晚唐皮襲美李山甫四家讀之輒索然杜集則心知其佳口不能道其佳處是時他體亦稍稍爲之意中猶茫無歸宿也又牽於舉業不得專力於此至十九歲偶患咯血症廢讀性情所嗜藉以養疴先世藏書最富肆意繙閱窮二年力上溯漢魏下逮國初洎乾嘉間諸集無不涉獵其間讀不能終卷者唐以前惟康樂一集後則山谷今代隨園船山瓶水齋耳善乎李子德之言曰殫心五古他體雖缺詩人也諸體森然而五古未稱

純詣猶之半詩人也余服膺新語屏去諸集惟取子德所評漢詩音註誦之三年乃悟五古妙處只在興象斷續間太白摩詰頗理會到此若少陵前後出塞夢李白正如秦始皇郡縣天下聖人復起不能更其制而先王典策蕩然矣惟佳人一篇轉出太白摩詰上昔老聃作五千言非不能祖述堯舜蓋不欲以可道之道可名之名與尼山同萬古耳由是讀庾開府集悟五律妙處只在先後濃淡間唐人合作率如是厥後能見及此僅翁山愚山讀玉谿生集信王荆公晚年之論不誣後來知此者惟梅村七古一體余始步趨東坡後讀敬業堂集見初白殫一生學力僅成偃師之技信東坡天才千里馬固善走豈能與大鵬較遠近耶遂取梅村歌詩讀之又取長慶集讀之乃知梅村實取法初唐上窺庾鮑而以李杜韓蘇之才氣格律行之與香山實風馬牛也今之學梅村體者率襲長恨歌琵琶行面目不知二詩實長慶集中下乘見不及此何能望梅村項背耶此余二十餘年學力所及如嚴滄浪所謂安身立命處也詩稿印成信筆書後求堯卿爲前序詩之道果應如余所言耶或余有所偏執耶

